

Xapa hutarieka mieme Kemituiyi

*Tsarumuni kemititawau mitimaiweniki
(2Kem 1:2-17 - 1Te 3:4-15, 10:26-29, 2Kem 9:25-28)*

¹ Merikitsi Tsarumuni Rawiri nu'aya mira'aita tirikaiyeti kanayani, Yawé Kakaiyarieya hamatiana muyeikakaiki meta waikawa tirikaiyeme kanayeitiani.

² Hiki Tsarumuni yunaime 'ixaheritsixi teiteriyari kaniwarutahiawe, 'iki xeimiriyari meta xeitsienituyari kuyaxi tewa'aitiwamete metatsiere kuwexinaruritsixi, meta yunaime 'Ixaheri nuiwarimama wa'ukiyarima.

³ Hiki miki meta yunaiti memeweiyakai mekaniyukuxeirieni tukita Kawahuni mirakutewatsie, muwa Kakaiyari mekaniutahiawekaitini, Muiťsexi Yawé ti'uximayatsiriwame, makumawetsie 'ixuriki tukiyari Kakaiyari hetsiemieme mitawewiekai.

⁴ Kerutsareme kiekariyaritsie Kakaiyari tiratuya kakuniyari kaniukateitini, Rawiri mana pi'atiakai Kiriati-Yeharini paiti kepauka meiyetitsie,

⁵ peru mawari taiyame wurunitse tepiyariki miwewiya Wetsareri mitawewi, 'Urihi nu'aya meta Kuxi teukarieya, Kawahuni paiti kanewekaitini, Yawé tukieya hixie. 'Ayumieme Tsarumuni meta 'ixaheritsixi mana mekanekine Yawé mehetahiaweke.

⁶ Mana Tsarumuni Yawé hixie, mana mawari taiyame hixie 'uyaka 'ixuriki tukiari manuwe, hetsiena xeimiriari mawari taiariari kaniuwewieni.

⁷ Hiki miki tikaritsie Kakaiari Tsarumuni hixie kaniuyuhekiata mipai katinitahiawe:

—Tita pemireuyehiwa kenetineutawawiri.

⁸ Mipai Tsarumuni katinita'eiya:

—'Eki ne'ukiyari Rawiri pe'inaki'erieti 'aixia pepitixeyakai, hikita ne hetsiena mieme nemitita'aitaki pepinetsi'anayexei.

⁹ Yawé meta Kakaiari, ne'ukiyari Rawiri kepemitiutahiawixi kenaye'atia, 'ekitsi ti'aitame pekanenayeitiani teiteri memiyumiire wahetsiemieme tumuanari kwiepa mieme hepai.

¹⁰ Ne nepimatsiwawirie nemitimaiweniki meta nemireutamaiweniki nemitiwata'aitianiki 'iki 'ateiterima memiyumiire, xika mipai pekanetiupitiani, ¿kemi'ane piyiwe mitiwata'aitiani?

¹¹ Hiki Kakaiari Tsarumuni mipai katiniutahiawe:

—Metsi pekaneniwawirieka pemitimaiweniki meta pemirakumaikaki para neteiterima pemitiwata'aitianiki, wahetsiemieme ti'aitame nemimatsi'ayeitia, peru 'atsipepikahaine pemixikutiniki, pemirexeiyaniki meta pemimariwaniki, memimatsi'aye'unie memikwiniki meta tukari waikawa pemexeiyaniki 'atsipepikahaine,

¹² ne nepimatiyetuirieni. Peru nekamanipitiamikita pemixikutiniki, pemirexeiyaniki meta pemimariwaniki, meripaiti te'aitamete

kenemikatiwarupitia meta nixewiti 'a'utima memanuka'uni mipai mepikayini.

13 Hiki 'arike Tsarumuni 'ixuriki tukiya manuwa Kawahuni mirakutewatsie 'akaneka kanayeyani Kerutsareme kaneyani, mana 'ukaiti katiniuta'aite naime 'Ixaheri kwieyaritsie.

14 Kawayutsixi Tsarumuni waikawa warexeiyati patia meta kaxetate kuyaxa miemete: xeimiriya heimana nauka tsienituyari (1.400) meyupaimeme piwarexeiyakai kaxetate, meta kawayutsixi tamamata heimana huta miriyari (12.000) mepiyupaimikai, miki kawayutsixi kaxetate kuyaxa mieme muwa'uti mepiye'inekai meta hipati Kerutsareme paiti yuparatsiyu 'aurie piwaye'inakai.

15 Kerutsareme kiekariyaritsie ti'aitame pirata meta huru kwinimieme paime pexeiyakai tetexi kemitu'ane hepai, meta kariuxa kiyeyari waikawame pexeiyakai pinu makuweri mieme hepai.

16 Tsarumuni kawayutsiximama 'Ekipitu kwieyaritsie mepinanaiyakatetikai meta Kuha, mana paiti ti'aitame tetuayametemama mepiwatinawekai.

17 Kaxeta kuyaxa mieme 'Ekipitu kwieyaritsie nanaiyakame piyaye'akai 'ataxewime tsienituyari pirata tuminiya, yuxewiti kawayu paye'akai xeitsienituyari heimana huta tewiyari heimana tamamata. 'Iki kaxetate kuyaxa miemete meta kawayutsixi yunaimete te'aitamete hetitsixi meta tsiriyutsixi 'arike mepiwatuiriekaita.

2

*Kememite'uyukuha'aritia memiteta'uximayataki
tuki hetsiemieme
(2Kem 2:1-18 - 1Te 5:1-16)*

¹ Merikitsi Tsarumuni yakaniutayini yuparatsiyu mitawewieniki meta tuki Yawé hetsiemieme.

² Hiki te'ikatomete kaniwaru'uitiani haika tewiyari heimana tamamata miriyari, meta nauka tewiyari miriyari tetexi xixiwamete memiteta'uximayataki hirtsie. Piwaru'uitiata haika miriyari heimana 'ataxewi tsienituyari te'uximayatamete tewa'aitiwamete.

³ Hiki Tsarumuni 'iki niuki Hiram Tirutsie ti'aitame kaneni'airieni:

«Kenenani'airi kariuxa kiyeyari, ne'ukiyari Rawiri kepemireyeni'airi hepai paratsiyu mitawewieniki.

⁴ Ne tuki Yawé takakaiyari hetsia mieme nekanitawewimiki. Hetsiena mieme patsiekame nepayeitiani, muwa 'ikwa witsimu'ia nemititaiyaniki, meta paa mipatsie yanepiremaniriwani, mawari taiyariyari ximeri meta taikai nepitiwewiriwani, mawari xawatikimieme meta metseri manatiwenitsie mieme, meta hipame 'ixiarari Yawé takakaiyari hetsiemieme. 'Iki 'Ixaheri kwieyaritsie yuheyemeki mipai mepiteyurieka.

⁵ »Tuki nekanitawewimiki mariwekame, matsi takakaiyari kanimariweni keyuri kakaiyarixi.

⁶ Perutsi, ¿tete'itawewirieni tuki, matsititi muyuawi tsepa kemeutitewa hetsiena mieme 'etsipiyewa? Ne tsepa tixaiti nemikatihiki, tuki

nepitawewirieni muwa 'ikwa mititaiyarıwaniki hetsiena mieme.

⁷ »Xeime kenenanı'airi ti'uximayatame rakumaikame huruki, pırataki, wurunitseki, tepiaki, 'ixuriki kwimixeta, mixeta meta miyitsikimaiyeki, mireutaxixiwe naimeki, mitita'uximayataki 'ena kiekatari memiteheutamate nemıwarexeıya wahamatia Kura kwieyaritsie meta Kerutsareme, ne'ukiyari Rawiri meripaiti miwaruta'iniekai.

⁸ »Kenenanı'airi Riwanu mieme kariuxa kiyeyari meta huku kwinimieme miraye'atika kiyeyari, ne nepıtime te'a'uximayatamete mepite'akumate 'iki kiyexi witeyariki. Neteıterima meta 'ateıterima yunaiti mekatenita'uximayatakuni,

⁹ kiyexi waikawa memıkuxeırieniki, tuki nemıtawewieni 'apati kanayeimiki mariweti.

¹⁰ Te'a'uximayatsiriwamete kiyexi memitiwiteni nekaniwayetuiirimiki xeitewiyari miriyari tiriku 'ikayari, xeitewiyari miriyari tsewara 'ikayari, kaxie winuyari nauka tsienituyari heimana huta tewiyari miriyari rituruyari meta yaxeikıa paimeme rituruyari huriwa hatseitiyari».

¹¹ Hiki Hiramı Tiru kwieyaritsie ti'aitame, Tsarumuni kaniuta'eiya xapa kaneini'airieni mipai'ayetaıneme:

«Yawé ti'aitame kamenayeıtiani yuteıterima wahetsiemieme, waikawa matsinaki'erieti.

¹² Yawé 'aixıa ketikuxaxatsiwani, 'Ixaheri Kakaiyarıeya, kwie meta taheima muyema muyuawi mutawewi, ti'aitame Rawiri mupitia

yuniwe mayexeiyaki, timaiweme meta reutamaiweme, miki kanitawewimiki paratsiyu 'amipa meta Yawé tukieya.

¹³ »Kamitsi Hiramí-'Awihi nepimatsi'anuni'airieni, mitimaiwe meta mireutamaiwe,

¹⁴ maamaya Rani xiixarieya pihiki meta 'ukixarieya Tiru pikiekame. Miki katineuta'uximayataweni, huruki meta pirataki, wurunitseki meta tepiaki, tetetsie meta kiyetsie, meta 'ixuriki kwimixetaki meta miyitsikimayeki, rinu 'ixurikiyariki meta 'ixuriki mixetaki, meta naime katineutaxixiweni meta tsepa kemituu'aitiarie kaniyiwani. Hiramí katinita'uximayatamiki 'ateiterima memitemate wahamatia meta Rawiri 'a'ukiyari meta neti'atiwame miwaranayexei wahamatia.

¹⁵ »Hiki ketanani'airi tiriku, tsewara, huriwa hatseitiyari meta kaxie winuyari pemitatsi'utaxatia neti'atiwame.

¹⁶ Tame hiritsie Riwanu mieme kiyexi tepitiwiteni kepaimeme pemeuyehiwa, te'itihame waikakawame tepenuhautsitiani haramaratsie Kupe paiti. 'Ekitari mana pekatinita'aitamiki Kerutsareme paiti manutikieniki».

¹⁷ Tsarumuni 'Ixaheri kwieyaritsie memititekai tewa kiekatari yunaime kaniwaruti'iniata. Meripaitiri Rawiri piwaruti'iniatakai, hikita 'iki mepaki xeitsienituyari heimana huta tewiyari heimana tamamata heimana haika miriyari heimana 'ataxewi tsienituyari (153.600).

¹⁸ Te'ikatamete kaniwarayeitiani haika tewiyari heimana tamamata miriyari

(70.000) meypaimeme, tetexi xixiwamete
 hiritisie memu'uwani kaniwarayeitiani nauka
 tewiyari miriyari (80.000) meypaimeme,
 meta te'uximayatamete tewa'aitiwamete
 kaniwarayeitiani haika miriyari heimana
 'ataxewi tsienituyari meypaimeme (3.600).

3

Tuki kemitiutawewiya *(2Kem 3:1-14 - 1Te 6:1-29)*

¹ Hiki kanitsutiani Tsarumuni Yawé tukieya
 wewieneti Muriya yemuriyaritsie Kerutsareme
 kiekariyaritsie, hakewa Yawé meyuhekataxi
 'ukiyarieya Rawiri hixie. Mana kanitawewieni
 hakewa Rawiri metaxataakai, 'Arahuna*
 maka'etsakaitsie, kewutseu tewiyari.

² 'Uximayatsika kaniutsutiani nauka wiyari
 ti'aitati meta hutarieka metseritsie meta
 hutarieka tukariyaritsie.

³ 'Iki 'iniari Tsarumuni miyetia kanihikitini
 Kaka'yari tukieya tsutimeyari hetsiemieme,
 'emeutatewatsie xeitewiyari heimana 'atahuta
 meturuyari pexeyakai, 'etsimauyewatsie
 'atanauka meturuyari pexeyakai.

⁴ Tuki hixie kii meukumakai kitenietsie
 yaxeikia pitewikai tuki 'etsimauyewatsie
 kematayeukai, tatsiari, 'atanauka meturuyari
 tewiti meta 'atanauka meturuyari heutitewati.
 Taitanatsie huru mihikiaki piwakuwiri
 Tsarumuni.

* **3:1 3:1** *'Arahuna. Yatini 'Uxinahani. 'Iki hutakia pitewa.*

⁵ Tukita 'amuyeyewatsie huku miraye'axe mex-ayari kaniwakumana, mikitsie taki 'ikiyari kaniwaku'utiani meta huru tepiayari 'aixia mi'ane kaunariyari.

⁶ Tuki witsikaniuta'itiarieni tetexi witsimi'aneneki meta huru Pariwahini kwieyaritsie miemek.

⁷ Tuki taita pikaxite manuyehe huru kanitiwirieni, meta kitenie manuyehe, tuki 'ixumeriyari, meta 'ituparite, meta tuki 'ixumeriyaritsie kaniwarawewiexiani Kakaiyari teitametemama.

⁸ Tsarumuni Waikawa Muyepatsie kaniutawewieni, yaxeikia paime pexeyatikatei tuki kematayeukai, 'ipai paime pexeyakai, 'atanauka meturuyari tewiti, yaxeikiata 'atayeuti. Taitanatsie huru muhikiaki kaniwakuwirieni, xeitewiyari heimana haika miriyari kiruyariki.

⁹ Huru kirapuxiyari xexuiti meriyu kiruyari pirahetekai. Yaxeikiata kii wapaiti muyewaikawa huru kaniuyewiriexiani.

¹⁰ Waikawa Muyepatsietsie Kakaiyari teitametemama yuhutati memitiwewiyaniki katiniuta'aita, meta huru kaniwarukawirieni.

¹¹ Kakaiyari teitametemama yuhutati yu'anate metatseratikaiti 'atanauka meturuyari mepatayeukai. Yuxewiti Kakaiyari teitameya 'anateya xexuiti huta meturuyari heimana xeitewiyari heimana 'auxiwi tsenitimeturuyari pexeyatikatei, xewiti 'anaya tuki 'ixumeriyaritsie peuta'axekai, xeimekita hutarieka mieme Kakaiyari teitameya 'anayatsie peuta'axeikai.

¹² Kakaiyari teitameya hutarieka mieme mikitatsiere 'anateya xexuiti huta meturuyari

heimana xeitewiyari heimana 'auxiwi tsenitimeturuyari pexeyatikatei, xewiti 'anaya tuki 'ixumeriyaritsie peuta'axeikai, xeimekita matiari mieme Kakaiyari teitameya 'anayatsie peuta'axekai.

¹³ Kakaiyari teitametemama mepiti'ukai heitserie meheutaneniereti tukita, yunaiti yu'anate metaweratikaiti 'atanauka meturuyari mepatayeukai.

¹⁴ 'Ixuriki 'amayetsuye tukita meuwiere putawewi 'ixuriki miyitsikimaiyeki, mixeta, kwimixeta, meta rinu 'ixurikiyariki, meta mikitsie katiniuta'aita Kakaiyari teitametemama memaxuiyaxianiki.

¹⁵ Tuki hixie tuxiyu hutame kaniuti'aita tamamata heimana 'ataxewi meturuyari 'utitime, meta mu'uteya menyatsatikatei huta meturuyari tawari heimana 'etsiwa kaniutitikaitini,

¹⁶ metatsiere tepia kaunariyari tsariekame kaniuta'aita, tuxiyu 'emeutitewatsie kane-nakuwitiani, meta kiranara manitsana hepai mi'anene 'ikiyari kaniuti'aita xeitsienituyari paimeme, tepia kaunariyari hetsie kaneiyat-saxiani.

¹⁷ Tuki hixie tuxiyu kaniti'uitiani, xeime 'utatana xeimeta tserietana tayeta hepatsie. Matiari mieme Kakini katiniteriwa, hutarieka mieme Wuhatsi.

4

*Piinite tukita timieme
(2Kem 4:2-6, 10-5:1 - 1Te 7:23-26, 38-51)*

¹ Hiki Tsarumuni mawari taiyame xeime kaniutawewieni wurunitse tepiyariki, 'atanauka meturuyari tewime meta 'atanauka meturuyari 'atayeume meta nauka meturuyari heimana 'imeriyu heutitewame.

² Meta katsu 'emiyewa haa makatuare kaniutawewieni tepia kwaxiyariekameki xikiraiyeme, nauka meturuyari heimana 'imeriyu 'anutatewame, meta huta meturuyari heimana xeitewiyari heimana 'auxiwi tsenitimeturuyari heutitewame. Meta tamamata haika meturuyari heimana 'imeriyu piyeukai.

³ Tenimeyari hetia xurukuyari tuurutsixi puwarata'utia, xeimeturuyaritsie xeitewiyari meyupaimeti mepa'utikatei, miki yunaiti katsu matia mepiyuxewiriyakai.

⁴ Katsu 'emiyewa tamamata heimana huta tuurutsixi wurunitseki memiwewiyatika wahetsie puyemakai, hetiana mepeutakikitsakai, yuhaikati tuurutsixi tayeta mepeutinenierekai, yuhaikatita tau makayuyuipe hepatsie, yuhaikatita tatsutia hepatsie, meta yuhaikatita tau manatineika hepatsie.

⁵ Katsu haa makamare 'atahaika tsenitime-turuyari* pitsuikai, meta tenimeyari ye'i tenimeyari hepai kani'anekaitini meta tuturi mitaxutuiximeni hepai pitiyuxexeiyakai. Mikitsie haika tewiyari heimana 'ataxewi miriyari rituruyari haa pirakanakekai.

⁶ Yaxeikiata Tsarumuni tamamata katsu 'itsimiyeyeu kaniutiwewieni, ta'utata 'auxiwime

* **4:5 4:5** RV60 paine *tewi kemauyeyeu yumamatsie mipai pitsuikai.*
Hipati teiwariki 8 cm.

kaniuti'uitiani meta tatserieta yaxeikia paimeme. Para naiti mawari taiyametsie timieme mana mititihauxinariwaniki, peru mawari wewiwamete katsu 'emiyewatsie mepiyutihauxinakai.

⁷ Meta tamamata kixeme 'uitiwame kaniutiwewieni huruki wewiyatikaima, hiki tukita kaneita'uitiani, 'auxiwime ta'utata meta 'auxiwime tatserieta.

⁸ Metatsiere Tsarumuni mexa kaniutiwewieni tamamata paimeme tukita kaneita'uitiani, ta'utatatsie 'auxiwime kaniti'uitiani meta tatserieta 'auxiwime. Meta tukita mieme xakirite xuriya kwekwewiwame xeitsienituyari kaniutiwewieni huruki.

⁹ Mawari wewiwamete watakwa putawewi, meta takwa 'amakuyewa 'itupari hexeyatikaima, miki wurunitse tepiyari piwiriyarietikatei.

¹⁰ Katsu 'emiyewa wurunitseki miwewiya tuki hixie tserietanatsie kanitiken, tatsutia hepatsie.

¹¹ Yaxeikiata xarite, tepia 'amititi naxi tutuweme, meta xakirite xuriya kwekwewiwame katiniutiwewieni. Hiki Hiram mipa katiniutinini tinaime, Kaka'yari tukieyata timieme mirayaniki Tsarumuni kemitita'aitiakai, tatsiari:

¹² Hutame wurunitse tuxiyuyari,
hutame tuxiyu mu'uteya tuturi hepai tiyuxex-
eiyame,
wurunitse wipiyari muhuta tuxiyu mu'uteya
hetsiemieme,

¹³ nauka tsienituyari kiranara manitsana
hepai mi'anene 'ikiyari huta xurukuyari
manukutetikatei xexuime wipitsie,

- 14 kaxetate meta katsu yaki miyeyeu tihauxi-
namete,
15 katsu 'emi'yewa haa makamare meta tuurut-
siki tamamata heimana huta memituika,
16 xarite, tepia 'amititi naxi tutuweme, meta
tepia 'amititi manuxite.

Hirami-'Awi 'iki miyamitipaime Tsarumuni
mitiutiwewiri Yawé tukieya hetsie timieme
mirayaniki naiti wurunitse tepiaiyariki mixawatiki
pitiwewiyatikatei.

17 Ti'aitame katiniuta'aita Kurutani
mayeweritsie mititiwewiyaniki kwiepa 'iniarita
mititixeriyarieniki, Tsukuti mirakutewatsie meta
Tsaretani wahixiapa.

18 Piinite wurunitseki mitiutiwewiya
pitiimiirekai Tsarumuni mitiuta'ai, 'ayumieme
naiti kemirahetekai wurunitse pika'uyiwekaxia
mi'iniataki kepaimeiti muyi.

19 Metatsiere Tsarumuni katiniuta'aita
hipameta piinite Kakaiyari tukieyata timieme:

- 'ikwa taiyame huruki miwewiya,
mexate paa manamarike Yawé hetsiemieme,
20 kixeme 'uitiwamete huru mihikiaki
muwewiyatika meta kixeme hetsiena
muyeyaxe, mutitaiyariwaniki Waikawa
Muyepatsie hixie, yemeki meripaiti
kemiraka'utsiekai,
21 tuturi huruki miwewiyatika, kixemete,
meta 'iti manuxite 'amipa, mikita naiti huru
mihikiaki pitiwewiyatikatei,

²² tixikamete, xakirite xuriya kwekwewiwame,
 xari 'eminena meta 'ikwa taiyame
 'etsimipepe,
 tukita mireutahakitiretsie, tatsiari, Waikawa
 Muyepatsie 'itupariyarite meta 'ituparite
 Muyepatsietsie meuwikai, mikita huru
 pikawiriyarietikatei.

5

¹ Hiki kepauka mitiutinirie naiti mitiuta'aitakai
 Yawé tukieya hetsie timieme, 'ana Tsarumuni
 pitiuta'aitaxi miti'atiarieniki huru, pirata,
 meta naime piinite 'ukiyarieya Rawiri Yawé
 mitiyetuiriekai, hiki katiniuti'uta Kakaiyari tukita
 waikawa miraye'atika mitiuyepinetsie.

Tiratu kakuniyari

(2Kem 5:2-6:11 - 1Te 8:1-21)

² Hiki Tsarumuni katiniwarutani'airieni
 'ukirawetsixi 'ixaheritsixi meta yunaime
 yunuiwari hetsiemieme memanuyetei, meta
 'ixaheritsixi wa'ukiyarima, memiyukuxeirieniki
 Kerutsareme, kakuni tiratu 'iniariyari Yawé
 hetsiemieme memanukweniki, Rawiri kiekariena
 memiyekweniki, Tsiyuni mirakutewatiti, tukita
 memeitateniki.

³ Hiki 'atahutarieka metseriyari
 'ixiarariyaritsie, 'ana yunaiti 'ixaheritsixi
 mekaniuyukuxeirieni ti'aitame hixie.

⁴ Hiki kepauka memu'axia yunaiti 'ukirawet-
 sixi 'ixaheritsixi, 'ana rewitsixi tiratu kakuniyari
 mekaniutikweni.

⁵ Mawari wewiwamete meta rewitsixi
 mekaneikweni metatsiere 'ixuriki tukiyari

meta tinaime muwa m̄itiyepikai m̄itipatsietika mekatenetini.

⁶ Ti'aitame Tsarumuni meta hamatiana 'ixa-heritsixi mem̄iyuxeiriekai mana t̄iratu kakuniyari h̄ixie mekaniwarutimawa muxatsi meta tuurut-sixi meyumiireme m̄iwaruti'iniata pikayiwekai.

⁷ Hiki mawari wewiwamete mekaneikweni t̄iratu kakuniyari Yawé tukita mutanieretsie, Waikawa Muyepatsietsie, muwa Kakaiyari teitametemama wa'anate hetia mekaniteni.

⁸ Miki Kakaiyari teitametemama yu'anate metawerat̄ikaiti mutanieretsie, kakuni mepanukanakai meta kiyexi kimana mikukweiyane.

⁹ Kiyexi 'ikwekweweme 'ap̄it̄ikai kakuni het-siemieme k̄itsimeyarite puyuhekiakai Waikawa Muyepatsie h̄ixie, takwa paiti pikayuhekiakai, hiki 'akuxi yaxeikia pire'ane.

¹⁰ Miki kakunitsie tetexi hutati piyemanekai Muitsexi mana meikamanaxi Huré mirakutewatsie, Yawé t̄iratu muwewitsie 'ixaheritsixi wahamatia 'Ekipitu me'ayekineku.

¹¹ Mawari wewiwamete tuki Muyepatsieta mekaniwayekine. Yunaiti mawari wewiwamete mana mem̄u'uwakai mekaniuyu'itiekaitini, memite'uximayakai meta mem̄ikate'uximayakai.

¹² Yunaiti kwikamete rewitsixi —tatsiari, 'Atsahapi, Hemani, Kerutuni, waniwema meta waiiwama— mawari taiyame 'aurie mekaniti'ukaitini tau manatineika hepatsie, rinu kamixayari mehanakatit̄ikaiti meta xaki mutitiraurika me'u'iti, 'aripa meta kanarite me'u'iti. Wa'aurie mep̄iti'ukai mawari wewiwamete xeitsienituyari heimana xeitewiyari

meyupaimeti kuxineta me'utihitsiwati.

¹³ Kuxinetaki teyuitiwamete meta kwikamete Yawé mekaniniawakaitini meta pamipariyutsi mekanipitiakaitini kuxinetaki meteyuitiati, tepia mutitiraurikaki meta hipame kanariteki. Kepauka memutikwikaxi mete'ukayuitiwati yunaiti mipai mete'ukwiti: «Yawé 'aixia pitiuka'iyari, naki'eriya hawaiki pikaheu'axe», 'ana haiwitiri Yawé tukieya panukana.

¹⁴ Muyehaiwitiriyakaiki mawari wewiwamete mepika'uyiwekaxia memiyeweianiki mete'uximayati, tukita Yawé xawatiriyaya witsi'aneti mihinekaiki.

6

¹ Hiki Tsarumuni mipai kaniutayini:

«Yawé, 'eki mipai peputayi kename yiriya hai-witiriyaritsie pe'uyeikani,

² ne matsi tuki witsi'aneme nepimatsi'utawewiri, muwa pemayekaniki 'aheyemeki».

³ Hiki Tsarumuni ta'aurie kanaweni teiteri wahepa Kakaiyari tawawirienike 'aixia miwayurieniki yunaima 'ixaheritsixi mana memiti'ukai,

⁴ mipai kaniutayini:

«'Aixia ke'itiarieka Yawé 'ixaheritsixi takakaiyari, miki hiki yutirikariyaki piraye'atia ne'ukiyari Rawiri kemitiutahawixi mipai 'utaiti:

⁵ “Kepauka 'Ekipitu kwieyaritsie nemiwarayewititsie paititi neteiterima 'ixaheritsixi, ne xeime kiekari nepika'anayexei 'Ixaheri nuiwarimama watsata mana

nemıtawewiyarieniki tuki hakewa ne-mayekaniki, meta xeime tıma nepıka'anayexei mitiwata'aitianiki 'ixaheritsixi teıteriyari.

⁶ Matsi, Kerutsareme nepanayexei mana ne-mukaniki, meta Rawiri nepanayexei neteıterima 'ixaheritsixi mitiwata'aitianiki”.

⁷ »Merikite, ne'ukiyari Rawiri waıkawa piyuwairiyakai mitawewieniki tuki Yawé hetsiemieme, 'ixaheritsixi takakaiyari,

⁸ peru Yawé mipai pititahiawixi: “Nehapaiıtsita 'aixia pi'ane pemi'awairiyaki tuki nehetsiemieme pemiwewimikiki.

⁹ Peru, 'eki pepikahikitini peminetsitawewirieni, 'aniwe pıta 'ahetsie miyeyani pitiyurieni, miki tuki pitawewieni nehetsiemieme”.

¹⁰ »Hikiri Yawé katinaye'atiani kemutayi: Yemeki kemutayikai, hiki ne nekananukakeni ne'ukiyari Rawiri 'utıma nemıtita'aitaki 'Ixaheri kwieyaritsie, meta tuki nekaniutawewieni Yawé hetsiemieme, 'ixaheritsixi takakaiyari.

¹¹ Muwa kakuni nekaneutatani, tiratu maye'uxa mayemane Yawé miwewi 'ixaheritsixi wahamatia».

Tsarumuni kemituuyutanenewi

(2Kem 6:12-42 - 1Te 8:22-53, Nıa 132:8-10)

¹² Hiki meta, Tsarumuni mawari taiyame Yawé hetsiemieme hixie kaniutakeni, meta yunaime 'ixaheritsixi memiyuxeiriekai wahixie, yumamate teiki kanetseraxiani.

¹³ Mana pıta'aitakai mitawewiyaniki takwa hixiapa wapaiti kekame wurunitseki wewiyakame, yaxeikia heutatetewame huta

meturuyari heimana xeitewiyari heimana
'auxiwi tsenitimeturuyari, meta xeimeturuyari
heimana xeitewiyari heimana tamamata
heimana 'auxiwi tsenitimeturuyari heutite-
wame.* Mana wapaiti, kaniukatunumakeni hiki
yuheima hemeti muyuawitsie,

¹⁴ mipai katiniuyunenewieni:

«Yawé, 'ixaheritsixi takakaiyari, xe-
witita Kakaiyari 'apika'uyeika 'ahapai
'aneti muyuawitsie meta kwiepa, 'ekitsi
'atiratu pekanaye'atiwani meta pekani-
wanenimayaka yuheyemeki kemi'ane
memimate'uximayatsirie meta yu'iyariki
memimatsi'uweiya.

¹⁵ Yapepitiuyuri 'ari nepaapa Rawiri matsi-
parewiwame kepemitiutahiawixi, 'iki tukaritsie
'atirikariyaki pepiraye'atia kepemutayi 'aniukiki.

¹⁶ »Hikita, Yawé, 'ixaheritsixi takakaiyari,
yaxeikiata kenaye'atia ne'ukiyari Rawiri 'ipai
kepemititahiawixi: “Xika 'aniwema 'aixia
metekahuni, xika yamete'u'uwani ne'aitsikate
kemaine 'eki kepemitikatia, yuheyeme
mepihikitini 'anuiwari hetsiemiemete
te'aitamete 'Ixaheri kwieyaritsie nehixie
me'u'uwati”.

¹⁷ Yawé, 'ixaheritsixi takakaiyari,
ketinaye'atia 'iki kepemititahiawixi Rawiri
mati'uximayatsiriwame.

¹⁸ »Peru çtiyiwekuta 'eki, nekakaiyari, 'ena
kwiepa pemukani teiteri wahamatia? Matsi

* **6:13 6:13** RV60 paine 'auxiwi tsikuriyari tewime meta 'auxiwi
tsikuriyari 'atayeume, meta haika tsikuriyari heutitewame.

muyuawititi, tsepa kemeutitewa, mana pepikatinake, matsi 'iki tuki nemutawewi 'etsipupe.

¹⁹ Peru, Yawé nekakaiyari, nenenewieri keneu'eni meta waikawa kenemimatiwawirie ne matsiparewiwame. Keneu'eni nehiwari meta nenenewieri nemiyetua 'ahixie.

²⁰ Kenexeiyani tukariki tikariki 'iki tuki, hakewa mimatsihenakixi muwa pemayekaniki, pemi'eniekaki nenenewieri 'ena nemiyetuaya ne ti'a'uximayatsiriwame.

²¹ Keneu'eni waikawa kenemimatiwawirie ne ti'a'uximayatsiriwame meta 'ateiterima 'ixaheritsixi kepauka memiyunenewie 'uwa. Ketane'enieka muyuawitsie paiti hakewa 'eki pemeyeika, ketaneu'eni meta ketatineuyehiwiri.

²² »Xika xewiti 'axatiuyurieni yu'iwa hepaitsita, xika 'utani'arieni 'ena 'atuki manuwe mawari taiyame hixie 'uweti yamitayiniki,

²³ 'eki keneu'eni muyuawitsie paiti meta kemitihetserie ketineuyuri te'a'uximayatsiriwamete wahetsie. 'Uximatiarika keneupitia kemi'ane 'axamitiuyuri yemeki kemireuyewetse hetsiena mieme, kemi'aneta 'axamikatiuyuri keneuxina heitserie 'amuyeikaki.

²⁴ »Xika 'ateiterima 'ixaheritsixi memiwaraye'unie mewara'iwa 'ahepaitsita 'axamemite'uyuriki, xika kwitiwata me'u'axiani 'ahetsia mariweme mematsi'ayeitiani, xika meyutanenewieni waikawameki 'ena tuki manuwe,

²⁵ 'eki keniwaru'eni taheima muyuawitsie paiti meta ketiniwareuyehiwiri 'ateiterima 'ixa-

heritsixi ke'axamemite'uyuri meta keniwaraku-nuitia 'iki kwieyaritsie pemıwayetuiritsie meta wa'ukiyarima.

²⁶ »Kepauka 'ateiterima 'axamemiteyurieni 'ahepaıtsita, xikata 'eki pewaruhiweritiani xika muyuawitsie pereunani mikakawiyeki, xikata miki kwitiwa meyutanenewieni 'ena meta mariweme mematsi'ayeitiani meta ke'axamemite'uyuri mete'uhayewa,

²⁷ 'eki keniwaru'eni muyuawitsie paiti meta ketiniwareuyehıwiri ke'axamemite'uyuri mate'uximayatsiriwamete, 'ateirima 'ixaheritsixi. Keniwaruwitiximeni huye 'aixia mi'ane memuweiyani, meta wiyeri kenani'a 'iki kwieyaritsie, mıti'apiini, 'ekitsi pekaniwaye-tuirieni 'ateiterima mıtiwahetsiemietiniki.

²⁸ »Kepauka 'iki kwieyaritsie mihaakaxatini, kwiniya muxuaweni, mika'ukawiwiyeni, yatini kepauka waxa kwiniyayari mitaweni, yatini 'utsikari xika me'utixuawere, yatini memitatsi'aye'unie xeime takiekari warie xika mehatetikani, meta tsepa tita 'uximatiarika mitinua yatini kwiniya,

²⁹ xika kwitiwata mete'uka'eniwati yuxexuiti 'ixaheritsixi, yametehetimame ke'axamemite'uyuri, xika yumamate 'iki tuki hepa mehatatseraxiani, meyunenewieti meta waikawameki mematsiwawirieti,

³⁰ 'eki keniwaru'eni muyuawitsie paiti, hakewa pemeyeika, meta ketiniwareuyehıwiri. Yaketiniwarakapitia yuxexuiti kememite'uyuri, 'ekitsi pekatinimaika, 'eki xeikıa tewi 'iyarieya pekanimaika.

³¹ Mipai miki yunaiti 'eki mepimatsimakaxeni meta kepemiti'aita mepite'u'uwani mexi 'ena kwiepa me'u'uwani meripaiti ta'ukiyarima pemiwayetuiritsie.

³² »Yaxeikiata tewa kiekame 'ateiterima 'ixaheritsixi wahetsia mikamieme, peru metsihemarieti waikawa kepemitiyuriene meta 'atirikariya kepemiranakani'awa meta kepemititirikaiye, meyetia tewa paiti xeime kwieyaritsie. Kepauka miki tewa kiekame munuani meta muyutanenewieni 'ena 'iki tuki manuwe,

³³ 'eki keneu'eni muyuawitsie paiti, hakewa pemeyeika, yaketineupitia ketita mimatitawawirieni. Mipai yunaiti teiteri kwiepa memitama mepimatsihetimani meta, 'ateiterima 'ixaheritsixi wahepai, 'eki mepimatsimakaxeni meta mipai mepitehetimani kename 'iki tuki nemitawewita 'eki pehahiawariwa.

³⁴ »Kepauka pemiwarayewitini 'ateiterima memiwaraye'unie memiwakwiyuki, tsepaneti hakewa, xika nenewieri mematsipitiaka meta xika 'iki kiekari pemenayexei hepa mehataneniereni, tuki nemitawewi 'ahetsiemieme hepa,

³⁵ 'eki keneu'eni muyuawitsie paiti wanenewieri meta waikawameki kemematewawirie, hiki kememite'anuyehu wahetsie keneutanua.

³⁶ »Merikite xewiti tewi 'amika'uyeikaki 'axamiti'ane hetsiena mitiumawe, xika 'ateiterima 'axamete'uyurieni 'ahepaitsita, xika 'eki pewaruyehaka pewayetuan

miwaraye'unie hetsia miwaranuhapaniki
xeime kwieyaritsie, hetewakaku yatini
hehurakaku,

³⁷ xika xeime kwieyaritsie meheha-
panieme, memiwara'iwaxi wakwieyaritsie,
xika mete'uhayewa ke'axamemite'uyuri,
meta xika 'ahetsia me'u'axiani, xika 'ipai
mete'uyunenewieni: "Tame tahetsie pirahiwa,
'axatepitemite'uyuri, ke'axamiti'ane tepitekaki",

³⁸ meta memiwarehapa wakwieyaritsie paiti
xika 'ahetsia yu'iyariki meyuyetuanu meta ke-
memiteyumateki, xika nenewieri memetsiheyetui-
rieni meta kwie wa'ukiyarima pemipayetui
hepa xika mehataneniereni meta kiekari pe-
menayexei hepa meta tuki 'ahetsiemieme ne-
mitawewi hepa,

³⁹ 'eki wanenewieri meta waikawameki
kememimetewawirieka keneu'eni muyuawitsie
paiti, hakewa pemeyeika, hiki kememite'anuyehu
wahetsie keneutanua. Ketiniwareuyehiwiri
'ateiterima, 'axamemite'uyuri 'ahepaitsita.

⁴⁰ »Hikita, nekakaiyari mipai nepaine,
kenetaniereni meta ketemiteyunenewie 'ena
te'u'uwati ketane'enieka.

⁴¹ »Kenenua, Yawé Kakaiyari,
'ena kene'uxipieka,
'eki meta 'atiratu kakuniyari mitirikaiye.

Yawé Kakaiyari,
keniwarupitia 'amawari wewiwamete
'awikweitsitiarika memexeyaniki.
Yamemitekahu mekeyutemamawieka
'aixia pemitiuka'iyariki.

⁴² Yawé Kakaiyari,

pemenayexei pepika'uku'e'eiriwani.
Kena'eriwani kepemitinaki'eriekai Rawiri
ti'a'uximayatsiriwame».

7

Tuki kemitiyetuiya Kakaiyari hetsia
(2Kem 7:1-10 - 1Te 8:62-66)

¹ Kepauka Tsarumuni yunenewieti
mitiutahayewaxi, muyuawitsie tai kakanani
naime mawari taiyariyari meta hipame mawarite
kaniutixitsitiani, meta tukita Yawé xawatiriyaya
witsimi'ane kaniutahine.

² Yemeki tukita pihinekai Yawé xawatiriyaya
witsimi'ane, 'ayumieme mawari wewiwamete
mepikayiwawekai muwa memeutahaxiani.

³ Kepauka 'ixaheritsixi tai memuxei
waheima 'akaneikame meta Yawé
xawatiriyaya witsimi'ane tukita mihinekai,
mekaniukatunuma'uni, meta kwiepa paiti
metihixima'uti, Yawé hepaitsita 'aixia
mekaniutiyuani, mipai me'utiyuati: «Yawé 'aixia
pitiuka'iyari, naki'eriya hawaiki pikaheu'axe».

⁴ Hiki ti'aitame meta yunaiti teiteri mawarite
mekaniuwewieni Yawé hixie.

⁵ Ti'aitame Tsarumuni kaniwarutimawa
xeitewiyari heimana huta miriyari tuurutsixi
meta xeitsienituyari heimana xeitewiyari
miriyari muxatsi. Mipai ti'aitame meta yunaiti
teiteri tukita mekateniyetuani Yawé hetsiemieme
'ixiarari mekaniuwewieni.

⁶ Mawari wewiwamete ketita
memitehiritiariiekai yamepityuriekai. Rewitsixi
mepite'ukayuitiwakai kanarite ti'aitame Rawiri
mitiwewiekaitsie kimana Yawé miniawariekaki,

meta kimana mipai mitiukwikakai: «Naki'eriyaya hawaiki pikaheu'axe». Mawari wewiwamete kux-ineta mekaniutihitsiwakaitini rewitsixi wahixie, meta 'ixaheritsixi yunaiti 'amekaniti'ukaitini.

⁷ Metatsiere Tsarumuni takwa hixiapatsie mukuma patsiekame kanayeitiani, Yawé tukieya hixie mukuma, meta mana mawari taiyariyari kaniuwewieni meta wiya memuyuxewiniki mawariyari, mana mawari taiyame wurunitseki miwewiya Tsarumuni mitawewitsie pikatinakekai mawari taiyariyari mayani, wiya meta hatsite mawariyari.

⁸ 'Ana Tsarumuni meta yunaiti 'ixaheritsixi 'ixiarari mekaniuwewieni 'atahuta tukari. Memuyuxeiriekai yemeki mepiyumiirekai naitsarie mepayeixiakai, Rewu-Kamati mirakutewatsie meye'atikaiti 'atsita 'Ekipitu hatuxameyaritsie meye'atikaiti.

⁹ 'Atahairieka tukaritsie mekaniuyukuxeirieni, 'ixiarari memuwewiekaikiri 'atahuta tukari mawari taiyame patsieti mayeitiarieki, meta tawarita 'akuxi 'atahuta tukari 'ixiarari memiwewiekaiki.

¹⁰ Xeitewiyari heimana haika tukaritsie, 'atahuta metseriyaritsie, Tsarumuni teiteri kani-warutateutiani, meta miki mekanakunuaxiani yukiekaritetsie meyutemamawieti waikawa meta 'aixia 'iyari Yawé 'aixia mitiuyuriekaiki Rawiri, Tsarumuni meta yuteiterima 'ixaheritsixi wahetsiemieme.

*Kakaiyari tiratu Tsarumuni matia kemituuwewi
(2Kem 7:11-22 - 1Te 9:1-9)*

11 Kepauka Tsarumuni mini tuki Yawé hetsiemieme meta paratsiyu 'amupa, mipai piraye'atia naime kemitiku'eriwakai kemitiyurienikekai miki wahetsie.

12 Hiki Yawé kaniuyuhekiata hixiena tikariki, mipai katinitahiawe:

«'Anenewieri nepu'eni, meta 'iki tuki nepanayexei muwa mawari nemitimawiyariwaniki.

13 Kepauka nemireunani muyuawitsie mikakawiyeki, yatini 'utsikari nemitiwata'aitiani para kwiepa memitekakimeki, mexikatini kwiniya neheni'ani neteiterima wahetsia,

14 xika neteiterima, Yawé teiterimama memite'uteriwariwa, tixaiti xika mekatehayuyeitiani meta xika meyutanenewieni, meta xika menetsi'anukuwauni, mete'uhayewa ke'axamemiteyuriekai, ne muyuawitsie paiti nepiwa'enieni, nekatiniwareuyehiwiriemiki ke'axamemite'uyuri meta wakwie 'aixia nekaniyurimiki.

15 Ne nekanitanierkamiki, meta nekanita'enakamiki ke'aneti nenewieri 'ena miyetuiyani.

16 Hikiti meta yuheyemeki nekanenayexeiya meta patsiekame nekanayeitiamiki 'iki tuki mikita nemayekaniki. Nepita'iwiya nekatihayewati, neminaki'erieki ne'iyariki.

17 »'Ekita, xika 'ape'uyeikani nehixie mitikamiekai hepai 'a'ukiyari Rawiri, xika yapetikayani naimetsie kenemimatita'aitiani meta xika pe'eye'atiani ne'aitsikate meta ne'iniari niukiyari,

18 'ana ne yanepitiyurieni 'anuiwarima xeikia memite'aitaniki, tiratu kenemituuwewi 'a'ukiyari Rawiri hamatia mipai nerehiaweti: "Hatsuaku pikaheuyeweka 'anuiwaritsie miemeti'iti'aitani 'Ixaheri kwieyaritsie".

19 »Peru xika xeme xenetsi'uku'eirieni, xika yaxekatekakine ne'aitsikatetsie meta ne'iniari niukiyaritsie nemixeyetui, xika xenetsi'uku'eirieni hipame pita kakaiyarixi xemitewata'uximayatsirieniki meta xemiwarayexeianiki,

20 ne nepixe'akumaweriya kwie nemixeyetuiritsie meta 'iki tuki nepitixani'erieni patsiekame nemayeitia nehetsiemieme. Hiki 'ana 'atsieriawamete nepixe'ayeitiani yunaime teiteri wahetsiemieme.

21 Tsepa hiki 'iki tuki mīmariwe, paye'ani tukari kepauka yunaiti kemi'ane hixiena muyeyani pitimani, meta mipai katinita'iwaumiki: "¿Titayari Yawé miya tiwaruyuri 'iki teiteri meta 'iki tuki?"

22 Mipai pitita'eiyarieni: "Yawé memuku'eiriki, wa'ukiyarima wakakaiyari, 'Ekipitu miwarayewiti, hipame pita kakaiyarixi mepiwaranukuwei, mepiwarayexeiyakai meta mepitewa'uximayatsirieikai. 'Ayumieme Yawé 'uximatiarika waikawa pupitia wahetsie"».

8

Hipatita Tsarumuni 'uximayatsikaya (2Kem 8:1-18 - 1Te 9:10-28)

1 Ti'aitame Tsarumuni xetewiyari wiyari kani-uyurieni Yawé tukieya wewieneti meta yuparatsiyu.

2 Miyatiuyurieka, Hiramiki kiekarite miyetuiriekai 'aixia kaniutiyurieni meta 'ixaheritsixi kaniwayetuirieni.

3 Metatsiere Kamati kiekariyari kaniutamieni Tsuwa kwieyaritsie mukuma, hiki kaniwara'iwa.

4 Tamuxi kiekariyari 'aixia kaniuyurieni makumawetsie, meta 'aixia kaniutiyurieni naime ti'utamete Kamati mirakutewatsie mitiwewiekai.

5 Meta kiekarite kuraruyari 'amatitetewa 'aixia kaniutiyurieni Weti-Kuruni wapaiti mukuma meta Weti-Kuruni hetiana mukuma, kuraru kanatuani, 'itupari kaneuwitiani meta kimana mireunarimikeni.

6 Yaxeikia Warati kiekariyari 'aixia puyuri metatsiere naime hakewa memiteheuta'utaniekai meixeiyakai, meta kaxetate kuyaxa miemete hakewa meti'utani meta kawayutsiximama wahetsiemieme, meta naime tita mireuwewimikikai Kerutsareme pitutiwewi, meta Riwanu mirakutewatsie meta naitserie keyeumetsie miti'aitakai.

7-8 Nuiwarite teiteri memika'ixaheritsixi (tatsiari, hetitsixi, 'amuxeutsixi, peretseutsixi, heweutsixi meta kewutseutsixi, miki teiteri memuyuhayewaxi miki kwieyaritsie 'ixaheritsixi memikawarukwi), Tsarumuni wairiyarika wapitiatu katinwaruta'aitiani 'uximayatsika maheteki, hiki 'akuxi yaxeikia mekateniyurieka.

9 Peru Tsarumuni 'ixaheritsixi wairiyarika te'uximayatamete pikawarayeitia, matsi kuyaximama mepihikitikai, kuyaxi tewa'aitiwamete, kaxeta memuhapana tewa'aitiwamete meta kuyaxi kawayutsixi wahetsie memutei

tewa'aitiwamete.

¹⁰ Metatsiere ti'aitame Tsarumuni
piwarexeiyakai huta tsienituyari
heimana huta tewiyari heimana tama-
mata mira'uximayatsietsie te'aitamete,
te'uximayatamete memiwaxeiyakai.

¹¹ Parahuni nu'aya 'uka, Tsarumuni Rawiri kiekarienatsie peyewiti paratsiyu mitawewirita pi'atia, mipai 'utayika: «Rawiri 'Ixaheri kwieyaritsie ti'aitame paratsiyuyata ne'iya pikahayekani, kariki Yawé kakunieya hakewa mehupukai kani-patsieka».

¹² Mawari taiyame Yawé hetsiemieme mitawewiekatsie tuki hixie, mana Tsarumuni mawari taiyariyari kaniutiwewiwakaitini Yawé hetsiemieme

¹³ kemi'ane tukaritsie meuyewekai, Muitsexi kemitiwaruta'aitiakai: Xawatiki mieme, metseri mihekwa 'ixiarariyarsie, meta 'ixiarari mihaikatsie xeiwiyaritsie mieme, tatsiari, Paa mikakuxanariyarietika 'ixiarariyari, meta Tsemana 'ixiarariyari metatsiere Xamaru 'ixiarariyari.

¹⁴ 'Ukiyarieya Rawiri kemutayikai, mawari wewiwamete Tsarumuni mipai katini-waru'uitiani memiteta'uximayataki. Rewitsixi kaniwaruhiritiani kwikariki meminiawaniki meta mawari wewiwamete memiwaparewiekaki kememite'uximayakai tukariki. Meta kitenie tehiwemete kaniwaru'uitiani xexuime kitenietsie, Rawiri mipai mitiu'aitakaiki Kakaiyari hetsia mieme.

¹⁵ Ti'aitame kemitiu'aitakai mawari wewiwamete meta rewitsixi wahetsiemieme

yakatiniuyini, metatsiere piinite miraye'atika hetsiemieme.

¹⁶ Naiti Tsarumuni 'uximayatsikaya yakatiniuyini, kepauka paiti tuki tsutimeyari mukatsutiaritsie 'atsita kepauka memini me'iwewietiweti. Mipai Yawé tukieya 'aixia yemeki katiniunirieni.

¹⁷ 'Ariketa Tsarumuni petia 'Etsihuni-Kewexi mitiukutewatsie meta 'Erati, 'Erumi hatetsita-yaritsie.

¹⁸ Hirami, 'iparewiwametemama yame-tekahukaku, Tsarumuni nawiya 'amipapa kaneni'airieni meta yemeki haramara hepaitsita memite'akumate. Miki meta Tsarumuni parewiwametemama haramaratsie mekanekine 'Upixi paiti meneye'axiani, muwa mekaneyetini huru tamamata heima 'auxiwi miriyari (15.000) kiruyari, ti'aitame Tsarumuni mekaniyetuirieni.

9

*Ti'aitame 'uka Tsawa kiekame
kemireku'iwataxi
(2Kem 9:1-12 - 1Te 10:1-13)*

¹ Merikitsi ti'aitame 'uka Tsawa kiekame Tsarumuni kaniutamarieni kemitikuxaxatsiwakai, hiki ti'aitame 'uka kaneyani Kerutsareme paiti para mita'iniataki mukwaniwetikaki miti'iwawiyaki. Kaninuani yumireme yuteiterima warawititi, kameyutsiximama witsimitiu'atika mepite'itikikai meta huru waikawame metatsiere tetexi witsimi'anene. Kepauka Tsarumuni hetsia munua, miki naimeki katiniti'iwawiya kemitiku'eriwakai,

2 mikita katinitaxatiani naime ketitaki mititi'iwawiyaxi. Nitixaitiki pikatiu'iyiri Tsarumuni, tsepa kemitikwaniwetikatei.

3-4 Ti'aitame 'uka Tsawa kiekame kanihiyaxaitini 'ixeyati kemitimaiwekai Tsarumuni meta paratsiyuya mitawewi xeyati, mexayatsie 'ikwai mirapinirikekai, 'iparewiwamete wa'ipari, kemit'uximayatsiyariekai meta hetsiana te'uximayatamete wakemarite meta winu 'uitiwamete, meta mawari taiyariyari Yawé tukita mitiwewiwakai xeyati.

5 Hiki mipai ti'aitame katiniutahiawe: «Tita nemiretamari nekwieyaritsie paiti kepemituuyuri hepaitsita meta kepemitimaiwe, kaniyuritini.

6 Ne yuri nepikare'eriekai 'iki 'atsita nepeyetia, hikiri nehixiki nepunierixi. Matsi xiari 'etsiwa xeikia nepiremariekai waikawa kepemitimaiwe. Waikawa matsi pepirexeiya keyuri tita nemire'eni 'ahepaitsita.

7 Kemeteyutemamawie 'ateiterima. Kemeteyutemamawie memimete'uximayatsirie 'ahamatia yamemite'u'uwa me'i'enieti kepemitimaiwe.

8 Meta 'aixia kerahiawariwani Yawé 'akakaiyari, 'aixia 'anemeki mimatsi'uxei meta yu'uwenitsie mimatsihaye pemi'iniarieyatini hetsiena mieme peti'aitati. 'Ixaheritsixi wanaki'erieti, 'akakaiyari ti'aitame kamanayeitiani wahetsie pemitita'aitaki kehapai 'aixia mi'ane meta kemitihaitserie, miki yuheyemeki yuteiterima piwakamanikeyu».

9 Hiki ti'aitame 'uka, Tsarumuni katiniye-tuirieni 'imikieri haika miriyari heimana 'atanauka tsienituyari heimana haika tewiyari

(3.960) kiruyari huru, tetexi witsimi'anene, meta waikawa witsimitiu'iatika. Tawari hatsuaku pika'utixuawerixi waikawa witsimu'iatika ti'aitame 'uka Tsawa kiekame Tsarumuni mumi hepai paimeti.

¹⁰ Huru kememite'atia 'Upixi mieme Hirami teiterimama meta Tsarumuni teiterimama, mekani'atianita huku kiyeyari kwinnie miraye'axe meta tetexi witsimi'anene.

¹¹ Miki kiyeyariki, ti'aitame kanitiwewieni Yawé tukieyata mieme 'imimii 'amatayeyeu witsimi'anene meta paratsiyuta mieme, metatsiere haripa kaniutiwewieni meta kanarite teyuitiwamete wahetsiememe. Hatsuaku meripaiti mipai pikatiyiwekai Kura kwieyaritsie.

¹² Mikita ti'aitame Tsarumuni, katinimini naime tita ti'aitame 'uka Tsawa kiekame tiutihiwe'erieka mititawawiri, miki matsi waikawa piratia keyuri kepaimeme ti'aitame Tsarumuni mitiumikai. Hiki 'ariki, kanakunuani ti'aitame 'uka yukwiyari hetsie paiti yunaime memiparewie wahamatia.

Kemirexeiyakai meta kemitimariwakai Tsarumuni

(2Kem 9:13-28 - 1Te 10:14-29, 2Kem 1:14-17)

¹³ Tsarumuni xeiwiyari 'anuyeyeikakaku xeitewiyari heimana huta miriyari kiruyari huru pi'atiriyariwakai,

¹⁴ tetuayamete memiteyukutuaya ka'iniariti. Metatsiere 'Arawiya kwieyaritsie te'aitamete meta kuwexinaruritsixi 'Ixaheri kwieyaritsie memu'uitiariakai Tsarumuni hetsia mekaniyetu-ayakaitini huru meta pirata.

15 Hiki ti'aitame Tsarumuni kaniutiwewieni huta tsienituyari yuheima nunuwame 'apapame huruki wewiyatikai tsunarietikaime, xexuiti 'etsiwatikaku 'atahuta kiruyari huru kaniuyini.

16 Metatsiere kanitiwewieni haika tsienituyari yuheima nunuwame yaki yeyeume, yaxeikia huruki wewiyatikai tsunarietikaime, xexuiti haika kiruyari huru kaniuyini. Miki yuheima nunuwame ti'aitame yuparatsiyuta piti'utaxi «Riwanu Makukariuxaya» mititewata.

17 Metatsiere ti'aitame xeime 'uweni 'apame kaniutawewieni maripiriki tatsiari 'erepanite 'awateyaki, herie huru 'aixia mi'ane pikawiriyariekai.

18 'Uweni yuhetia peixeyakai 'imumii 'amatayewa 'ataxewimexia panukuhetei mana mutiyeikaniki, 'uweni hetsiena mawekai huruki puwewiyakai, pamamatikatei, xexuime mamateya 'aurie mayetsi yuxexuiti mepeuti'utikatei,

19 meta 'imumii 'amatayewatsie 'ataxewimexia manukuhetsie mepa'utikatei mayetsi tamamata heimana huta meyupaimeti, manukunenieretsie mepeuka'utikatei naitsata. Tawari xewiti pumawekai 'uweni naitsarie kwiepa Tsarumuni 'uwenieya hepai'aneti.

20 Naiti Tsarumuni tekixiteya meta naiti xakiriteya paratsiyutana mitiyepikai, «Riwanu Makukariuxaya» mititewata, miki naiti huru 'aixia mi'aneki pitiwewiyatikatei. Xewiti tima pirataki pikatiwewiyakai, 'ana Tsarumuni muyeikakaitsie pirata 'araye'akame pika'eriwakai.

21 Haika wiyari 'anuyeyeikakaku, ti'aitame Tsarumuni kanuwateya 'amupapa meixeyakai Hiramī te'iterimama memikuni'atiwekai, miki Taritsi kaneyekikakaitini huru 'utiti, pirata meta maripiri tatsiari 'erepanite 'awateya, hutseri memawiriwawe meta 'aruxi witsimemi'anene.

22 Ti'aitame Tsarumuni waikawa matsi pitimaiwekai meta waikawa matsi pīxikutikai keyuri hipati te'aitamete kwiepa memitamakai.

23 Yunaiti miki te'aitamete mekani'iwatatiwekaitini me'i'eniekuti kemitimaiwekai Kakaiyari 'ipitiaku,

24 xexuime wiyaritsie mekatēni'atīiriwakaitini 'imikieri: piinite huruki mitiwewiyatika meta pirataki, kemarite, 'ixiparate meta witsimitiu'iatika, kawayutsixi meta muratsixi.

25 Tsarumuni pexeyakai nauka miriyari kurarute kawayutsixi meta kaxetate kuyaxa miemete wahetsiemieme, meta puwarexeyakai tamamata heimana huta miriyari kawayutsixi miki pitiwamikwakai kuraruta meta yuparatsiyu 'aurie Kerutsareme paiti.

26 Tsarumuni ti'aitame naitsarie katiniwaruta'aitiani te'aitamete kemite'ukutetikatsie, 'Eupirate hatuxameyari manuyekatsie 'itsutiati 'atsita piritsiteu kwieyaritsie meta 'Ekipitu kwieyari maka'atikatsie paiti.

27 Kerutsareme kiekariyaritsie ti'aitame pirata waikawa pexeyakai tetexi hepai katinixeyakaitini, meta kariuxa kiyeyari waikawa pexeyakai piní makuweri mieme hepai.

28 Kawayutsiximama 'Ekipitu kwieyaritsie mepinanaiyakatetikai meta hipame kwieyaritsie.

Tsarumuni kemitiuni
(2Kem 9:29-31 - 1Te 11:41-43)

²⁹ Hipatita kemitiuiyi Tsarumuni ti'aitakaku, kepauka paititi mitsutia meta kepauka mitiutahayewaxi, miki katinaka'utiarieni kemitiuiyi xapayaritsie Natani Kakaiyari niukameya kemiraka'utia, meta kemitiyini xapayaritsie 'Ahiyaxi Tsiyu kiekame kemiraka'utia, meta kemitiunierixi xapayaritsie 'Iruhu miniere kemitiyini kemiraka'utia Keruwuhani Nawati nu'aya hepaitsita mieme.

³⁰ Tsarumuni huta tewiyari wiyari Kerutsareme 'ukaiti katiniuta'aita naitsarie 'Ixaheri kwieyaritsie.

³¹ Kepauka mumi, kaniukateukieni 'ukiyarieyatikai Rawiri kiekariena, hiki nu'aya Xuwuhani kanitsutiani ti'aitati 'utimana.

10

'Ixaheri kwieyaritsie te'aitamete kemiteyutihutarixi

(2Kem 10:1-11 - 1Te 12:1-24)

¹ Hiki Xuwuhani kaneyani Tsikeni paiti, mana yunaiti 'ixaheritsixi memeyuxeiriekai ki ti'aitame memeyetianiki.

² Hiki miki hepaitsita Keruwuhani Nawati nu'aya katiniutamarieni, 'ayumieme 'Ekipitu kanakunuani, mana kaneyakaitini meripaiti ti'aitame Tsarumuni 'ayemakati.

³ Kepauka 'ixaheritsixi kimana memite'utani'a mi'atiarie, hiki miki meta yunaiti 'ixaheritsixi mekanekine Xuwuhani hetsia mipai mekateni-tahiawe:

⁴ —'Apaapa kwinimieme raheteme yuku pitatsi'utititia teka'ikemakame. Hikiri 'eki ha'exanime ketaneutititia te'ikemakame, keyuri 'apaapa mitatsi'utititia, hiki 'ana tepimateta'uximayatsirieni.

⁵ Xuwuhani mipai katiniwarutahiawe:

—Xekeneuhuni hiki, peru xekenayenexia haika tukari 'anukayayu.

Hiki kepauka teiteri memeki,

⁶ ti'aitame Xuwuhani kaniwaruta'iwawiya 'ukirawetsixi paapaya Tsarumuni mayeyurikaitsie memiparewiekai. Mipai katiniwaruta'iwawiya:

—¿Kexehaitika xeme, kenetiwata'eiya 'iki teiteri?

⁷ Miki mipai mekaniutiuyani:

—Xika 'eki ti'aitame 'aixia petiuka'iyarikamiki 'iki teiteri wahetsiemieme, xika kemitiwanake pewaru'enieni, xika pewaruta'eiya pewanaki'erieti, miki mepimateta'uximayatsirieni yuheyemeki.

⁸ Peru Xuwuhani 'ukirawetsixi wa'ixatsi pika'anu'eni kememite'itahiawixi, matsi temari pitata kaniwaruta'iwawiya hamatiana memutiwawerixi meta 'anari memiparewiekai.

⁹ Mipai katiniwaruta'iwawiya:

—¿Kexehaitika xeme, kenetiwata'eiya 'iki teiteri mipai meminetekihawe: “Ha'exanime kenayeitia 'apaapa kwinimieme raheteme yuku pitatsi'utititia teka'ikemakame”?

¹⁰ Miki temari, hamatiana memutiwawerixi, mipai mekatenita'eiya:

—Teiteri 'ipai memimetehahiawe ti'aitame: “Apaapa kwinimieme raheteme yuku pitatsi'utititia, 'ekiri ha'exanime kenayeitia”. Neuxei, 'ipai ketiniwaruta'eiya: “Ne ne'itiwame

'etsimupe matsi 'akanipani keyuri nepaapa kemanupakai, xika nepaapa waikawa tixe'uta'uximayatsitiani, ne matsi tawari waikawa nepitixeta'uximayatsitiani.

¹¹ Xika miki yuku haheteme xe'anutitekirieni, neta matsi waikawa nepixeti'ikatiani. Xika miki xetiwayakaitini kiyeki, ne kawayut-sixi wawayameki tepia manuyatsatikaki nepixetiwani”.

¹² Merikite hairieka tukari 'aye'aku, kemutayikai ti'aitame Xuwuhani, hixiena Keruwuhani kaninuani yunaime teiteri wahamatia.

¹³ Peru ti'aitame Xuwuhani kaniwaruta'eiya tiyukananaimakameki: 'ukirawetsixi wa'ixatsi pika'anueni,

¹⁴ matsi temari wa'ixatsi pita kaniu'enieni. Mipai katiniwarutahiawe: «Xika ne'ukiyari yuku haheteme xe'utititiani, neta matsi waikawa nepixeti'ikatiani. Xika miki xetiwayakaitini kiyeki, ne kawayatsixi wawayameki tepia manuyatsatikaki nepixetiwani».

¹⁵ Ti'aitame teiteri mikawaru'eniki, mipai pituuyi Kakaiyari yahainekaku. Mipai piraye'atiarie Yawé niukieya Keruwuhani Nawati nu'aya kemitiutahiawekai, Kakaiyari niukameya 'Ahiyaxi Tsiro kiekame Keruwuhani yapitiutahiawekai.

¹⁶ Kepauka memitehetima kename ti'aitame 'ari kawaru'eni, yunaiti 'ixaheritsixi mipai mekatenuhiwakaitini meyuxewiti:

«'Ixaheritsixi teiteriyari, yunaiti yukie xekeneutayeixia.

'Ekita, Rawiri, 'ahetsia miemete xeikia keni-warayexeyani.

Tameri Rawiri hetsia tixaiti tepikatehayexeya.

Tixaitikuta pikatatiyetuirieni 'Itsahi nu'aya».

Hiki mekaneutayeixiani, yuxexuiti yukie.

¹⁷ Peru miyatiti, Xuwuhani piyeweiyakai ti'aitati 'ixaheritsixi wahetsie Kura kiekariteyaritsie memutetikatei.

¹⁸ Hiki 'arikeke, ti'aitame Xuwuhani 'Arunirani kaneni'ani wairiyarika memite'uximaya mihiritiariekai minierimieki, peru yunaiti 'ixaheritsixi tetexiki mekaneitituaxixiani mekanimieni. Hiki mexiwa ti'aitame 'anutiyerika yukaxetatsie kaneyu'una Kerutsareme paiti.

¹⁹ Hiki mipai tiuyiku 'anatiti 'ixaheritsixi Rawiri nuiwarimama mepuwaruku'eiri, hiki yaxeikia mepi'ane.

11

¹ Xuwuhani Kerutsareme nuaka kani-warukuxeirieni Kura nuiwarimama meta Wenikamini, xeitsienituyari heimana nauka tewiyari miriyari (180.000) kuyaxi mekanakine yunaiti, miwatakwiniki 'ixaheritsixi hiki mipai tiyurieme yunaime wahetsie mitita'aitaki.

² Peru Yawé niukieya kaninuani Tsemahiyaxi hetsia, miki tewi Kakaiyari payexeyiakai, mipai 'aneme niuki kaniupitarieni:

³ «Mipai ketineutahiawi Xuwuhani Tsarumuni nu'aya miti'aitame Kura kwieyaritsie, meta yunaime 'ixaheritsixi Kura kwieyaritsie memititei meta Wenikamini,

4 mipai kanaineni Yawé: “Hawaiki xepikawakwitiweni yu'iwama 'ixaheritsixi. Yuxexuiti yukie xekeneutayeixia, kariki ne yanehainekaku miyakatiniuyini”». Hiki miki mekanenu'enieni Yawé niukieya meta mekatenuhayewa Keruwuhani metamienike.

Xuwuhani Kura kiekariyarite 'aixia kaniutiyurieni

5 Merikite Xuwuhani Kerutsareme kaniuyuhayewa, hiki kiekarite Kura mieme 'iki 'aixia kaniutiyurieni:

6 Wereni, 'Etami, Tekuha,

7 Wetsuxi, Tsuku, 'Arurani,

8 Kahati, Maretsa, Tsipi,

9 'Arurahini, Rakixi, 'Atseka,

10 Tsura, 'Ayaruni meta Hewuruni. 'Iki kiekarite 'aixia muti'itiarie kanimiemetikaitini Kura kwieyaritsie meta Wenikamini kwieyaritsie.

11 Xuwuhani kuyaxi tewa'aitiwamete kaniwaru'uitiani, kiekarite kuraruyari 'amatititi tawari 'akanetitiriya, meta mana 'ikwaite katiniuti'uta, hatseiti meta winu,

12 meta katiniyetuani yuheima nunuwamete meta pitsikate. Mipai naimie kiekarite 'aixia kaniukuyurieni, hiki Kura meta Wenikamini kwieyaritetsie ti'aitati kanayani.

Rewitsixi meta mawari wewimamete Xuwuhani mekaniuparewieni

13 Naitsarie kiekatari 'Ixaheri kwieyaritsie mekaniu'axiani mawari wewiwamete meta rewitsixi para Xuwuhani memitininiki.

14 Rewitsixi yukwie mekaniuku'eirieni memitehatihiwetsie meta hipame yupiinitiarika

Kura kwieyaritsie pita memiyehuki meta Kerutsareme, Keruwuhani meta niwemama Yawé memayexeiyani memikawapitiakaiki.

¹⁵ Wahetsiemieme, Keruwuhani kaniwarutihawe yuhetsiemieme mawari wewiwamete tukiteta kakaiyarixi memitewamawiriekaki, tsipuri wa'ikiyari memiwarayexeiyani meta tsikerutsixi muwaruti'aitakai memitiwewiyaniki.

¹⁶ Rewitsixi wa'utima mekanekine teiteri yunaiti 'Ixaheri nuiwarimama wahetsiemiemete yu'iyariki Yawé memikuwautiwekai, 'Ixaheri Kakaiyarieya. Kerutsareme mekanieu'axiani Yawé mawari memiwewirieniki, yu'ukiyarima wakakaiyari.

¹⁷ Miki memu'axiaki kaniutatirikaxiani Kura kwieyaritsie ti'aitame, meta Xuwuhani Tsarumuni nu'aya mekanuparewieni haika wiyari metatsiere Rawiri meta nu'aya Tsarumuni mekaniwaranukuweiya heitserie kememite'u'uwakai.

Xuwuhani 'iitamama meta niwemama

¹⁸ Xuwuhani kaniutiwitini Makarati Kerimuti nu'aya, Rawiri nu'aya meta 'Awikahiri, 'Eriyáwi niweya meta 'Itsahi teukarieya.

¹⁹ Mikitsie tiri miwarayexei mekanihikitini Kehutsi, Tsemariyaxi meta Tsakani.

²⁰ 'Ariketa Mahaka kaniutiwitini 'Awitsaruni niweya. Mikitsieta kaniwarayexeiya 'Awiya, 'Atahi, Tsitsa meta Tserumiti.

²¹ Xuwuhani Mahaka waikawa kani-naki'eriekaitini 'Awitsaruni niweya keyuri hipame yu'iitama meta te'uximayatametemama 'iitamamatiti. 'iitamama yunaiti mepiyupaimekai tamamata heimana 'atahaika meta haika tewiyari

mepiyupaimekai te'uximayatametemama
'iitamamatiti, meta yuniwema puwarayexei
xeitewiyari heimana 'atahaika 'ukitsi meta haika
tewiyari 'ukari.

²² Xuwuhani 'Awiya kananukakeni yu'iwama
mitiwa'aitiakaki Mahaka nu'aya, ti'aitame
payanikekai mipai pitiku'eriyakai.

²³ Hiki timaiweme payueitia, hipame
yuniwema waikawa pitwayetuiri piinitarika,
meta waikawa 'ukari puwakuniukiri wa'itama
memakine, hiki Kura kwieyaritsie naitsarie
kaniwareutani'axiani meta Wenikamini
kwieyaritsie, metatsiere naime kiekari yukuraru
'amatititi mexeiyatikatsie.

12

*Tsitsaki Kerutsareme kiekariyaritsie
kemireutaha*

(2Kem 12:9-16 - 1Te 14:21, 25-31)

¹ Hiki kepauka Xuwuhani tirikaiyeti matia meta
yu'iyariki ti'aitati matia, miki meta yunaiti 'ixaher-
itsixi Yawé 'aitsikateya mekaniuku'eirieni,

² meta kemitinake yamepikatekaki. 'Ayumieme
'auxiwirieka wiyari ti'aitakaku Xuwuhani, Tsit-
saki 'Ekipitu kwieyaritsie ti'aitame, Kerutsareme
kaniutamieni.

³ Xeimiriyari heimana huta tsienituyari
kaxetate kuyaxa miemete mewarahapati,
haika tewiyari miriyari kawayutsixi wahetsie
memutei meta mekayu'iniatsiniati kuyaxi
riwiyuysixi, tsukienutsixi meta 'etiupetsixi
'Ekipitu kwieyaritsie memanexiakai,

4 Tsitsaki kiekarite yukuraru 'amatititi mexeyatikatsie kaneutahani Kura kwieyaritsie miemetetsie meta Kerutsareme paiti kaninuani.

5 Hiki Xuwuhani hixie kaniutakeni Kakaiyari niukameya Tsemahiyaxi meta Kura kwieyaritsie kiekatari wa'ukiyarima wahixie Tsitsaki memakati Kerutsareme memiyuxeirikai. Mipai katiniwarutahiawe:

—Yawé mipai kanaineni: “Xeme xeminetsi'uku'eiriki, neta hiki nekanix-eku'eirimiki, para Tsitsaki mixekwiniki”.

6 'Ixaheritsixi wa'ukiyarima meta ti'aitame yunaiti tixaiti mekatehayuyeitiaka, mipai mekaniutiyuani:

—Yawé heitseriemeki yamitikamie pihiki.

7 Kepauka Yawé muwaruxei tixaiti mekate'ayuyeitiakame, tawarita Tsemahiyaxi mipai katiniutahiawe: «Tixaiti mepikate'ayuyeitia, 'ayumieme nepikawaka'una, yapaimexia tukari 'anukayayu nepiwaxina. Tsitsaki nepikapitiani Kerutsareme mika'unaki,

8 peru nepipitiani mitixeta'aitianiki, xemitehetimamateniki kehapai mi'ane neti'uximayatsirieti kehapaia mi'ane te'aitamete tiwa'uximayatsirieti hipame kwieyaritsie miemete».

9 Tsitsaki 'Ekipitu kwieyaritsie ti'aitame, Kerutsareme kaniutamieni, hiki katinetini piinite miraye'atika Yawé tukieyata timieme meta paratsiyu 'amupata timieme. Naime katinetini, metatsiere yuhetsie nunuwame huruki miwewiyatikatei Tsarumuni miti'aitakai.

10 Hiki miki hetsiemieme, ti'aitame Xuwuhani kaniti'aita hepaina 'aneneme peru wurunitse tepiayariki wewiyatikame, hiki kaniwaruhiritiani kuyaxi wa'ukiyarima paratsiyu 'amupa kitenieyaritsie memitehikai.

11 Kepauka ti'aitame meta'axekai Yawé tukita, kuyaximama mekaneiteitakaitini me'i'iti yuhetsie nunuwame, kepaukata memakununuwakai kitenie tehewemete wakiita mepitixiriwakai.

12 Xuwuhani tixaŋti mikarayuyeitiaki, meta Kura kwieyaritsie 'akuxi tixaŋti 'aixia ti'aneti mitiyuhayewanekaiki, Yawé ha'ati pitihayewaxi hepaŋsitana, hiki 'ayumieme yemeki pika'ika'unaxi,

13 Ti'aitame Xuwuhani tirikaŋyeti kanayani, hiki pitsutia tawari Kerutsareme ti'aitati. Maamaya Nuhamapititewakai 'amuni tewiyari pihikitikai.

Xuwuhani huta tewiyari heimana xewi wiyari pexeiyakai kepauka mitsutia ti'aitati, tamamata heimana 'atahuta wiyari katiniuta'aita Kerutsareme kiekariyaritsie, Yawé miki kiekari manayexeiyakaitsie yunaime 'Ixaheri xiiyarimama watsata para mana mitayeriniki.

14 Peru Xuwuhani 'axatiyurieneti xeikia patia, hatsuaku yu'iyariki Yawé pika'anukuwau.

15 Kemiŋtiuyi Xuwuhani ti'aitakaku, mitiukatsutiatsie 'atsita kepauka mitiutahayewaxi, meta yakememiteyukwitiwekai Keruwuhani matia, katinaka'utiarieni kemiŋtiuyi xapayaritsie Kakaŋyari niukameya Tsemahiyaxi xapayatsie meta tewi mitixeiya 'Iru xapayatsie.

16 Kepauka mumi Xuwuhani, kaniukateukieni

Rawiri kiekariena. Hiki nu'aya 'Awiya xi kanit-sutiani 'utimana ti'aitati.

13

Kuratsie ti'aitame 'Awiya xi

(2Kem 13:1-2, 22, 14:1 - 1Te 15:1-2, 6-8)

¹ Merikitsi tamamata heimana 'atahaika wi-yari ti'aitakaku Keruwuhani, 'Awiya xi ti'aitame kanayani Kura kwieyaritsie,

² hiki Kerutsareme 'ukaiti katiniuta'aita haika wiyari. Maamaya Mikahiyaxi pititewakai, 'Uri-heri Kiweya kiekame punu'ayatikai.

Mikita mepiyutikwi 'Awiya xi matia Keruwuhani.

³ Hiki memiyukwiyuki, 'Awiya xi nauka tsienituyari miriyari yukuyaxima kaniwaranayexeiya, yemeki memeuyutakwiwawe. Keruwuhani metatsiere 'atahaika tsienituyari miriyari kaniwaranayexeiya yukuyaxima, hiki 'aixia mekatenuyu'uitiani memiwatakwiniki.

⁴ Hiki 'Epirahini muhiriyatsie, Tsemarahini yemuriyaritsie 'Awiya xi 'anutiyaka, mipai katiniuhiwa: «Keruwuhani. 'Ixaheritsixi. Yunaiti xeme xekeneneu'eni.

⁵ Xepitemate Yawé 'Ixaheri kakaiyarieya, Rawiri piyetuiri 'Ixaheri kwieyaritsie miti'aitaniki meta nuiwarimama tiratu puwewi 'atsikayiweme.

⁶ Peru, Nawati nu'aya Keruwuhani, Tsarumuni Rawiri nu'aya ti'uximayatsiriwame, kaniku'eirieni 'eye'unieti kanayani tiyu'aitiwame.

⁷ Hipati teiteri 'axamete'u'iyariti Xuwuhani Tsarumuni nu'aya mekaniutinini, kepauka

'iki mitemaikitikai meta mikatirikaiyekai, miki mepika'ipitia, pika'uyiwekaxia miwara'iwa.

⁸ »Xeme mipai xeteku'eriwa hiki, xemiyumiireki meta tsikerutsixi huruki memiwewiyatika xemiwarexeiyaki, kakaiyarixi memiwewiyatika Keruwuhani mixe'utiwewiri xehe'iwake xeteyu'erie Yawé mira'aita, muwayetuiiri Rawiri niwemama.

⁹ Metsi xekaniwarayeweiya 'Aruni nuiwarimama, Yawé mawari wewiwame-temama memihiki, meta rewitsixi. Miki wahetsiemieme hipame mawari wewiwamete xekaniwarutihawe, tsepa ke'aneti muwa'atia xeime tsikeru meta 'atahuta muxatsi 'ukitsi miki xekaniwarayeitiwani mawari wewiwamete memikayuri kakaiyarixi wahetsiemieme, teiteri Kakaiyari memikamate wahepai xepiteyurie.

¹⁰ »Tame 'apita, Yawé tepikaku'eiriwawe, miki mitakakaiyariki. 'Aruni nuiwarimama yaxeikia tamawari wewiwamete mepihiki Yawé memite'uximayatsirie meta rewitsixi mepihiritiarie memiwaparewiekaki tukita.

¹¹ Tukari miyehane, ximeri meta taikai, Yawé mepitemawirie mawari taiyariyari meta 'ikwa witsimu'ia mekanitairieka, metatsiere, yareuhanemeki taikai paa mipatsie mepemaniriwa huru mexayaritsie, meta kixeme mepetitaiya 'i'uitiwame huruki miwewiya hetsie muye'u. Tame hirixia Yawé takakaiyari tepayexeiya, xeme xemiku'eiri.

¹² 'Ayumieme Kakaiyari meta mawari wewiwametemama, tahixie mekananuyeteni. Kuxinetate kaniha'aritsieka mitihitsierieniki kepauka temixetakwini. 'Ixaheritsixi, Yawé

xepikamietiweni, xe'ukiyarima wakakaiyari, xeme xepikayiwawe xeme'iwa».

¹³ Keruwuhani 'Awiya xi mikatimaritianiki, hipame yukuyaxima kuyaxi Kura miemete wa'utima kaniwarutani'ani, hipameta wahixie pita kaniwarutani'ani.

¹⁴ Kepauka memanakunenierixi Kura kiekatari, mekaniwaruxeiya 'ixaheritsixi mewakwitiweme wa'utia memeu'ukai. Hiki 'ana Yawé mekani-utahiawe, meta mawari wewiwamete kuxineta mekaniutihitsieni.

¹⁵ Hiki kepauka Kura kiekatari karima memutihiwaxi memuyutakwiniki, 'ana Kakaiyari Keruwuhani kana'iwa meta 'ixaheritsixi, 'Awiya xi pita kaniupitiani mirayu'iwak meta Kuratsie kiekatari.

¹⁶ 'Ixaheritsixi mekaniyu'unakukaitini, peru Kakaiyari kaniwayetuan Kuratsie kiekatari memiwakwiniki.

¹⁷ 'Awiya xi meta kuyaximama yuwaikawame mepiwareuyehia, mekaniwarukwini 'auxiwime tsienituyari miriyari 'ixaheritsixi kuyaxiyari 'aixia memi'anene.

¹⁸ 'Ana tukaritsie 'ixaheritsixi mekana'iwarieni, Kuratsie kiekatari mepite'ayu'iwaxi Yawé yu'ukiyarima wakakaiyari hetsie memitewiyakaiki.

¹⁹ 'Awiya xi meta kuyaximama mekani-waranukuweiya Keruwuhani kuyaximama, hiki kaninawairieni kiekarite Weteri, Ketsana meta 'Epirahini kiekariyari meta 'auriena mamametika.

²⁰ Keruwuhani tirikaiyeme mayuyeitiani pikayiwakai kepauka 'Awiya xi miti'aitametikai. 'Imatirieka Keruwuhani Yawé 'iwaku kaniumini.

²¹ 'Apita 'Awiyaŋi matsi waikawa tirikaŋyeti kanayani. Yu'itama tamamata heimana nauka kaniwarexeiyakaitini, niwemama 'ukitsi xeitewiyari heimana huta mepuyupaimekai meta niwemama 'ukari tamamata heimana 'ataxewi mepuyupaimekai.

²² Hipatita kemituuyi 'Awiyaŋi ti'aitakaku, meta kemituuyeikakai meta 'uximayatsikaya, katinaka'uka Kakaŋyari niukameya 'Iru xapayatsie.

14

¹ 'Awiyaŋi kaniumini, hiki kaniukateukieni Rawiri kiekariena, hiki nu'aya 'Atsa kanitsutiani yupaapa 'utima ti'aitati. Kepauka miki miti'aitakai, miki kwieyaritsie kayuwati pumakai tamamata wiyari.

*'Atsa Kuratsie miti'aitametikai
(2Kem 14:2-3 - 1Te 15:11-12)*

² 'Atsa yapitiuyuri kehapai 'aixia mi'ane meta kemitinake Yawe yukakaŋyari.

³ Miki kaniti'una mawari taiyame meta kakaŋyarixi watukite, tetexi mipatsietika kaniutitara meta kaneti'unaxiani kiyexi 'Atsera kakaŋyariyari 'ikiyarite.

⁴ Metatsiere, mipai katiniwaruta'aitiani Kuratsie memititekai Yawe hetsia meke'u'axianike, yu'ukiyarima wakakaŋyari hetsia, meta 'aitsikateyatsie meta 'iniari niukiyaritsie yamemitekahuniki.

⁵ Mipai 'Atsa katinikumaweriya tukite meta 'ikwa taiyamete kakaŋyarixi wahetsiememete naitsarie kiekaritsie meuxuawekai Kura

kwieyaritsie, hiki miki kepauka miti'aitakaitsie kayuwati mepexeyakai.

6 'Atsá Kura kwieyaritsie kanitiwewieni kiekarite kuraruyari 'amatititi, merikite miki wiyaritsie Yawé kanipitiani kayuwati mumakaki mira'aita, hiki Kura kwieyaritsie kiekatari kayuwati mehexeyati mekanu'uwakaitini, pikayumienekai nixeime matia.

7 'Atsá Kuratsie kiekatari mipai katini-warutahiawe: «Miki kiekarite tawari 'aixia tepitiyurieni, meta waritana tepewewietikine kuraru 'amatayewa tuxiyu hexeyatikaima, kitenie hexeyatikaima meta reunarimikeme. 'Iki kwie 'akuxi pititapini, Yawé takakaiyari temanukuwauki, tame temenukuwauki, miki kataniupitiani kayuwati temexeyaniki ta'aurie kiekatari wahamatia». Hiki yapitiuyunakixi kepauka tawari kiekarite 'aixia memutiyuri.

8 'Atsá Kura kwieyaritsie kuyaxi piwarexeyakai haika tsienituyari miriyari meyupaimeme, miki pitsika mepi'ikai meta yuhetsie nunuwame 'ayeyeume, meta Wenikamini nuiwariyari hetsiemiemete huta tsienituyari heimana nauka tewiyari miriyari, miki tupi mepi'ikai meta yuhetsie nunuwame 'etsimiyeyeu. Miki yunaiti mepihikitikai kuyaxi memeuyutakwiwawe memitirikawi.

9 Hiki 'etiupe tewiyari Tsera kaninuani waraye'unieti warawititi xeimiyuniyari kuyaxi meta haika tsienituyari kaxetate kuyaxa miemete warahapati, hiki kaninuani Maretsa mirakutewatsie paiti.

10 Ti'aitame 'Atsá kanayeyani para menukuna-
nakeki mayeweritsie Tsepata mirayetewatsie, hiki
mana 'aixia mekateniuyu'uitiani Maretsa 'ehu-
rakaku.

11 'Atsá mana Yawé yukakaiyari kaniutahiawe,
mipai katinitahiawe: «Yawé, 'eki xeikia pepiyiwe
kemi'ane mikatirikaiye pemuparewieni meta
mitirikaiye. Yawé takakaiyari ketaneuparewi,
tame 'ahetsie tepitewiya, meta 'aixia
temetetahiaweke tepeyeki 'iki memiyumiire
tewatakwinike. 'Eki Yawé, takakaiyari
pekanihikitini. Pepika'ipitiaka tewititi
mimatsi'a'iwani».

12 Kepauka 'etiupetsixi 'Atsá meta Kuratsie
kiekatari memiwarutakwi Yawé kaniwara'iwa.
'Ana 'etiupetsixi mekaniyuta'una,

13 peru 'Atsá meta kuyaximama mekani-
waranukuweiya Keraxi mirakutewatsie paiti.
Mana 'etiupetsixi mekaniukaxiriyani, nixewiti
'ayeniereti pika'uyuhayewaxi, Yawé meta
kuyaximama memiwarukwiki. Kuratsie kiekatari
waikawa piinite mekatenetini,

14 yaxeikiata mekaniwarutakwini Keraxi
'aurie mamanetikatei kiekarite, miki waikawa
mekanimamakaitini Yawé hixie, hiki
mekateniwarunawatsirieni, piinite waikawa
memitehexeiyakaiki mana.

15 Metatsiere, tehewemete המתיטים
mekanitahaxiani, tewaxi yuwaikawa
memaxuawatsie, hiki mekaniware'arieni
yuwaikawame muxatsi meta kameyutsixi. Hiki
'anake Kerutsareme mekanakunuaxiani.

15

*'Atsá kemituu'aitaxi 'aixia miti'aneniki
(2Kem 15:16-19 - 1Te 15:13-16)*

¹ Merikitsi 'Iyari Kakaiyari hetsia mieme 'Atsariyaxi 'Ureru nu'aya hetsie kaninuani,

² hiki miki kaneyani 'Atsá manukunakeki, 'itaxeiyaka mipai katinitahiawe: «'Atsá, meta Kuratsie kiekatari meta Wenikamini nuiwarimama, xekeneneu'eni. Xehamatia Yawé kaniuyeikamiki, peru xika xeme hamatiana xe'u'uwani. Xika xeme xe'enukuwauni, miki xemitaxeiyaki kanixepitiamiki, peru xika xe'iku'eirieni, mikita kanixeku'eirimiki.

³ Miixa wiyari panuyetia 'ixaheritsixi yuri Kakaiyari mekahayexeiyati meta xewiti pikatiwakuxaxatiwakai, mawari wewiwamete mitiwata'ikitiani pumawekai yaxeikiata nixeime 'iniari niukiyari mepika'aye'atiakai.

⁴ Peru kepauka mete'uka'eniwati Yawé 'ixaheritsixi yukakaiyari hetsia memu'axia, meta kepauka memenukuwau, miki kaniwarupitiani memitaxeiyaki.

⁵ Miki tukaritsie kikamete wahet-siemieme pikati'aixia'iyaritikai nixewiti pika'utawikwewekai, matsi naitsarie kwie mumanetikatsie teiteri mepite'uka'eniwakai waikawa.

⁶ Nuiwarite meta kiekarite mepuyukwitiwewekai, Kakaiyari mitiwakwinitikaiki waikawa 'uximatariakaki.

⁷ Peru xeme, heitserie xekeneti'uka xekatehayewati kuya tihweme hepai, mipai xete'uximayati yu'iwarika xekatenipitiariekuni».

8 Kepauka 'Atsá miki niuki mu'eni Kakaiyari niukameya 'Atsariyaxi 'Ureru nu'aya mitaxataxi, kaniyuwariya muwakumaweriyaki kakaiyarixi memiwewiyatika 'axamemi'anene naitsarie Kura kwieyaritsie meta Wenikamini kwieyaritsie, meta kiekarite ma'iwakaitsie 'Epirahini muhəriyatsie. Metatsiere, mawari taiyame Yawé hetsiemieme 'aixia kaniuyurieni Yawé tukieya hixie takwa muwekai.

9 'Ariketa kaniwaruta'inieni Kuratsie kiekatari meta Wenikamini kwieyaritsie kiekatari, metatsiere 'Epirahini nuiwarimama, Manatsexi meta Tsimehuni nuiwarimama wahamatia memititekai, yuwaikawatiri 'ixaheritsixi 'Atsá mekaniutinikaitini, meneniereti Yawé Kakaiyarieya hamatiana muyeikakaiki.

10 Hiki 'Atsá haika metseri 'umiekaku tamamata heimana 'auxiwi wiyari ti'aitakaku, mekaniuyukuxerieni Kerutsareme kiekariyaritsie.

11 Miki tukaritsie Yawé mekaniutimawirieni 'atahuta tsienituyari tuurutsixi meta 'atahuta miriyari muxatsi memiwareyehapa memeyukukwitsie miemete.

12 Hiki tiratu mekaniuwewieni, mipai mekaniutiyuani meyhiritiati kename naimeki yu'iyariki meta kememiteyumateki me'itiwauni Yawé, yu'ukiyarima wakakaiyari.

13 Kemi'ane Yawé mika'anukuwauni, 'ixaheritsixi wakakaiyari, miki kanimieriemiki, tsepa 'amuyumate yati 'etsimuyumate, tsepa miti'uki yati miti'uka.

14 Mipai mekaniutiyuani meyhiritiati Yawé hixie, karima me'utihiwati meta kuxineta me'utihitsiwati metatsiere 'awate.

15 Yunaiti Kuratsie kiekatari
mekaniyutemamawiekaitini miya
memite'uyuhiritiakaiki, naimeki yu'iyariki
memite'uyuriekaiki meta Yawé memanukuwauki
yuri meyiati, meta miki muyuwairiki
memitaxeiyaki, mikita muwarupitiakaiki
kayuwati memu'uaniki nuiwarite wa'aurie
kiekatari wahamatia.

16 Metatsiere, ti'aitame 'Atsá yukutsi Mahaka
kemi'ti'aitametikai kanita'imaiya, miki 'Atserá
'uka kakaiyariyari mutawewiekaiki 'axa'aneme.
'Atsá 'ikiyari kaniutatara, tumuanari kaneyeitiani
meta kanitataiya Kiruni 'akiyaritsie paiti.

17 Tsepa 'Atsá 'Ixaheri kwieyaritsie kakaiyarixi
watuki mika'uti'unaxi, 'aixia pitiuyeikakai
yuheyemeki Yawé hetsiemieme,

18 meta Kakaiyari tukita huru meta pirata
kani'atiani metatsiere piinite yupaapa matia
memiteyetuakai mitipatsiekaki.

19 Meta pikatiyukwinekai xetewiyari heimana
tamamata heimana 'auxiwi wiyari 'Atsá
ti'aitametikaku.

16

*'Atsá Weni-'Arari matia tiratu kememite'uwewi
(2Kem 16:1-6, 11-17:1 - 1Te 15:17-24)*

1 'Atsá ti'aitakaku xetewiyari heimana tama-
mata heimana 'ataxewi wiyari, Watsaha, 'Ixaheri
kwieyaritsie ti'aitame, Kuratsie kiekatari kani-
warutakwini, hiki Xama kiekariyari 'aixia kani-
uyurieni meta kuraruyari 'akanatitewarita, mana
'Atsá Kuratsie ti'aitame mika'utayeikaniki.

2 Hiki 'Atsá kaniwayetini pirata meta huru Yawé tukieyata meta yuparatsiyuta mieme, hiki Weni-'Arari kaneni'airieni Tsiriya kwieyaritsie ti'aitame, 'ana miki Ramatsiku piti'aitakai. Metatsiere 'ipai 'aneme niuki kaneini'airieni:

3 «Tiratu tepiwewieni 'eki ne matia, meripaiti 'apaapa meta nepaapa wahepai. Ne nepimatsiheni'airiwa huru meta pirata. Tiratu kepemirexeiya Watsaha 'Ixaheri kwieyaritsie ti'aitame hamatia ketineuhayewa, 'ena minetsihayewaki netsimieneti».

4 Weni-'Arari yapitiutanaki'eri ti'aitame 'Atsá kemainekai, hiki kaniwarutani'ani kuyaxi tewa'aitiwamete 'Ixaheri kiekariteyaritsie memitahaxianiki memiwatakwiniki. 'Ana mipai mekateniwara'iwa 'Iyuni kiekariyari, Rani meta 'Aweri-Mahini meta naime kiekarite ti'utamete Nepitahari mieme.

5 Kepauka Watsaha mipai miretima, kaniuta'iami mitihayewarieniki Xama kiekariyari kuraruyari 'amatitewa wewiyaneti.

6 Hiki ti'aitame 'Atsá yunaime kaniwaruta'inieni Kura kwieyaritsie kiekatari, hiki naime katinetini Xama mititipikai, tetexite meta kiyexite Watsaha kimana 'iya kiekari kuraruyari 'amatitewaritakai, matsi mikiki Kehewa kiekariyari meta Mitsipa, miki wakuraruyarite 'akanatitewaritaxiani.

7 Hiki 'iya tukaritsie neniereme Kananihi kaninuani 'Atsá hixie, Kuratsie ti'aitame, miki mipai katinitahiawe: «Tsiriya kwieyaritsie ti'aitame parewiya pemutawawiriki, Yawé

'akakaiyari pemika'utawawiriki, kuyaxi tsiriyutsixi mekamenuutawikweiya.

⁸ Metatsiere 'etiupetsixi meta riwiyutsixi miki kuyaxiyari mepiyumiirekai, meta kaxetate waikawa mepiwarexeiyakai kuyaxa miemete meta kawayutsixi, matsi Yawé kaniwayetuani 'ahetsia, 'ana miki tukaritsie 'eki hetsiena pemitiwiyaikai.

⁹ Yawé naitsarie kwiepa kanitaniereni, miwaparewieniki hetsiena mieme yamemitekahu. Peru hiki 'ena mitiyehane pekanimierienemiki, 'axatiyurieneti muyutemawie hepai pemitiuyuriki».

¹⁰ 'Atsá kaniuyeha'ani mitaniere miya mititahiawixiki, hiki kanita'aita katsariyanata manutahiyaniki. 'Ana mitiyehane, 'Atsá katiniwakwinitiakaitini yayupaimeme teiteri.

¹¹ 'Atsá kemituuyuri ti'aitati, matiari paiti 'atsita 'imatiarieka kemituuyuri, miki piraka'utiarie Kura kwieyaritsie te'aitamete waxapatsie meta 'Ixaheritsie te'aitamete waxapatsie.

¹² 'Atsá katiniutakwine yu'ikatetsie, xeitewiyari heimana tamamata heimana 'atanauka wiyari ti'aitati, meta tsepaneti kwinie mi'aneikai tikuyeti, Yawé pika'utiwau, matsi teyu'uayemawamete pita piwaranukuwau.

¹³ Hiki huta tewiyari heimana xewi wiyari ti'aitati, 'Atsá kaniumini, hiki kaniukateukieni yu'ukiyarima wahamatia.

¹⁴ Mekanikateuku hakewa miki meita'aitakai muwaye'inierieniki Rawiri kiekarienatsie, hakewa mahuni kaniukawewiyarieni mana kanatekieni witsimitiu'iatika 'anahinekaku

meta yutsata waikawa witsimu'iatika
'aixia mirekuwewiyatika. Meta hetsiena
mieme waikawa mekanatinaini nerikwari
'ahatitetereme mekaniutawewieni.

17

Kutsapati Kuratsie ti'aitame kemiratia

¹ Ti'aitame 'Atsá 'utima ti'aitati kanitsutiani
nu'aya Kutsapati, miki Kura tirikaiyeme
kanayeitiani 'Ixaheri 'itamieniki.

² Kuyaxi kaniwaruku'uitiaxiani naitsarie Kura
kiekariteyartsie kuraruyari 'amatititsie, meta
kuyaxi tehewemete kaniwarutani'axiani naitsarie
Kura kwieyaritsie meta 'Epirahini kiekariyaritet-
sie paapaya 'Atsá me'iwakai.

³ Yawé Kutsapati hamatia kaniuyeikakaitini
paapaya matiari kemitiyurienekai hepai
mitiyurienekaiki, miki Wahari kakaiyarixiyari
pikawaranukuwau,

⁴ matsi yupaapa Kakaiyarieya kananukuwauni,
Kakaiyari 'aitsikateyatsie yakatinikamiekaitini,
pikawaranukuwei 'ixaheritsixi ke-
memiteyuriekai.

⁵ 'Ayumieme Yawé waikawa tirikariya
kanipitiani mira'aitatsie. Yunaiti Kuratsie
kiekataru 'imikieri mekatenuirietiwekaitini,
hiki Kutsapati waikawa rexeiyati kanayani, meta
waikawa 'aixia pitixeyariekai.

⁶ Yutemawieti Yawé 'aitsikateyatsie yaka-
tinikamiekaitini, metsi kaniwarukumaweriya
kakaiyarixi watuki meta 'uka kakaiyarixi
'Atserá 'ikiyarite.

⁷ Hiki Kutsapati hairieka wiyari ti'aitati, kaniwarutani'ani yuparewiwamete Weni-Kahiri, 'Awiriyaxi, Tsakariyaxi, Natanaheri meta Mikahiyaxi, para teiteri memitewati'ikitianiki Kura kiekariteyaritsie.

⁸ Miki wahamatia mekanekine rewitsixi Tsemahiyaxi, Netaniyaxi, Tsewariyaxi, 'Atsaheri, Tsemiramuti, Kunatani, 'Aruniyaxi, Tuwiyaxi meta Tuwaruniyaxi, meta mawari wewiwamete 'Eritsama meta Kurani.

⁹ Yawé xapaya mekanehurieni 'iniari niukiyari maye'uxa, para Kuratsie kiekatari memitewati'ikitianiki. Hiki mipai naitсарie Kura kiekariteyaritsie mekaniukakine, teiteri metewa'ikitiati.

¹⁰ Yunaiti hipame nuiwaritetsie te'aitamete Kura 'aurie kiekatari Yawé mekaniutimakani, hiki nixewiti pika'uyuwaari Kutsapati mitamieni.

¹¹ Piritsiteutsixititi Kutsapati mekateni'atirieni, 'imikierite meta pirata, 'aixia mitiwaxeianiki. Yaxeikata 'arawetsixi muxatsi 'ukitsi memiwaiyatika 'atahuta miriyari heimana 'atahuta tsienituyari (7.700) mekani'atirieni, meta tsipuri 'ukitsi 'atahuta miriyari heimana 'atahuta tsienituyari (7.700).

¹² Kutsapati matsi waikawa tirikaiyeti kanayeiximekaitini. Kura kwieyaritsie kaniutiwewieni kiekari kuraruyari 'amatititi meta kiekarite hakewa mireti'utsiwani,

¹³ meta kiekaritetsie waikawa 'ikwaite pirexeiyakai. Kerutsareme kiekariyaritsie piwarexeiyakai kuyaxi waikawa kwinimieme memiteheuyutakwiwawe,

¹⁴ kememite'aka'utsie, kuyaxi kemi'ane nuiwar-itsie memimiemetetikai:

Kuyaxi xeimiriari wa'ukiyarima Kura kwieyaritsie miemete:

'Arinatsi, kuyaxi wa'ukiyari, haika tsienituyari miriyari mitiwa'aitia.

¹⁵ 'Utimana pimiekai Kuhanahani, huta tsienituyari heimana nauka tewiyari miriyari mitiwa'aitia,

¹⁶ 'Utimana pimiekai 'Amatsiyaxi Tsikiri nu'aya, Yawé miti'uximayatsiriekaki yuxaita muyuyexataxi, kuyaxi huta tsienituyari miriyari katiniwa'aitiakaitini.

¹⁷ Wenikamini nuiwarimama:

'Erihará, miki kuya yemeki peuyutamiewekai, mikita kuyaxi huta tsienituyari miriyari pitiwa'aitiakai tupi memu'ikai meta yuhetsie nunuwame.

¹⁸ 'Utimana pimiekai Kutsawari, xeitsienituyari heimana nauka tewiyari miriyari (180.000) mitiwa'aitiakai memite'uti'ikitiarieikai kuyaxa miemeki.

¹⁹ 'Iki yunaiti ti'aitame mekateni'uximayatsiriekaitini, meka'iniairiti miki miwareutani'axiakai kiekarite kuraruyari 'amatititsie naitsarie Kura kwieyaritsie.

18

*Mikahiyaxi kemutayi 'Akawi hepaitsita
(2Kem 18:1-27 - 1Te 22:1-28)*

¹ Kutsapati matsi waikawa rexeiyati kanayani meta 'aixia pitixeyariekai, miki 'Akawi matia memuyutimaretakaiki,

² hiki yapaimexia wiyari 'anuyeyaku kaneyani kaneiku'iwata Tsamariya kiekariyaritsie. Mana 'Akawi muxatsi kaniwarukwini yuwaikawa meta wakaitsixi Kutsapati hetsiemieme meta memeweyakai, meta mana kanita'inieni memiyukwiwuki Xamuti Karaha kwieyaritsie miemek.

³ 'Akawi, 'Ixaheri kwieyaritsie ti'aitame, mipai Kutsapati katiniuta'iwawiya, Kura kwieyaritsie ti'aitame:

—¿Nehamatia pereuyeawe, temiwatakwiniki Xamuti Karaha kwieyaritsie kiekatari?

Kutsapati mipai kaniutayini:

—'Ekitsi kepemitayini ne yanepitikayani, yax-eikia neteiterima. 'Ahamatia tekanihuni tekani-takwiwuni.

⁴ Peru mipaita kaniutayini:

—Peru mexi 'atsitekateyuriwawe, Yawé tepita'iwawiya.

⁵ Hiki 'Ixaheri kwieyaritsie ti'aitame kaniwarukuxeirieni Kakaïyari niukame-temama nauka tsienituyari, miki mipai katiniwaruta'iwawiya:

—¿Teteyiwawe temiwatakwini Xamuti Karaha kwieyaritsie kiekatari, nutsuti hawaiki?

Miki mipai mekaniutiyuani:

—Ti'aitame kenemie, Kakaïyari kamani-parewimiki pekaniwara'iwamiki.

⁶ Peru Kutsapati mipai kaniutayini:

—¿Xewiti 'ena katiuyeika Yawé niukameya, miyiwe temita'iwawiyaki?

⁷ 'Ixaheri kwieyaritsie ti'aitame mipai katinita'eiya:

—Xewiti 'akuxi 'apuyeika miyiwe miki Yawé muta'iwawiya tahetsiemieme, Mikahiyaxi katinitewaka 'Imira nu'aya. Peru miki ne nekanixani'erieka, hatsuaku 'aixia ti'aneme nehetsiemieme pikanetixaxatiwa, ke'axamitiyini xeikia pitixaxata.

Kutsapati mipai katinitahiawe:

—Mipai pepika'utaineni.

⁸ Hiki 'Ixaheri kwieyaritsie ti'aitame xeime kaniuta'inieni yuparewiwame, mipai katinita'aitiani:

—Yapauka xekenene'atiri Mikahiyaxi 'Imira nu'aya.

⁹ 'Ixaheri kwieyaritsie ti'aitame, meta Kutsapati Kura kwieyaritsie ti'aitame, te'aitamete wakamixate me'anakatitikaiti meta yu'uwenitetsie menatekaitini, teiteri memayukuxexeiriwatsie Tsamariya kiekariyari kitenieyaritsie, meta wahixie yunaiti Kakaiyari niukametemama mekaniku'ukaitini metewakuxaxatiwati.

¹⁰ Tserekiyaxi Kenana nu'aya, miki tepia 'awayari mutiwewiekai, mipai kaniutayini: «Yawé mipai kanaineni: “'Iki 'awateki pekaniwatak-wimiki tsiriyutsixi pepikawahayewa kepaukake pemiwakwini”».

¹¹ Hipatita Kakaiyari niukametemama meniparewiekaitini yaxeikia me'utiyuati, mipai

mete'ikihiaweti 'Akawi: «Ti'aitame keniwaru-takuya Xamuti Karaha kwieyaritsie kiekatari, pekaniwara'iwamiki Yawé kamaniparewimiki».

¹² Hiki, Mikahiyaxi 'iniwame mipai katinitahiawe:

—Neuxei, yunaiti Kakaiyari niukametemama mipai meputiyuane, kename ti'aitame rayu'iwa. 'Ekita hetsiena mieme 'aixia ketinexata, 'aniuki meta miki waniuki meyutaxewireki.

¹³ Peru Mikahiyaxi mipai kaniutayini:

—Yuriki mipai nekanaineni Yawé hixie, mipai nekaminahaweni ne ti'aitame yanepiretaxatiani Kakaiyari keminerahaweni.

¹⁴ Kepauka munua ti'aitame hixie, mipai katinita'iwawiya:

—Mikahiyaxi, ʔteteyiwawe temiwaterakwini Xamuti Karaha kwieyaritsie kiekatari, nutsuti hawaiki?

Mikahiyaxi mipai katinita'eiya:

—Xekeniwarutakuya xekatenayu'iwakini, Kakaiyari kaniwayetuamiki xehetsia.

¹⁵ Hiki ti'aitame mipai katinitahiawe:

—ʔKepaimexia wairiyarika nepimatsipitiaka, para yuriki xeikia peminetikuxaxatiwaniki, Yawé hetsiemieme?

¹⁶ Hiki Mikahiyaxi mipai kaniutayini:

—Yunaime 'ixaheritsixi nekaniwarux-eiya metaxirietikaime hiritsie, muxatsi memikatehekakutsiyari wahapai. Hiki Yawé mipai kaniutayini: “Iki teiteri yukutsiyari mepikahexeiya. Yuxexuiti mekeheutayeixiani yukie kayuwati mehexeiyati”.

¹⁷ 'Ixaheŋi kwieyaritsie ti'aitame mɪpai Kutsap-ati katiniutahiawe:

—Kami kenemainekai, 'iki hatsuaku 'aixia ti'aneme pikaneraxaxatiwani, ke'axamitiyini xeikia pinetixaxatiwa.

¹⁸ Tawarita Mikahiyaxi mɪpai kaniutayini:

—Xekeneu'eni Yawé niukieya: Yawé nepuxei yu'uwenitsie 'akaime 'auriena yunaiti kuyaxi muyuawitsie miemete mepiti'ukai, tserietana meta'utatana.

¹⁹ Hiki Yawé mɪpai kaniutayini: “¿Kemi'ane 'Akawi 'Ixaheŋi kwieyaritsie ti'aitame pikemakaxiani ti'itaiyati, Xamuti Karaha kwieyaritsie kiekatari muwatakwiniki meta mana miminiki?” Yuxexuiti yiki metenikuxatakaitini kehapai memiteku'eriwakai.

²⁰ 'Arike 'imatiriekai, xewiti 'iyari kaninuani, Yawé hixie kaniutakeni, mɪpai kaniutayini: “Ne nepikemakaxiani neti'itaiyati”. Yawé mɪpai katinitahiawe: “¿Kehapai petiyurieni?”

²¹ 'Iyari mɪpai kaniutayini: “Nepiyemie hiki 'iyari miti'itawa nepayani Kakaiyari niukametemama hetsiana memimiemete wahetsie”. Hiki Yawé mɪpai katinitani'ani: “Kenemie mɪpai ketinekaye'a, pepeyiwekaxiani pepeikemakaxiani peti'itaiyati”.

²² Kenemaine, Yawé kaniwarupitiani 'iyari miti'itawa 'iki Kakaiyari niukametemama 'ahetsia miemete, Yawé 'ari yakaniutayini ke'axamatiyurieni.

²³ Tserekiyaxi Kenana nu'aya mɪpai tiu'enaka kananukukeni hiki Mikahiyaxi 'auritapa kaneuti-wani. Meta mɪpai katinita'iwawiya:

—¿Titayari kename 'iyari Yawé hetsia mieme netsi'uku'eiri peraine, kename 'eki pita mere-taxatia?

²⁴ Mikahiyaxi mipai katinita'eiya:

—Yapekatinetimaimiki kepauka
peyu'awietaneti xeikia 'apemuyeikani.

²⁵ Hiki 'Ixaheri kwieyaritsie ti'aitame mipai katiniuta'aita:

—Mikahiyaxi xekeneuwiwaka xekenanuhani 'Amuni kuwexinaruri 'ena mieme hetsia meta Kuhatsi neniwe hetsia.

²⁶ Mipai xeketeniwaretahiawi kename mipai nehaine meke'enutahiani miki tewi, nitixaiti mepikateheimikwani paa xeikia meta haa, kepaukake ne nemakunuani 'aixia nereu'erieti.

²⁷ Peru Mikahiyaxi mipai kaniutayini:

—Xika 'eki pehakunuani 'aixia pereu'erieti, mipai pitimatsiikini kename Yawé kanetiutaxatia. Xeme xeyunaiti xepikatehatitimaiyani tinaime kenemutayi.

'Akahawi kemitiumi Xamuti Karaha kwieyaritsie

(2Kem 18:28-34 - 1Te 22:29-36)

²⁸ 'Ixaheri kwieyaritsie ti'aitame, meta Kutsapati, Kura kwieyaritsie ti'aitame, mekanekine yunaiti Xamuti kiekariyari mehetamienike Karaha kwieyaritsie.

²⁹ Mana 'Ixaheri kwieyaritsie ti'aitame mipai Kutsapati katiniutahiawe: «Ne nekaniyutamiemiki yiki nerekemariti, peru 'eki 'akamixate witsimi'anene ketinanakapiti». Hiki 'Ixaheritsie ti'aitame yiki tiyukemaritiaka kaniyutamieni.

³⁰ Peru Tsiriya kwieyaritsie ti'aitame mipai katiniiwaruta'aitiakaitini kaxetate kuyaxa miemete ni'awamete tewa'aitiwamete: «'Ixaheri kwieyaritsie ti'aitame xeikia xekenetami'a, nixeime tawari xepikahemietiweni».

³¹ Kepauka kuyaxi kaxeta memuhapana tewa'aitiwamete Kutsapati memuxei, mipai mekatenu'erieni: «'Iki 'Ixaheri kwieyaritsie ti'aitame piyiane». Hiki mekanenukuweiya me'itamienike, peru Kutsapati kaniutahiwa, meta Yawé Kaka'yari kaniparewieni, yakatiniuyurieni memika'itamieniki.

³² Hiki kaxeta memuhapana tewa'aitiwamete mipai metenetimani kename 'Ixaheri kwieyaritsie ti'aitame kayianekai, hiki 'ana mekanihayewa me'iweiyati.

³³ Matsi, xewiti katiniutamini yutupiki hau'erieti hiki 'Ixaheri kwieyaritsie ti'aitame kaniu'axe katinikwinitiani, tepia kamixayari manakatikikai taita kaneukakeni. Hiki ti'aitame, kaxetaya mahanakai mipai katiniutahiawe: «Keneukunuitia, kenenetuamie hakewa mikarayukwinetsie, 'ariri nepitiukwinitiarie».

³⁴ Tukariki waikawameki mekaniyuk-witiwekaitini, hipati kuyaxi 'Ixaheri kwieyaritsie ti'aitame 'amekaniukekaitini kaxetayatsie tsiriyutsixi wahixie, kepaukake mukutakairixi, hiki kaniumini kepauka tau makayunixi.

19

¹ Kepauka Kura kwieyaritsie ti'aitame Kutsapati munua 'aixia 'anemeki yuparatsiyuta Kerut-sareme,

² mitaniere Kehu Kananihi nu'aya hetsiana nuaka mipai katinitahiawe: «¿Titayari 'axamemite'u'iyari petiwaruparewi, wahamiku perayuyeitia teiteri Yawé memaye'unie? Miya pemiyiki, Yawé waikawa kaniha'aka 'ahamatia.

³ Peru heiwa 'aixia pepitiuyurita, 'ekitsi pekaniwarukumaweriya 'iki kwieyaritsie 'uka kakaiyariyari 'Atserá 'ikiyarite, meta pe'inaki'erieti naimeki 'a'iyariki Kakaiyari pekanikuwauni».

Kutsapati 'itsikate kemitiiwaranayexei

⁴ Kutsapati Kerutsareme kaniukateitini, peru kanayeyeikakaitini teiteri kaniwaruka'iwatakaitini, Weritsewa 'itsutiamé 'atsita 'Epirahini hiriyaritetsie, para Yawé hetsia memanuaxianiki, yu'ukiyarima wakakaiyari hetsia.

⁵ Xexuime Kura kiekariteyari kuraruyari 'am-atitititsie 'itsikate memuku'utikaniki kaniwarutiihawe

⁶ meta mipai katiniwarayehitiani: «Kexemiteyurie xekeneyukweriwayurieka, tewi pikaxe'anuka'uitia matsi Yawé pita, miki xehamatia kaniuyeikamiki kepauka yaxemitiyuani kemi'ane heitserie mexeiya.

⁷ 'Ayumieme, Yawé xekenemakaxeni meta xekeneyukweriwayurieka kexemiteyurie, kariki Yawé takakaiyari kemikatiheitserie temiteyurieka pika'inake meta hipame xeikia temiwaparewieka meta tuminiki hipame wahetsie teminuaka».

⁸ Kerutsareme kiekariyaritsie, meta Kutsapati kaniwaru'uitiani rewitsixi, mawari wewiwamete

meta 'Ixaheri nuiwarimama wa'ukiyarima, Yawé 'aitsikateya hetsiemieme memite'uximayakaki meta teiteri memuyu'uximatia 'aixia memitewarakayuririwaniki. Miki Kerutsareme mekanititekaitini.

⁹ Kutsapati mipai katiniwaruta'aitiani: «Xeme xekatenita'uximayatakuni Yawé xe'ayemakati, naimetsie yaxetekahuti, xe'iyari 'aixia tiyukihawekaku.

¹⁰ Merikite kepauka xe'iwama memi'axiani hipame kiekaritetsie kiekatari mexetax-anetanike 'imieri hepaitsita, yatini tsepa titaki 'iniari niukiyari hepaitsita timieme, 'aitsikate, xemeri xekaniwarayehitiwakuni Yawé hepaitsita 'axamemikateyuriekaki, mikaha'akaki wahepaitsita meta xehepaitsita. Xika mipai xetekahuni xehetsie pikarahiiani.

¹¹ »'Amariyaxi mawari wewiwamete tiwa'aitiwame miki pixetitaxatiani naime tita miraniereni Kakaiyari hepaitsita. Meta Tsewariyaxi 'Itsimaheri nu'aya, Kura nuiwarimama wa'ukiyari, mikita xika raniereni kuwiexinu kemiti'uximaya hepaitsita pixeparewieka. Yaxeikiata rewitsixi mepixeparewiekata xeme. Xekeneyuwairiyani, xeketene'uximayakari. Yawé 'aixia memitekahu wahamatia kaniuyeikamiki».

20

Kutsapati Muhawi meta 'Amuni
kemitiwaruka'unaxi

¹ 'Arike miyatiuyiku, muhawitsixi,
'amunitsixi meta mehunitsixi yameyupaimeti

me'itaxewiriyaka, Kutsapati yamekateniutahiawe memiyutakwiniki,

² hiki xewiti katineikuxatiani: «Hipati Haramara Mimiki 'anutaie kiekatari yumiireti mekaniyuha'aritiaka meta 'Erumi kiekatari. Hikiri Katsetsuni-Tamaxi mekanetiteni 'ume'ahuti, 'Enikari mirakutewa».

³ Kutsapati waikawa mati, Yawé kaniutahiawe meta naitsarie Kura kwieyaritsie yakatiniuta'aita memuyuhakieniki.

⁴ Naitsarie Kura kiekariteyaritsie kiekatari mekaniu'axiani yunaiti meyuniti Yawé parewiya memitawawirieniki.

⁵ Yawé tukieya manuwe, takwa mihekwa hixie, Kutsapati 'utakeka Kuratsie kiekatari memiyuxeirie meta Kerutsaremetari wahixie,

⁶ mipai kaniutayini:

«Yawé, ta'ukiyarima wakakaiyari, 'eki pekanihikitini Kakaiyari muyuawitsie pemakawe, meta yunaime nuiwarite pemiwa'aitia pekanihikitini. 'Eki waikawa pekanitirikaïyeni yemeki xewiti 'apika'uyeika mimatsi'a'iwa 'eki.

⁷ 'Eki pepitiuyuri, takakaiyari, 'ixaheritsixi 'ateiterima wahixie pemiwarayewei 'iki kwieyaritsie kiekatari. Meta 'eki pepitiuyuri, 'ahamiku 'Apirahami nuiwarimama pemiwayetuiiri 'iki kwie yuheyemeki miwahetsiememetiniki.

⁸ Miki mana mepikuyaxixi meta tuki mep-utawewi 'ahetsiemieme, mipai me'utiyuati:

⁹ «Kepauka tahetsie munuani 'uximatirika, yatini xika tetekwinitiarieka 'ixiparaki, yatini

kwiniyaki, yatini haakaki, xika te'uyukuxeirieni 'ahixie 'iki 'atuki manuwe hakewa pemayeka, xika karima tematsi'utahiawe waikawa te'uximatiarieti, 'eki pepitatsi'enieni meta pepitatsitawikweitsitiani”.

¹⁰ »Kepauka 'Ekipitutsie 'ixaheritsixi memayeki, 'eki pepikawarupitia 'amunitsixi memiwakwini, meta muhawitsixi metatsiere tsehixi hiriyaritsie memititei, matsi xaitsie pepiwareukini'a miki nuiwarite memikawareuyehipaniki.

¹¹ Neuxei hiki miya mekataniyurieka, 'amekanahuni metatsitaweyake 'iki kwietsie pemitatsiyetuiiri taheyemeki mitahetsiemietiniki.

¹² Takakaiyari 'aku, 'uximatiarika keniwarupitia. Tame tepikayiwawe temiwara'iwa miki memiyumiire 'umemahu metatsitakwinike. 'Atsitepikatemate ketemiteyurieka. 'Ahetsie xeikia tetewiyati tepita'ikwewa».

¹³ Yunaiti 'ukitsi Kuratsie kiekatari Yawé hixie 'amekaniti'ukaitini, meta yu'itama wahamatia meta yuniwema, metatsiere 'etsimemiti.

¹⁴ Merikite 'ana Yawé 'Iyarieya Kahatsieri hetsie kaninuani, Tsakariyaxi nu'aya, Wenahiyaxi teukarieya, Keyeri tutsieya meta Mataniyaxi, miki rewi tewiyari pihikitikai, meta 'Atsahapi nuiwarieya, miki xeikia mana puyeikakai mirayuxerititsie.

¹⁵ Kahatsieri mipai kaniutayini: «Xekeneu'enana, Kuratsie kiekatari meta Kerutsareme, meta yaxeikiata keneu'ena ti'aitame. Yawé mipai kanaineni: “Xepikaheumamaka.

Xepikaheuyuyexiriwani kepauka xemiwaxeiya miki kuyaxi memiyumiire, matsi xeme xepikayutakwini nepita nekaninetamiemiki.

¹⁶ 'Uxa'a, kepauka miki Tsihitsi teikimanayaritsie memutihunitsie, xemeta wahepa xekanayekinikuni hiki 'aki manuyekatsie xekaniwanakekakuni, Keruheri makumawetsie hixie.

¹⁷ Peru xeme xepikaheyutakwini wahamatia. Matsi kayuwati xeketene'uka xeikia, para xemineniereki Yawé kemitixetawikweitsitiani. Kura meta Kerutsareme kiekatari, xepikaheumamaka meta xepikaheuyuyexiriwani. 'Uxa'a ximeri xekanayekini wahepa, kariki, ne Yawé xehamatia nekaniuyeikamiki”».

¹⁸ Kutsapati meta Kuratsie kiekatari metatsiere Kerutsareme kiekatari yunaiti kwiepa mekaniukahixima'uni meta Yawé 'aixia mekateniutahiawe,

¹⁹ meta rewitsixi Kuhati meta Kure niwemama 'amekaniti'uni Yawé 'Ixaheri Kakaiyarieya metaniawake karima.

²⁰ 'Uxa'arieka, ximeri paiti Tekuha maku-mawetsie mekanekine. Me'uhukaku, Kutsapati 'a'utakeka mipai kaniutayini: «Kuratsie kiekatari meta Kerutsareme, xekeneneu'eni: Yawé hetsie yuri xeketene'erieka, xepixinarieni. Kakaiyari niukametemama yuri xeketeniwa'eririeka, 'aixia katiniiyimiki xehetsiemieme».

²¹ 'Arike yunaime teiteri waruta'iwawiyaka, Kutsapati kaniwaranayexeiya kemi'ane memanuyeyaxe kuyaxi wahixie para Yawé

meniawati memuhuniki witsikemi'ane
meta kemitipatsie, mipai mepite'ukwikakai:
«Yawé pamipariyutsi xekenepitiaka, miki
mikatihayewaki tatsinaki'erieti».

²² Kepauka 'iki niawari me'ikwikati
memitsutia, Yawé kaniwaruhupieni 'amunitsixi,
muhawitsixi meta Tsehixi hiriyaitsie
kiekatari memayekinekai Kuratsie kiekatari
mewaraye'unieti, hiki kaniwara'iwa.

²³ Muhawitsixi meta 'amunitsixi mekani-
warutakwini Tsehixi hiriyaitsie kiekatari,
mekaniwarukwini 'atsita yunaime mekani-
warukumaweriya. Hiki Tsehixi kwieyaitsie
kiekatari mewarukumaweriyaka, yukimana
mekaniyutakwini hiki mekaniyukwixiani
yuxexuiti.

²⁴ Kepauka Kuratsie kiekatari makumawe
tuxiyuyaritsie memu'axia mewaxeiyake
memiwaraye'unie kuyaxi memiyumiire, nitixaiti
mepikate'uxe, mikite xeikia mepiwaruxe kwiepa
meheutiheikame. Nixewiti 'ayeyuriti pika'utayu.

²⁵ Hiki Kutsapati 'ana yuteiterima warawititi
mekanekine memitehekupiniki piinite
miraye'atika, hiki mikite watsata waikawa
piinitiarika mekatenuitaxeia, 'ixurikite meta
kukate miraye'atika. Yuxexuiti mekate-
niutipixiani naime tita memiteheupikukai.
Piinite katiniwaikawakaitini, haika tukari
mekaniuyurieni metekuteixiti.

²⁶ Naurieka tukaritsie mekaniyukuxerieni
Weraka mayeweritsie, mana Yawé 'aixia
mekatenuitahiawe, 'ayumieme mana Weraka
mayeweritsie mekatenuiteriwa, mana hiki

yaxeikia mīpai katinematiwani.

²⁷ Hiki 'arike, yunaiti Kuratsie meta Kerutsareme kiekatari, Kutsapati warawititi, Kerutsareme mekananuaxiani waikawa meyutemamawieti Yawé mīwaruxinaxiki memīwaraye'uniekai wahetsia.

²⁸ Me'u'axiaka, Yawé tukita mekaneutahaxiani mete'ukayuitiwati 'aripaki, riraki meta kuxine-tateki.

²⁹ Hiki nuiwarite kwiepa memitama me'u'enanaka Yawé kemitiwarutakwikai 'ixaheritsixi memīwaraye'uniekai, matsi kwinimieme Kakaiyari me'ayemakati mekanakine.

³⁰ 'Ayumieme Kutsapati ti'aitakaku kayuwati pumakai, meta Kakaiyari kayuwati kaniwarupitiani naitsarie mītiuyehanetsie.

Kutsapati kemitiuta'aitaxi

(2Kem 20:31-21:1 - 1Te 22:41-50)

³¹ Merikitsi Kutsapati kanitsutiani Kura kwieyaritsie ti'aitati xeitewiyari heimana tamamata heimana 'auxiwi wiyari hexeyati, Kerutsareme kiekariyaritsie pitiuta'aitaxi xeitewiyari heimana 'auxiwi wiyari. Maamaya pititewakai 'Atsuwa Tsiriki nu'aya.

³² Miki piweiyakai yupaapa 'Atsá ke'aixia mītiuyuri, hatsuaku pikatiuhayewaxi, matsi Yawé kemitinake pitiyurienekai.

³³ Peru pika'iti'unaxi kakaiyarixi memite'atimawiyariwa, 'akuxi teiteri memikayuyetuawawekaiki yu'ukiyarima wakakaiyari hetsia.

³⁴ Hipatita kemiŋiuyi Kutsapati ti'aitakaku, mitiukatsutiatsie timieme meta 'imatiriekā timieme, katinaka'utiarieni kemiŋiuyi xapayaritsie Kehu Kananihi nu'aya miti'utiatsie, 'Ixaheri kwieyaritsie te'aitamete waxapa hamatia mi'iniatsie.

³⁵ 'Arikekeri Kutsapati, 'Ukutsiyaxi 'Ixaheri kwieyaritsie ti'aitame kaniutinini, miki ti'aitame 'axapitkamiekai,

³⁶ mekaniuyunini kanuwate 'amupapa tituayamete memitiwewieniki Taritsi paiti memuhuki. Kanuwate 'amupapa mepitiwewi-wakai 'Etsihuni-Kewexi mitiyetewatsie.

³⁷ Hiki 'Eriyetsexi Ruriyaxi nu'aya, Maretsa kiekame, Kutsapati hepaitisita mipai katiniutahekiata: «'Ukutsiyaxi pemutiniiki, Yawé katinika'unamiki ketita pemitiwewiene». Mipai pitiuyi, kanuwate 'amupapa kaniukayuniani, mepika'iyiwekaxia Taritsi memuhukai.

21

*Kurani, Kuratsie ti'aitame
(2Kem 21:5-10, 20 - 2Te 8:16-24)*

¹ Kutsapati kaniumini kaniukateukieni yu'ukiyarima wahamatia Rawiri kiekariena, 'utimanata nu'aya Kurani titewati kanitsutiani ti'aitati.

² 'Iwamama mepihikitikai 'Atsariyaxi, Kehieri, Tsakariyaxi, 'Atsariyaxi, Mikaheri meta Tsepatiyaxi mepitetetewakai. 'Iki yunaiti Kutsapati 'Ixaheri kwieyaritsie ti'aitame niwemama mekanakine.

³ Wapaapa 'imikieri katiniwayetuiriekaitini piratate, hurute metatsiere piinite miraye'atika tiwaikawame, meta kaniwayetuirieni kiekarite kuraruyari 'amatititi Kura kwieyaritsie miemete, peru mira'aita yuniwe Kurani kaniyetuirieni, miki nu'aya mexiakame mihikitikaiki.

⁴ Kepauka Kurani yupaapa hetsiemieme ti'aitati tirikaiyeti matia, 'ana yu'iwama kaniwarukwini yunaime meta hipame 'ixaheritsixi wa'ukiyarima.

⁵ Kurani xeitewiyari heimana tamamata heimana huta wiyari pexeyakai kepauka mitsutia ti'aitati, hiki katiniuta'aita Kerutsareme kiekariyaritsie 'atahaika wiyari.

⁶ Peru Yawé kemikatinake katini-uyurieni, 'Ixaheri kwieyaritsie te'aitamete ke'axamemite'uyuri mipai pitikatia, 'Akawi tiiriyamama ke'axamemite'uyuri wahepai, metatsiere 'Akawi nu'aya 'uka kaniutiwitini paiti.

⁷ Peru Yawé pika'uyuwa'iri mika'una Rawiri nuiwarieya ma'eriwakaiki tiratu kemitiuwewi hamatiana, mipai mititahiawekaiki kename kixeme yuheyemeki takakekai hetsiena mieme meta nuiwarimama wahetsiemieme.

⁸ Kepauka Kurani miti'aitametikai, 'erumitsixi mekanayutsana Kura hetsie memitehawiyakai, yuxaita ti'aitame mekananukakeni yuhet-siemieme.

⁹ 'Ayumieme, Kurani kaneyani kuyaximama tewa'aitiwamete warawititi meta yunaime kaxetate kuyaxa miemete warahapati. Hiki 'erumitsixi miki warita mekanayaxetikine meta kaxetate kuyaxa miemete wani'awamete

tewa'aitiwamete wawarita, peru tikariki Kurani kanitaxeiya hakewa meuyehani.

¹⁰ 'Anatiti mitiyehane 'Erumi kwieyari Kura kwieyaritsie pikatiwiya, metatsiere yaxeikia Ri-wina kiekariyari kanayutsana miki miya memiyi wahepaitsita. 'Iki miya pituuyi Kurani Yawé muku'eiriki, 'ukiyarimama wakakaiyari.

¹¹ Meta matsi Kurani kakaiyarixi watukite kaniutiwewieni yemuritetsie Kura kwieyaritsie, miya tiuyurieku 'ana teiteri Kerutsareme meta Kuratsie kiekatari kakaiyarixi mewarayexeyati mekanakine.

¹² Kakaiyari niukameya 'Eriyaxi xapa kaneini'airieni mipai 'ayetaime:

«Yawé mipai kanaineni, 'a'ukiyari Rawiri kakaiyarieya: “Meripaiti 'apaapa Kutsapati 'aixia kemitiyurienekai pemika'anukuweiki meta 'Atsá, Kura kwieyaritsie miti'aitametikai,

¹³ matsi pita 'Ixaheri kwieyaritsie te'aitamete ke'axamemite'uyuri wahapai pemituuyuriki, miya petiuyurieku Kuratsie meta Kerutsareme kiekatari Kakaiyari me'ayexeyati mepika'aki, 'Akawi niwemama kememite'uyuri, metatsiere 'aiwama pemiwarukwiki, 'apaapa niwemama, miki 'aixia memite'u'iyarikai keyuri 'eki,

¹⁴ 'ayumieme Yawé kwiniya mariweme kanani'amiki 'ateiterima wahetsie, 'aniwema, 'aitama, meta naime tita pemirexeiya hetsie.

¹⁵ 'Ekita yaxeikia kwiniya kame-nani'airiemiki 'ayuriepa, kwiniye mayakame tukari manukayeikanitsie kwiniye matsi pekaniyiximemiki, hekia 'akwinuri kanawiwimiki”».

¹⁶ Hiki Yawé pirtsiteutsixi meta 'arawetsixi 'etiupetsixi wa'aurie kiekatari kaniwaruyuitiani Kurani me'aye'unieti memakineki.

¹⁷ 'Ayumieme mekanekine Kura kiekatari memiwatakwiniki, hiki mekaniwara'iwa, 'ana tinaime mekatenetini piinite miraye'atika paratsiyu 'amupata memite'ukaxei, metatsiere Kurani niwemama meta 'itamama mekaniwarewitini. Niweya nixewiti pika'uyuhayewaxi 'ayeniereti, Kuhakatsi xeikia kaniuyuhayewa, kwi wamuta mihikitikai.

¹⁸ Hiki 'arikeke, Yawé kwiniya Kurani kaneyeni'airieni yuriepana kayu'uayemariniaakame.

¹⁹ Miixa tukari kananukayani, hiki huta wiyari 'aye'aku, kaniumini waikawameki tiukakukuineti, miki kwiniyaki kwipuriteya kanawiwieni. Teiterimama mehe'eriwati hetsiena mieme mepikahatinai, meripaiti 'ukiyari-mama wahetsiemieme kememite'atipuriximekai.

²⁰ Kepauka Kurani mitsutia ti'aitati xetewiyari heimana tamamata heimana huta wiyari pex-eiyakai, meta 'atahaika wiyari Kerutsareme katinuuta'aita. Kepauka mumi nixewiti hetsiena mieme hiwerika 'iniariyari pika'uwewi, meta kaniukateukieni Rawiri kiekariena, peru hawaiki te'aitamete memuyehetsie pika'ukateukie.

22

*'Ukutsiyaxi, Kura kwieyaritsie ti'aitame
(2Kem 22:1-9 - 2Te 8:25-29, 9:21-29)*

¹ Merikitsi ti'aitame Kurani 'umiku, Kerutsareme kiekatari 'Ukutsiyaxi mekaniutahawe

ti'aitame mayaniki, Kurani nu'aya 'etsimuyumate, matsikamama yunaima memiwarukwikaiki 'arawetsixi waparewiwamete mematitekaitsie me'u'axiaka. Mipai 'Ukutsiyaxi Kurani nu'aya ti'aitame katinayani Kura kwieyaritsie.

² 'Ukutsiyaxi huta tewiyari heimana huta wiyari kanexeiyakaitini kepauka ti'aitati mitsutia, hiki Kerutsaremetsie xeiwiyari katiniuta'aita. Warut-sieya 'Atahariya pihikitikai, 'Umiri teukarieya.

³ Metatsiere 'Ukutsiyaxi, 'Akawi niwemama ke'axamemite'uyuri wahepai katiniuyurieni, maamaya katini'ikitiakaitini ke'axamitiyurieniki.

⁴ Yawé kemikatinake katiniuyurieni, kememite'uyuri 'Akawi niwemama. Hiki paapaya 'umiku, 'Ukutsiyaxi miki 'iwamama memi'ixatsitiaka kaniwarayeitiani, mipai miki katineuyeweni.

⁵ Miki mipai 'aneme 'ixatsi me'ipitiakaku, 'Ukutsiyaxi Kurami kaniutinini 'Akawi nu'aya, 'Ixaheri kwieyaritsie ti'aitame, hiki kaneyani Xamuti Karaha kwieyaritsie Katsaheri memetamieniki Tsiriyatsie ti'aitame, peru kepauka memiwakwitiwekai tsiriyutsixi Kurami mekatenukwinitiani.

⁶ 'Ayumieme kanakunuani Ketsireri paiti, mana meyuyutianiki Xamuti kiekariyaritsie mirekwinitiarieki, kepauka meyutami Katsaheri hamatia, Tsiriyatsie ti'aitame. Hiki Kurami 'Akawi nu'aya mitiuka'eniwakaiki Ketsireri 'ukaiti, 'Ukutsiyaxi Kurani nu'aya, Kura kwieyaritsie ti'aitame, kaneiku'iwata.

Kehú 'Ukutsiyaxi kemitiumi

⁷ Hiki Kakaiyari yapainekai kename 'Ukutsiyaxi heminiekai, kepauka Kurami mi'iwatamiekai. Yapauka 'Ukutsiyaxi munuatsie, Kurami matia kanayeyani para Kehú memanukunakeki Nimitsi nu'aya, miki Yawé kanenayexeyakaitini para 'Akawi nuiwarimama miwarakumaweriyaki.

⁸ Mexi Kehú wakwinekai 'Akawi nuiwarimama, kaniwaranukunake Kuratsie kiekatari wa'ukiyarima meta 'Ukutsiyaxi 'iwamama memiparewiekai, hiki miki kaniwarukwini.

⁹ Hikita katiniuta'aita 'Ukutsiyaxi muwawiemieki, Tsamariyatsie muyuti'awietakai, peru kaniuwiyarieni Kehú hetsia kani'atarieni, mikita katiniuta'aita mimierieniki. Peru miyatiti, kaniukateukieni, teiteri mipai memutiyuanekaiki: «Kutsapati kaninu'ayatini, naimeki yu'iyariki Yawé mutiwau». 'Anari 'Ukutsiyaxi niwemama nixewiti pika'iyiwekaxia yiweti ti'aitame mayaniki Kuratsie.

'Atahariya meta Kuhatsi

(2Kem 22:10-23:21 - 2Te 11:1-21)

¹⁰ Kepauka 'Atahariya 'Ukutsiyaxi maamaya mipai miretima kename nu'aya hemikai, 'ana kanitsutiani yunaima ti'aitame niwemama wakwiti Kura kwieyaritsie kiekatari.

¹¹ Peru 'uka Kutsawa, ti'aitame nu'aya meta mawari wewiwame Kuyara 'iyaya, Kuhatsi kaniuti'awieta 'Ukutsiyaxi nu'aya kepauka ti'aitame niwemama 'ari memikwi'iwarimekai. Kaniti'awieta kiita kukutsumeta 'ukaratsi miweriyakai hamatia, 'Atahariya pika'itaxe, 'ayumieme pika'umierie. 'Iki miya pituuyuri 'Ukutsiyaxi iwaya mihikitikaiki.

12 'Ataxewi wiyari Kuhatsi kani'awietikaitini wahetsia Kakaiyari tukita, mexixi 'Atahariya ti'aitakai miki kwieyaritsie.

23

¹ Hiki 'atahuta wiyaritsie, mawari wewiwame Kuyara kaniyutatuani, hiki 'iki kuyaxi tewa'aitiwamete kaniwarutakwewieni: 'Atsariyaxi Keruhani nu'aya, 'Itsimaheri Kuhanahani nu'aya, 'Atsariyaxi 'Uweri nu'aya, Matsehiyaxi 'Arahiyaxi nu'aya, meta 'Eritsapati Tsikiri nu'aya.

² 'Iki naitserie Kura kwieyaritsie mekaniukakine mewa'inieti rewitsixi naime Kura kiekariteyaritsie memeutitekai meta 'ixaheritsixi wa'ukiyarima, Kerutsareme memuhuki.

³ Mana yunaiti meyuxeirieti Kakaiyari tukieya manuwetsie ti'aitame matia tiratu mekaniuwewieni.

Kuyara mipai katiniwarutahiawe: «Kami 'ena ti'aitame nu'aya. Miki kanihikitini miti'aitanikeyu, yemeki Yawé Rawiri nuiwarimama kemitiwarutahiawixi.

⁴ Hiki 'ayumieme 'ipai xekateniyurikuni: Xeiteritsiyari xeyupaimeti xeme, mawari wewiwamete meta rewitsixi kemi'ane xemite'uximaya xawatiki, kiteniete xekanitahikuni,

⁵ hipatita xeiteritsiyari meyupaimeti paratsiyu manuwe mepiti'uka, meta hipatita xeiteritsiyari 'imatiremete Tenari kitenieyaritsie mepu'uni, mexixi yunaiti teiteri tuki takwayaritsie meyuxeirieka.

⁶ Mawari wewiwamete meta rewitsixi xeikia 'ana memite'uximayaka tukita

mekaneutahaxiakuni, mikitsi 'ayumieme mekanipatsieka, nixewiti tawari meutahani pikayiweni. Pauyewetse teiteri Yawé 'aitsikayatsie yamemitekahuni.

⁷ 'Ixi para xe'u'iti, rewitsixi ti'aitame warita naitsarie xekenawetikani, xika xewiti tukita heutahani, xekeneumi'a. Ti'aitame yuxaitame xepikakuhayeikawani, tsepa kemitikuyeikani.

⁸ Rewitsixi meta yunaiti Kura kwieyaritsie kiekatari yamekatenikakine naimetsie mawari wewiwame Kuyara kemitiwaruta'aitia. Yuxexuiti yuteiterima mekaniwarukuxeiriexiani, memite'uximayakai xawatiki meta memikate'uximakai yunaiti, mawari wewiwame Kuyara nixeime 'ekipuyari pikawaruhayewaxi tsepa memite'utahayewakai.

⁹ Hiki Kuyara kuyaxi tewa'aitiwamete katiniwarutapitiani pitsikate meta tepia yuhetsie nunuwame 'amiyeyeu meta 'etsimiyeyeu Rawiri mitipinieyatikai, miki kani'utsiekaitini Kakaiyari tukita,

¹⁰ hiki kememite'uni kaniwaruka'uitiani yunaime. Yuxexuiti, yupitsika me'u'iti, ti'aitame mepi'iwiyakai mawari taiyame 'aurie, meta tuki hixie tserietana mekaniuka'uni 'utatana meheutiyuneti.

¹¹ Hiki mekaniwayewitini ti'aitame nu'aya, mekanenamanirieni kuruna, mekaniyetuirieni xapa tiratu 'aye'ukame meta ti'aitame mekaneyeitiani. Kuyara meta niwemama hatseiti mekanikawirieni meta mipai mekateniuihiwa: «Ti'aitame ke'ayeyurini».

¹² Kepauka 'Atahariya teiteri wanautsari wahi-

wari mu'eni meta ti'aitame hetsiemieme 'aixia mehaitikaime, kaneyani Yawé tukieya manuwe, hakewa teiteri meme'uwakai.

¹³ Mana ti'aitame kaniuxeiya 'a'uweme, tuki hixie wurunitse tuxiyuyari 'aurie, meta 'auriena mekaniti'ukaitini kuyaxi wa'ukiyarima meta teyuitiwamete. Yunaiti teiteri meyutemamawieti kuxineta meniutihitsiwakaitini, meta kwikamete, kanarite xawerite mete'u'iti, niawarikatsie mekaniwarahanakaitini. Miya tiuniereka, 'Atahariya yukamixa kaneukatsana meta mipai katiniuhiwa: «Xepinetsi'uku'eiri, xepinetsi'uku'eiri».

¹⁴ Hiki mawari wewiwame Kuyara, yakatinaki'erieti Yawé tukita mimierieniki, kaniwarayeni'ani kuyaxi tewa'aitiwamete kuyaxi memihiritiariekai, mipai katiniwaruta'aitiani: «Xekenanuyehani xemati'utsie, meta xika xewiti heimana henuaka, xekenemi'a 'ixiparaki».

¹⁵ Hiki mekaniwiya meta paratsiyu manuwe mekaneihana kawayutsixi memanutakikatsie, mana mekanimieni.

¹⁶ Hiki Kuyara tiratu kaniuwewieni yunaima teiteri wahamatia, meta ti'aitame matia, Yawé teiterimama memihikitiniki.

¹⁷ Hiki yunaiti teiteri mekanekine tuki Wahari hetsiemieme manuwe, hiki mekanika'una. Mawari taiyamete mekaniuti'una meta kakaiyarixi memiwewiyatika, meta mawari taiyamete hixie Matani mekananutixiteni mawari wewiwame Wahari hetsiemieme.

¹⁸ 'Arike Kuyara te'iwiyamete kaniwaru'uitiani Yawé tukita, mawari wewiwamete meta rewitsixi miki mepitewa'aitiakakakai. Miki Rawiri

kaniwaru'uitiakaitini kememite'uximayata mawari taiyariyari memiwewiekaki Yawé hetsiemieme, kemire'uxa Muitsexi 'aitsikayatsie, meta memutikwikaniki meyutemamawieti, Rawiri kemitui'aitaxi.

¹⁹ Yaxeikiata kuyaxi tehiwemete Yawé tukieyata memanutakikatsie kaniwaru'uitiani, para hipati memikaheutahakeniki kemi'ane memika'itiatika.

²⁰ Hiki kwitiwata, Kuyara, kuyaxi tewa'aitiwamete warawititi, mana kiekatari memimamariwawe, kuwexinaruritsixi meta yunaiti teiteri, ti'aitame kanewitini paratsiyu manuwe paiti Yawé tukieya manuwe miyewiti, kitenie takwa miemetsie meheutahaxiaka, hiki Kuhatsi ti'aitame 'uwenitsie mekanayeni.

²¹ Yunaiti teiteri mekaniyutemamawiekaitini, meta kiekari 'aixia 'iyari kanikumakaitini, 'ari 'Atahariya mumieriekaikiri 'ixiparaki.

24

Kuhatsi, Kuratsie ti'aitame (2Kem 24:1-14, 23-27 - 2Te 12:1-21)

¹ Kuhatsi 'atahuta wiyari pexeiyakai kepauka mitsutia ti'aitati, Kerutsaremetsie huta tewiyari wiyari katiniuta'aita. Weritsewa maamaya pikiekametikai Tsiwiha titewati.

² Mexi Kuyara mawari wewiwame 'a'uyeikakai, Kuhatsi 'aixia pitiyurienekai Yawé kemitinake.

³ Yuhutame 'ukari Kuyara kaniwaranayexeiya Kuhatsi 'iitamama memakineki, miki wahetsie Kuhatsi tiri kaniwarayexeiya 'ukitsi meta 'ukari.

4 Yapaimexia tukari 'anukayaku Kuhatsi Yawé tukieya kananukuketiani.

5 Hiki mawari wewiwamete meta rewitsixi warukuxeirieka mipai katiniwarutahiawe: «Naitsarie Kura kiekariyaritetsie xekeneutayeixia, 'ixaheritsixi yunaime wahetsia tumini xekenetawawa, para Kakaiyari tukieya xeiwiuari 'anuyeyeikakaku 'aixia temikuyuruwaniki. Yapauka xekenehu».

Hiki rewitsixi kememite'utahiawariekai yamepikatekaki.

6 'Ana ti'aitame Kuyara mawari wewiwamete tiwa'aitiwame tiutani'airieka mipai katini-tahiawe: «¿Titayari rewitsixi pekatiwamexiitia tumini memi'iiyuki Kuratsie meta Kerutsaremetisie Muitsexi, Yawé ti'uximayatsiriwame, meta 'ixaheritsixi meyuxeirieti kememite'uxa kepaime ti miyetuiwanikekai 'Ixuriki tukiuari tiratu kakuniuari muyeka hetsiemieme?»

7 Matsi Kakaiyari tukita 'Atahariya meta niwemama meteneu'unakaitini, meta muwa Yawé tukieyata timieme piinite mitipatsietika Wahari kakaiyarixiyarite mekateniwaruxatiakaitini.

8 'Ayumieme ti'aitame katiniuta'aita kakuni mitawewiyaniki meta takwa mitayerieniki, Yawé tukieya kitenieya 'aurie.

9 Meta katiniuta'aita niuki kaneutani'axiani Kuratsie meta Kerutsaremetisie Yawé hetsiemieme memi'atixianiki Muitsexi, Yawé ti'uximayatsiriwame, kemitiwaru'aitia 'ixaheritsixi makumawetsie.

10 Yunaiti teiteri wa'ukiyarima meta yunaiti teiteri meyutemamawieti mekaniyetuaxiani yu-

tumini, meta kakunitsie mekaneikaxirieni 'atsita mekanitahiniya.

¹¹ Rewitsixi kakuni tumini mayemane ti'aitame te'uximayatsiriwamete wahetsia mekaneitikikaitini, para miki memiti'iniataki. Kepauka tumini waikawa mayemaneni, kani'axekaitini ti'utiwame ti'aitame hetsia mieme meta mawari wewiwamete tiwa'aitiwame ni'arieya, miki mekanenati'iwekaitini naime, hiki meta mekaniyetuatikikaitini kakuni hakewa metayeixakai. 'Ipaï mepiteyuriekai xexuime tukaritsie, mipai meteyurieti tumini waikawa mepuxeiri.

¹² Hiki ti'aitame meta Kuyara Yawé tukieyatsie te'uximayatamete waxexeiyamete tumini mekaniwayetuirowakaitini, mikita mepiwa'iniekai tetexi xitekemete, kiyexi xitekemete, meta memite'akumate tepiaki te'uximayatamete meta wurunitseki, tuki 'aixia memuyurieniki.

¹³ Tuki 'aixia yuruwamete waxexeiyamete 'aixia 'anemeki mekateniuta'uximayata meta yapauka 'atsita kepaukake memini 'uximayatsika. Yawé tukieya 'aixia mekaniuyurieni meta 'aixia 'aneme mekaniuhayewa meta matiari kemi'anekai hepai 'aneme.

¹⁴ Kepauka memini, ti'aitame meta Kuyara tumini muyuhayewaxi mekaniwayetuirieni, mikita mikiki mekateniutiwewieni piinite Yawé tukieyata timieme: Kakaiyari memayexeianitsie timieme, meta mawari taiyariyari hetsie timieme, meta kutsarate 'amipapa meta huru watsuteyari meta pirata.

Xexuime tukaritsie, kepauka Kuyara 'amuyeikakai, mawari taiyariyari kaniutiwewi-wakaitini Yawé tukieya manuwe.

¹⁵ Peru Kuyara 'ukiratsi kanayani, hiki waikawa 'ukiratsititi kaniumini. Kepauka mumi xeitsien-ituyari heimana xeitewiyari heimana tamamata wiyari pexeyakai.

¹⁶ Kaniukateukieni Rawiri kiekariena te'aitamete wahamatia, miki 'ixaheritsixi wahetsiemieme 'aixia mitiuyuriki meta Kakaiyari hetsiemieme meta tukieya hetsiemieme.

Kuhatsi Kakaiyari kemituuku'eiri

¹⁷ 'Arike Kuyara 'umiku, Kura kwieyaritsie kiekatari wa'ukiyarima ti'aitame hixie mekaniu'axiani hixiena memikatunuma'uniki, mikita wa'ixatsi kaniu'enieni.

¹⁸ Yawé tukieya mekaniuuku'eirieni, yu'ukiyarima wakakaiyari, hiki 'Atserá 'ikiyarite mekaniwarayexeyakaitini pita meta kakaiyarixi memiwewiyatika. Mikiki 'axamemite'uyuriki, Kakaiyari yuhaxia kaneyeni'ani Kuratsie kiekatari wahetsie meta Kerutsaremetari.

¹⁹ Hiki Yawé yuniukamete kaniwareyeni'airieni para memiwarayehitianiki ta'aurie memaxirieniki, peru miki mepikawaru'eni.

²⁰ Hiki 'Iyari Kakaiyari hetsia mieme Tsakariyaxi hetsie kaninuani, Kuyara mawari wewiwame nu'aya, hiki 'iki, teiteri wahixie 'utakeka, mipai kaniutayini: «Yawé Kakaiyari mipai kanaineni: ¿Titayari ne'aitsikatetsie yaxekatekahu? Mipai xe'aneti xehetsiemieme 'aixia pikatiyini. Xeme xeminetsi'uku'eiriki, neta nekanixeku'eirimiki».

21-22 Peru miki mekaniyu'enieni Tsakariyaxi Kuyara nu'aya kememiyurieni, hiki ti'aitame yatiuta'aitaku, mekanimieni tetexiki me'itituaxati Yawé tukieya takwayaritsie. Mipai ti'aitame Kuhatsi, Kuyara 'aixia kemiitiuka'iyarikai kahe'eriwati, nu'aya Tsakariyaxi kaniumieni, miki miximeti mipai kaniutayini: «Yawé yakeretimani 'iki naime, meta xehetsie kerahiani».

23 Hiki xeiwiyari 'anuyeyaku, kuyaxi tsiriyutsixi mekanu'axiani Kuhatsi hetsia me'eye'unieti, Kura kwieyaritsie mekanitahaxiani meta Kerutsareme kiekariyaritsie, hiki 'arike teiteri wa'ukiyarima mewarukwika, Ramatsikutsie ti'aitame naime piinite miraye'atika mana memite'ukaxei mekatene'airieni.

24 Tsepa tsiriyutsixi 'etsimemiyupaimakai, Yawé kaniwarupitiani kuyaxi memiyumiire memiwara'iwaki, Kuratsie kiekatari Yawé memuku'eiriekaiki, yu'ukiyarima wakakaiyari. Mipai Kuhatsi pirakapitarie.

25 Kepauka tsiriyutsixi memeki, Kuhatsi me'uhayewaka waikawa mete'ikwinitiaka, 'iparewiwamete mekaniku'eirieni me'eye'unieti mekanakine, hiki mekanimieni yu'utatsie kakaime, Kuyara mawari wewiwame nu'aya mumiki mekatenekapitiani. Hiki Rawiri kiekariena mekanikateuku, peru hawaiki te'aitamete memakuhetsie pika'ukateukie.

26 Kuhatsi memumi 'iki mepihiki, Tsawari titewati, maamaya pititewakai Tsimati 'amuni tewiyari, meta Kutsawari titewati, maamaya pititewakai Tsimiriti muhawi tewiyari.

27 Kuhatsi niwemama kememite'uyuri, meta kakaiyari niukametemama waikawamexia Kuhatsi kememite'utahiawixi meta Kakaiyari tukieya ke'aixia muyuriekai, naiti miki katinaka'utiarieni hipati kememutiyuane te'aitamete waxapa hepaitsita xapayaritsie. Nu'aya 'Amatsiyaxi kanitsutiani 'utimana ti'aitati.

25

'Amatsiyaxi, Kuratsie ti'aitame

(2Kem 25:1-4, 11-12, 17-28 - 2Te 14:1-20)

1 'Amatsiyaxi xeitewiyari heimana 'auxiwi wiyari kanexeiyakaitini kepauka mitsutia ti'aitati, hiki Kerutsaremetisie xeitewiyari heimana 'atanauka wiyari katiniuta'aita. Maamaya Kuharani pititewakai, Kerutsareme pikiekametikai.

2 'Amatsiyaxi Yawé kemitinake katiniuyurieni, tsepaneti yemeki 'iyarieya ya'anyakaku katiuyuri.

3 Hiki kepauka 'Amatsiyaxi ti'aitati tirikaiyeti matia, kaniwarukwini paratsiyuta te'uximayatamete 'ukiyarieya ti'aitame memumi.

4 Matsi, Yawé kemitiuta'aitaxi, teyumiemekate waniwema pikawarukwi, mipaitsi katine'uka Muitsexi 'iniari niukiyari kemiraka'utiatsie: «Wa'ukiyarima mepikakwi'iwa waniwema 'axamemite'uyuriki, meta waniwema mepikakwi'iwa wa'ukiyarima 'axamemite'uyuriki, matsi yuxexuiti mekanikwi'iwakuni yuxexuiti ke'axamemite'uyuriki».

5 'Amatsiyaxi kaniwarukuxearieni Kuratsie kiekatari, meta Kura meta

Wenikamini kiekatari wahetsiemieme
 memanuyeyaxe kaniwaranayexeiya xeimiriya
 tewa'aitiwamete meta xeitsienituyari kuyaxi
 tewa'aitiwamete, kaniwarukuxeiriexiani
 kemi'ane memi'iwamarixitikai. Kani-
 waruka'utianita 'ukitsi xeitewiyari meutiyune
 wiyari memexeyatika, hiki mekanakine haika
 tsienituyari miriyari 'ukitsi memeuyutakwi-
 wawe pitsikaki meta yuhetsie nunuwame
 memeuta'iwawe.

⁶ Metatsiere, haika miriyari heimana haika
 tsienituyari pirata kiruyariki kaniwaruta'inieni
 'ixaheritsixi xeitsienituyari miriyari
 memiyiwawe memeuyutakwiwawe.

⁷ Peru xewiti tewi Kakaiyari hetsia mieme kan-
 inuani hetsiana meta mipai katinitahiawe:

—Ti'aitame, 'eki pepikawapitiaka 'ahamatia
 memiyehuki kuyaxi 'ixaheritsixi, kariki Yawé
 'Epirahinitsie kiekatari wahamatia pika'uyeika.

⁸ Xika 'eki wahamatia peheyani,
 Kakaiyari yapituyurieni memimatsi'aye'unie
 memimatsi'a'iwaki tsepa pemuyutami
 yuwaikawame pewarawititi, kariki Kakaiyari
 tirikariya kanexeyani miraparewieniki meta
 kaneixeyani miraka'unaki.

⁹ 'Amatsiyaxi tewi Kakaiyari hetsia mieme mipai
 katiniuta'iwawiya:

—¿Keriyini haika miriyari heimana haika tsien-
 ituyari pirata kiruyariki nemitinetuakai kuyaxi
 'ixaheritsixi wahetsiemieme?

Miki mipai katinita'eiya:

—Yawé piyiwe matsi waikawa mimatietuirieni
 keyuri miki.

10 Hiki 'ayumieme 'Amatsiyaxi 'ixaheritsixi kuyaxiyari kaniwaruta'imaiya 'Epirahini kwieyaritsie memanexiakai, meta kaniwareni'ani yu'utima yukwieyaritsie. Mipai tiuyiku, miki kuyaxi waikawa mekaniuyeha'ani Kura hepaitsita, hiki meha'ati mekanakunuaxiani yukie.

11 Hiki 'Amatsiyaxi kamati, kaniware-witini kuyaxi mayeweritsie Maye'unaya mirayetewatsie, mana tamamata miriyari kaniwarukwini Tsehixi kiekatari.

12 Meta kuyaxi Kuratsie kiekatari mekaniwarutiwiyata hipame me'ayeneniereme tamamata miriyari. Miki mekaniwaranutiwitini hirititsie paiti 'amanutitititsie, hiki mana tekia mekaniwarakaxirieni. Yunaiti mekaniutitsane mekaniukwini.

13 Mexi miyameteyurie, 'Amatsiyaxi kuyaxi mikawarutanaki'eri Kura kiekariteyaritsie mekanitahaxiani, Tsamariya me'itsutiaka Weti-Kuruni paiti meye'axiaka mekaniwarukwini haika miriyari teiteri meta piinite miraye'atika tiwaikawame mekatenetini.

14 Kepauka 'Amatsiyaxi makunua 'erumitsixi wara'iwaka, Tsehixi kiekatari wakakaiyarixi kaniwaretini, yukakaiyarixi kaniwarayeitiani, warayexeiyati kanayani meta 'ikwa watairieti.

15 'Ayumieme Yawé kaniuyeha'ani 'Amatsiyaxi hepaitsita, hiki yuniukame xeime kaneini'airieni mipai rehiaweti:

—¿Titayari kakaiyarixi petiwarayexeiya memika'uyiwekaxia yuteiterima wahetsie memitanuani 'eki pewakwinekaku?

16 Ti'aitame Kakaiyari niukameya hixie kani-
uyeniuni, mipai katinitahiawe:

—ǂ'Ekita kemi'ane pimatsi'utahiawixi
ti'aitame 'ixatsitiwameya pemayaniki?
Xika peka'awairiyani pemimierieniki,
'axapepikanetikihaweni.

Kakaiyari niukameya 'imatirieka xeikia mipai
katinitahiawe:

—Ne xeikia mipai nepitimate, miya
pemituyurieneki meta ne'ixatsi pemika'u'eniki,
Kakaiyari yaputayiri pimatsika'una.

17 Matsi, 'Amatsiyaxi, Kura kwieyaritsie
ti'aitame, hipati yamete'ikihawekaku wa'enieti,
niuki kaneni'ani Kuhatsi hetsia, Kuhakatsi nu'aya
meta Kehú teukarieya, 'Ixaheri kwieyaritsie
ti'aitame, mipai katinehiawekaitini: «Kenaye'a,
temiyutakwiniki».

18 Peru Kuhatsi, 'Ixaheri kwieyaritsie ti'aitame,
'Amatsiyaxi Kura kwieyaritsie ti'aitame, mipai
katiniuta'eiya: «Tupiriya xuya Riwanu kiekame
kariuxa 'amutewi mipai katiniutahiawe: “'Aniwe
'uka keneyetua neniwe 'iyaya mayaniki”. Peru
kwitiwata mana mekaniuyekine 'irawetsixi yeu-
tari Riwanu kiekatari, hiki miki xuya mekaniu-
taketsini.

19 'Eki pepi'ata'ire, 'Erumi pema'iwxiki, hiki
'ayumieme kwinimieme pekatini'atemawieka.
'Aixia kani'aneni, kene'ata'ireni kuta, peru 'akie
keneukani. Pepika'iwauneni 'eki pemimierieniki
meta Kura mika'unarieniki».

20 Kakaiyari yamainekaiki 'Amatsiyaxi
miyetuanikekaiki meye'unie hetsia kakaiyarixi

miwarayexeyakaiki 'Erumi kwieyaritsie miemete, 'Amatsiyaxi Kuhatsi pika'anu'eni.

²¹ Hiki 'ayumieme Kuhatsi, 'Ixaheri kwieyaritsie ti'aitame, kaneyani Weti-Tsemetsi paiti, Kura kwieyaritsie, 'Amatsiyaxi hamatia miyutamieniki.

²² 'Ixaheritsixi mekaniwara'iwa Kura kwieyaritsie kiekatari, hiki miki mekaniyuta'unaxiani yukie.

²³ Weti-Tsemetsi mirakutewatsie, Kuhatsi, 'Ixaheri kwieyaritsie ti'aitame, 'Amatsiyaxi kaniuwiya, Kura kwieyaritsie ti'aitame, Kuhatsi nu'aya meta Kuhakatsi* teukarieya. Hiki kaneyanita Kerutsareme mana kuraru 'amatayewa kaniuka'una xeitsienituyari heimana nauka tewiyari meturuyari tewime, Kitenie 'Epirahini mititewatsie 'itsutiaka kitenie paiti 'Itsikina mititewatsie kani'atiani.

²⁴ Metatsiere, naime huru kanetini, pirata meta piinite Kaka'yari tukita mirayepikai 'Uweri-'Erumi miti'iwiyakai. Metatsiere katinetini piinite waikawa miraye'atika paratsiyuta mirayepikai, meta hipame kaniwarehapani, hiki Tsamariya paiti kanakunuani.

²⁵ 'Amatsiyaxi Kuhatsi nu'aya, Kura kwieyaritsie ti'aitame, tamamata heimana 'auxiwi wi-yari kaniutihuni 'akuxi Kuhatsi Kuhakatsi nu'aya 'umikuri, 'Ixaheri kwieyaritsie ti'aitame.

²⁶ Hipatita kemituuyi 'Amatsiyaxi ti'aitametikaku, mitiukatsutiatsie timieme meta 'imatirieka timieme, miki katinaka'utiarieni

* 25:23 25:23 Mipaita pititewatsiere 'Ukutsiyaxi.

Kura kwieyaritsie te'aitamete waxapatsie, meta 'Ixaheri kwieyaritsie te'aitamete waxapatsie.

²⁷ Kepauka paititi 'Amatsiyaxi Yawé muku'eiri, hipati meheye'unieti mekanakine Kerutsareme kiekariyarsie, hiki 'Amatsiyaxi kaniyuta'una Rakixi paiti, peru mekanenukuweiya, mana paiti mekaniemieni.

²⁸ Hikita mekaneitini kawayutsie Kura kwieyaritsie, Rawiri kiekariena paiti, mana kaniukateukieni yu'ukiyarima wahamatia.

26

'Utsiyaxi, Kuratsie ti'aitame

(2Kem 26:1-4, 21-23 - 2Te 14:21-22, 15:1-3, 5-7)

¹ Hiki yunaiti Kura kwieyaritsie kiekatari 'Utsiyaxi mekaniutahiawe ti'aitame mayaniki, miki tamamata heimana 'ataxewi wiyari pihikai, hiki mekanenukakeni yupaapa 'Amatsiyaxi hetsiemieme mitita'aitaki.

² Miki 'Utsiyaxi katiniuyurieni, 'arike ti'aitame 'Amatsiyaxi 'umiku, 'Erati kiekariyari 'aixia muyuri meta tawari Kura hetsie rawiyame mayeitia.

³ 'Utsiyaxi kepauka mitsutia ti'aitati tamamata heimana 'ataxewi wiyari pexeyakai, meta pitituta'aitaxi Kerutsareme 'ukaiti huta tewiyari heimana tamamata heimana huta wiyari. Maamaya Kekuriyaxi pititewakai, Kerutsareme kiekame.

⁴ 'Utsiyaxi Yawé kemitinake katiniuyurieni, miki naimetsie 'ukiyarieya 'Amatsiyaxi ke'aixia mitikatia kanenukuweiya,

⁵ hiki, mexi Kakaiyari niukameya Tsakariyaxi 'a'uyeikakai, miki mititi'ikitia Kakaiyari mayemakaxeniki, 'ana kaniyuwai'iyakaitini Kakaiyari mayexeyani. Kepauka 'Utsiyaxi Kakaiyari mayexeyakai, Kakaiyari yakatini-uyurieni hetsiena 'aixia mitiyiniki.

⁶ 'Utsiyaxi piritsiteutsixi kaniwarutakwini, hiki Kahati kuraruyari 'amatayewa kaniuka'una, metatsiere Kawiniya meta 'Atsiruri wakuraru kaniuka'una. Matsi 'Atsiruni kwieyaritsie hipame kiekarite kaniutiwewieni, piritsiteutsixi watsata.

⁷ Kepauka piritsiteutsixi miwarutakwi Kakaiyari kaniparewieni, meta 'arawetsixi Kuxi-Wahari kiekatari miwarutakwitsie, metatsiere mehunitsixi miwarutakwitsie.

⁸ 'Amunitsixi mekateniyukutuayakaitini 'Utsiyaxi hetsia, hiki 'ana waikawa tirikaiyeti kanayani meta 'Ekipitu paiti mariwati kanayani.

⁹ Metatsiere 'Utsiyaxi Kerutsaremetisie tuxiyu kaniutiwewieni meta 'a'atititime kanayeitiani, kitenie 'Itsikina mititewa heima meta kitenie Mayeweritsie mititewa heima, meta kuraru 'amatayewa 'etsikinayaritsie heima kanewewieni.

¹⁰ Metatsiere, makumawetsie tuxiyu kaniutiwewieni, meta putsute waikawa kaniutiwewieni, yumi'reme tewaxi muwarexeiyakaiki muweritsie meta hiri manaweweritsie. Meta kaniwarexeiyakaitini kwietsanamete meta kaxie haraweriyaritsie te'uximayatamete hiritsie memu'uwakai meta mayeweweritsie, yemeki pinakakai kwie muka'etsani.

¹¹ 'Utsiyaxi yukuyaxima kaniwarexeiyakaitini

kuyaxa memayekikakaitsie yayupapaimeti mekanayekikakaitini, Keyeri ti'utiwame meta Matsehiyaxi paratsiyuta ti'uximayatame kememitewaraka'utia mewa'iniatati metatsiere Kananiyaxi yatiwarahiawekaku ti'aitame parewiwameya.

¹² Miki yunaiti nuiwarite wa'ukiyarima mepihikitikai huta miriyari heimana 'ataxewi tsienituyari, yunaiti miki memeuyutakwiwawe memitirikawi.

¹³ 'Iki memitewa'aitia kuyaxi memite'uti'ikitarie kuyaxa miemeki mepihikitikai, haika tsienituyari heimana 'atahuta miriyari heimana 'auxiwi tsienituyari mepiyupaimekai, miki mepiyutakukuyakai tirikaiyemeki ti'aitame meparewieti mem-eye'unie miwarutakukuyakaitsie.

¹⁴ Miki kuyaxi 'Utsiyaxi katiniwayetuirieni, yuhetsie nunuwamete, pitsika 'amititi, yumu'utsie nunuwamete, tepia kamixayarite, tupite meta tewipame.

¹⁵ Kerutsaremetsie kaniutiwewieni makinate hipati temaiwawemete me'inetiaku, tuxiyutsie mekaneka'uitiani meta kiekari muta'etsikinatikatsie mikiki memite'utituaxaniki tetexi 'anenemeki meta 'iriki. Kakaiyari tirikaiyemeki 'iparewiekaku, 'Utsiyaxi waikawa tirikaiyeti kanayani meta tewapaiti pimariwakai.

¹⁶ Peru, kepauka 'Utsiyaxi tirikaiyeti matia, kaniyuta'ire, 'ayumieme mipai katiniyuka'una. Yawé 'aye'unieti kanayani, yu'ukiyarima wakakaiyari, kaniyuwaiiya Yawé tukita meutahani 'ikwa mitaiyaki 'ikwa taiyametsie.

17 Hiki 'utimana kaneutahani 'Atsariyaxi mawari wewiwamete tiwa'aitiwame, warawititi Yawé mawari wewiwametemama nauka tewiyari meyupaimeme, miki yunaiti teiteri memika'ukamama mepihikitikai,

18 hiki hixiena meti'uti mipai mekatenitahiawe: «'Eki ti'aitame pepikapitairie Yawé 'ikwa witsimu'ia pemikutairiwaniki. 'Iki mawari wewiwamete 'Aruni nuiwarimama xeikia mekaniyawaweni, mikitsi xeikia mekanipatsieka 'ikwa memukutaiyaniki. Hiki kwitiwa tukita 'eki kenanuyeye'a, kariki 'axapekatiniuyurieni, mipai Yawé Kakaiyari 'aixia pikamatixeiya».

19 Mikiki 'Utsiyaxi kaniuyeha'ani, yumamat-sie 'ikwa taiyame ma'ikai yuha'aritiatiri 'itaiyake. Peru 'ana kwitiwa, muwa Yawé tukita, 'ikwa taiyame 'aurie 'uweti meta mawari wewiwamete wahixie, yapauka yuhixie nawi kwiniyayari hex-eiyati kanayani.

20 Mawari wewiwamete tiwa'aitiwame 'Atsariyaxi meta hipati mawari wewiwamete 'Utsiyaxi me'uxeiyaka nawi kwiniyayari hexeiyakame muwa mekanipayeni'ani yapauka. Matsi mikititita, yumexiitititi kaniwayeyani, Yawé 'uximatiarika mipitiakaiki.

21 Ti'aitame 'Utsiyaxi nawi kwiniyayari hexeiyati kanayani, pika'anayewe miya'aneti kaniumini. Pauyewekai yuxaita xeikia kiita mayekani, meta kaniuta'imaiyarieni Yawé tukita mikahentuhakeniki. Nu'aya Kutani paratsiyu kaniuhiritiarieni meta miki kwieyaritsie miti'aitaniki.

22 Hipatita kemituiyi 'Utsiyaxi ti'aitametikaku,

mitiukatsutiatsie timieme meta 'imatirieka timieme, katinaka'utiani Kakaiyari niukameya Kitsariyaxi, 'Amuxi nu'aya.

²³ Kepauka 'Utsiyaxi mumi, yu'ukiyarima wahamatia kaniukateukieni heuhurakaku te'aitamete memiwateuketsie, nawi kwiniyayari mexeiyaikai. Hiki nu'aya Kutani 'utimana kanitsutiani ti'aitati.

27

Kutani Kuratsie kemitiuta'ai (2Kem 27:1-4, 7-9 - 2Te 15:33-38)

¹ Merikitsi Kutani kepauka mitsutia ti'aitati xeitewiyari heimana 'auxiwime wiyari pexeyakai, hiki Kerutsareme 'ukaiti katiniuta'aita tamamata heimana 'ataxewi wiyari. Maamaya Kerutsa pititewakai Tsaruki nu'aya.

² Kutani yakatiniuyurieni Yawé kemitinake, naimetsie 'ukiyarieya 'Utsiyaxi ke'aixia mitikatia kanenukuweiya, peru Yawé tukita pikaheta'axekai. Matsi teiteri, mepiyeweyakai 'axameteyurieti.

³ Kutani katiniuyurieni Yawé tukieyatsie mieme 'itupari wapaiti mieme 'aixia muyuri. Metatsiere waikawa 'uximayatsika pituiyuri 'Uperi kuraruyari hetsiemieme.

⁴ Kura hiriyaritetsie kiekarite kaniutiwewieni, meta kiekarite kuraruyari 'amatititi metatsiere tuxiyu kaniutiwewieni hiritsie paiti.

⁵ Hiki Kutani kaniwarutakwini 'amunitsixi, meta kaniwara'iwa. Haika wiyari mekaniuyurieni, 'amunitsixi mete'ikupitiwati xeiwiyari 'aye'axekaku haika miriyari heimana nauka

tsienituyari kiruyari pirata, huta miyuniyari heimana huta tsienituyari miriyari kiruyari tiriku meta tsewara mipai tiriku hepai paimeme.

⁶ Merikite Kutani waikawa tirikaiyeti kanayani muyuwairiki yamitikamieniki Yawé yukakaiyari hetsiemieme.

⁷ Hipatita kemiŋiuyi Kutani ti'aitametikaku meta kemiŋiyumienekai meta kemiŋikatia, katinaka'utiarieni 'Ixaheri kwieyaritsie te'aitamete meta Kura kwieyaritsie te'aitamete waxapatsie.

⁸ Kutani pexeyakai kepauka mitsutia ti'aitati xeitewiyari heimana 'auxiwime wiyari, hiki Kerutsareme 'ukaiti katiniuta'aita tamamata heimana 'ataxewi wiyari.

⁹ Kepauka mumi, kaniukateukieni Rawiri kiekariena, hiki nu'aya 'Akatsi kanitsutiani 'utimana ti'aitati.

28

'Akatsi, Kuratsie ti'aitame
(2Kem 28:1-27 - 2Te 16:1-20)

¹ 'Akatsi kepauka mitsutia ti'aitati xeitewiyari wiyari pexeyakai, Kerutsareme kiekariyaritsie 'ukaiti pitiuta'aitaxi tamamata heimana 'ataxewi wiyari. Peru yututsi Rawiri hepai pika'anekai, 'Akatsi yapikatiuyuri Yawé Kakaiyari kemiŋinake.

² Matsi, 'Ixaheri kwieyaritsie te'aitamete ke'axamemite'uyuri wahepai katiniuyurieni, meta kakaiyari Wahari 'ikiyari kaniutiwewieni tepia kwaniyarietikaimeki.

³ Metatsiere, 'ikwa kaniutitaiyakaitini mayeweritsie Weni-Hinuni meta yuniwema

kaniwarutitaiya taipa mawari memakineki,
nuiwarite mana memitamakai Yawé
miwarayeweyakai 'ixaheritsixi wahixie
ke'axamemite'uhukai wahepai.

⁴ Metatsiere mawari piwewienekai meta 'ikwa
putitaiyakai kakaiyarixi wamawari taiyame het-
sie, meta hiri 'amanutititsie meta naime kiyexi
waikawa mi'e'eti hetia.

⁵ 'Ayumieme Tsiriyatsie ti'aitame hetsia
Yawé Kakaiyarieya kaniyetuani. Tsiriyutsixi
mekane'iwa, meta yuwaikawame mekaniwaruti-
wiya mekaniwarehapani Ramatsiku paiti.

Metatsiere 'Ixaheri kwieyaritsie ti'aitame
'Akatsi kana'iwa, mikita kuyaximama yumireme
kaniwarukwini.

⁶ Xeitukaritsie Pekaki Xemariyaxi nu'aya
kaniwarukwini Kura kwieyaritsie xeitsienituyari
heimana xeitewiyari miriyari, yunaiti miki
kuyaxi memeuyutakwiwawe mepihikitikai,
miya mepite'anuyeki Kuratsie kiekatari Yawé
memuku'eiriki, yu'ukiyarima wakakaiyari.

⁷ Tsikiri, 'Epirahini kiekame mitirikaiye kuya,
Matsehiyaxi kaniumieni, ti'aitame nu'aya,
meta 'Atsirikani, ti'uximayatame paratsiyu
mihiritiariekai, metatsiere 'Erikana, miki
ti'aitame 'utima tirikariya pexeiyakai.

⁸ Kuyaxi 'ixaheritsixi yu'iwama Kuratsie
kiekatari mekaniwarehapani huta tsienituyari
miriyari teiteri, meteyuniti 'ukarawetsixi, tiri
'ukitsi meta 'ukari. Meta waikawa piinite
mekatenetini, hiki mekatenechini Tsamariya
kiekariyaritsie paiti.

⁹ Tewi 'Urerititewati mana kaniukateitini, Yawé

niukameya kanihikitikaitini. Kepauka kuyaxi 'ixaheritsixi Tsamariyatsie memuti'axekai, miki Kakaiyari niukameya kanayeyani waranukunakeke mipai katiniwarutahiawe:

—Yawé, xe'ukiyarima wakakaiyari, Kuratsie kiekatari xehetsia kaniwayetuani, miki miha'akaiki wahepaitsita. Peru xeme xekananutikine, xekawanenimayati xekaniwarukwini, Kakaiyari kaniuniere muyuawitsie paiti.

¹⁰ Hikita, Kuratsie meta Kerutsaremettsie kiekatari waiyyarika te'uximayatamete xetewayeitiaku. Xemeta xehetsie katinahiawani 'axaxekateniuyurieni Yawé xekakaiyari hepaitsita.

¹¹ 'Ayumieme, yaxeketenekakini kenemitayini: xekeniwarutatua pirtsutsixi. ¿Miki mekatexe'iwama? Yawé kaniuyeha'ani xehepaitsita.

¹² Hiki 'Atsariyaxi Kuhanahani nu'aya, Werekiyaxi Metsiremuti nu'aya, 'Etsekiyaxi Tsaruni nu'aya, meta 'Amatsaha Harirahi nu'aya, 'Epirahini nuiwarimama wa'ukiyarima memihikitikai, kuyaxa memanuki wahixie mekaniu'uni,

¹³ mipai mekateniwarutahiawe:

—Pirtsutsixi xemiwaruhapaxime 'ena xepikawa'atiwani, mikiki Yawé tame tahetsie pirahiani. ¿Kamitsi xete'imiriyaaku tita 'axatemite'uyuri? 'Ari pimiire tita 'axatemite'uyuri, 'ari Yawé puyeha'a 'Ixaheri hetsiemieme.

¹⁴ Hiki kuyaxi mekaniwaruhayewa pirtsutsixi memiwaruhapaximekai, meta piinite memitehatikikai teiteri wa'ukiyarima wahixie mekatenitipini meta yunaime teiteri wahixie.

15 Hipati mekaniutihawarieni piretsutsixi memihiritiarieniki, meta kamixate meta kakaite piinite memite'atiatsie timiemeki mekateniwarutiketiani yunaime kemi'ane memeumamawekai. Hiki meta mekateniwarumini mekaniwaruharitiani, meta hatseiti mekaniwarukawiriexiani. Hipatiri, memika'ukiniwawekai mekaniware'ikata puxuri wahetsie Keriku kiekariyaritsie paiti, makutakiya mirakutewatsie, wa'iwama memiwaretiniitiani. 'Arike miki teiteri yamete'uyurieka Tsamariyatsie mekanakunuaxiani.

16 'Ana mitiyehanetsie, ti'aitame 'Akatsi parewiya kaniwarutawawirieni 'Atsiriyatsie te'aitamete,

17 hekwaremeki 'erumitsixi Kuratsie memitahaxiakaiki meta yayupaimeme teiteri memiwarehapakaiki.

18 Metatsiere pirtsiteutsixi Kura kiekariteyaritsie mekanitahaxiani mekateniwarunawatsirieni kiekari muweritsie mukumanetsie meta Nekexi mirakutewatsie, meta yuhetsiemieme mekanayeitiani kiekarite Weti-Tsemetsi, 'Ayaruni, Kereruti, Tsuku, Timinaha meta Kimitsu, meta kiekarite wa'aurie mamanetikatei, hiki miki mana mekaniyutikitiani.

19 Mipai Yawé Kuratsie kiekatari katiniiwarunanaaimani, 'Akatsi hetsiemieme tiwa'aitiwame, miki kaniwarupitiani Kuratsie kiekatari 'axamemiteyurieka, meta miki Yawé yemeki kaniuku'eirieni 'eye'unieti kanayani.

20 Metatsiere Tikirati-Piretsexi, 'Atsiriyatsie ti'aitame, 'Akatsi miparewienikekai, kanitamieni pita.

21 Hiki 'Akatsi 'Atsiriyatsie ti'aitame katiniyetuirieni tiname Yawé tukita mirayepikai miraye'atika, meta paratsiyuta mirayepikai, meta 'iparewiwametemama wakiita mirayepitikatei, peru miki tixaiti pikaratia.

22 Tsepa waikawa mu'uximatiariekai, ti'aitame 'Akatsi kaniyeweiyakaitini Yawé ka'enieti.

23 Mawari katiniwayetuirieni kakaiyarixi Ramatsiku miemete meme'iwakai, mipai tiu'erieka: «Kakaiyarixi Tsiriya miemete kememitewaparewie teyu'aitiwamete, neta mekaneniparewikuni xika netiwaruti-mawirieni». Peru miki kakaiyarixi mekanika'una meta naime 'Ixaheri kwieyari.

24 Meta 'Akatsi katiniukuxerieni piinite Yawé tukita timieme katiniutitara, hiki muwa tukita katineunaxiani, metatsiere Kerutsareme kiekariyaritsie naime 'itsikinatsie mawari taiyame kaniutiwewieni kakaiyarixi wahetsiemieme.

25 Meta naime Kura kiekariteyaritsie kanitiwewieni tukite kakaiyarixi wahetsiemieme 'ikwa muwa memitaiyatiweniki hipame kakaiyarixi wahetsiemieme, mipai Yawé hixie 'axakatiniyurienekaitini, yu'ukiyarima wakakaiyari.

26 Hipatita kemituuyi ti'aitametikaku, kepauka mitiukatsutiatsie timieme meta 'imatirieka timieme, metatsiere kemitikatia, katinaka'utiarieni Kuratsie te'aitamete meta 'Ixaheritsie te'aitamete waxapatsie.

27 'Akatsi kaniumini, kaniukateukieni Kerutsareme kiekariyaritsie, peru 'Ixaheri kwieyaritsie memite'uta'aitaxi memuyehetsie pika'ukateukie.

Nu'aya 'Etsekiyaxi kanitsutiani ti'aitati 'utimana.

29

'Etsekiyaxi Kuratsie kemiti'aitakai
(2Kem 29:1-2 - 2Te 18:2-3)

¹ 'Etsekiyaxi xeitewiyari heimana 'auxiwi wiyari kanexeiyakaitini kepauka mitsutia ti'aitati, Kerutsareme 'ukaiti katiniuta'aita xeitewiyari heimana 'atanauka wiyari. Maamaya 'Awiyaxi pititewakai Tsakariyaxi nu'aya.

² 'Etsekiyaxi Yawé kemitinake katiniuyurieni, tutsieya Rawiri 'aixia kemitikatia naimetsie mipai katinikayani.

³ Mexiakame metseritsie meta matari wiyarit-sie ti'aitati, 'Etsekiyaxi katiniuta'aita Yawé tukita 'ituparite meuyepiyaxianiki, meta 'aixia kani-tiyurieni.

⁴ Mawari wewiwamete meta rewitsixi kani-warukuxeirieni memayukuxexeiriwatsie tau ma-natineika hepatsie,

⁵ mipai katiniwarutahiawe:

«Rewitsixi xekeneneu'eni. Hikiri xeme xekeneuyu'iti, meta Yawé tukieya xekeneu'iti, xe'ukiyarima wakakaiyari, meta muwa tita mikati'itiyatika xeketeniwayexiri.

⁶ Ta'ukiyarima mekaniku'eirieni meta Yawé takakaiyari kemikatinake mekatenuyurieni. Mekaniku'eirieni Yawé, meta mekanitixani'erieni hakewa mayeka.

⁷ Yaxeikiata memanutakikatsie takwa kitenieyaritsie mepitehauna, kixeme mekaniutixiani, meta 'ikwa metaiyatiweti mekatenuhayewa metatsiere mepite'uhayewaxi

tukita mawari taiyariyari me'iwewirieti 'Ixaheri Kakaïyarieya.

⁸ »'Ayumieme Kura kiekatari meta Kerut-sareme Yawé 'uximatïarika kaniwarupitïani, tixaiti titewiweme tiyumariutame hepai 'aneme kanayeitïani meta memïnanaimariekaki, xeme hiki kexemite'ixeiya.

⁹ 'Ayumieme ta'ukiyarima 'ixiparaki mekaniukwi'iwa, taniwema 'ukitsi, 'ukari, meta ta'itama yunaiti mekanehapanieni tewa paiti.

¹⁰ »Ne hiki tiratu nekaniwewimiki Yawé 'Ixaheri kakaïyarieya hamatia, tahepaitsita mikaha'akakiri.

¹¹ Merikite, neniwema, yaxetekahuti xepikatehayewani, Yawé kanixe'anayexeiya xeme hixiena xemu'uwaniki, meta xemeyex-eiyaniki, xemite'i'uximayatsiriekaki meta 'ikwa xemikutairiwaniki».

¹² 'Iki rewitsixi mekanihikitini memuyuwairi memiteta'uximayataki:

Kuhati nuiwarimama:

Mahati 'Amatsahi nu'aya, meta Kuheri 'Atsariyaxi nu'aya.

Merari nuiwarimama:

Kihitsi 'Awiri nu'aya, meta 'Atsariyaxi Yarereri nu'aya.

Keritsuni nuiwarimamata:

Kuha Tsimaha nu'aya, meta 'Ereni Kuha nu'aya.

¹³ 'Eritsapani nuiwarimama:

Tsimiri meta Keyeri.

'Atsahapi nuiwarimama:

Tsakariyaxi meta Mataniyaxi.

¹⁴ Hemani nuiwarimamata:

Kehieri meta Tsimi.
 Kerutuni nuiwarimama:
 Tsemahiyaxi meta 'Utsiheri.

¹⁵ 'Iki yu'iwama mewarukuxeiriekā,
 me'uyu'itieka Yawé tukieya takwayatsie
 mekaneutahaxiani memi'itieniki, ti'aitame
 kemitiwara'aitiwakai, Yawé niukieya kemaine.

¹⁶ 'Arikeke mawari wewiwamete Yawé tukiey-
 ata mekaneutahaxiani memi'itieniki. Tukita
 mirayepikai takwa mekateniwayexirieni tinaime
 tita mikati'itiyatika muwa memite'ukaxei, hiki
 rewitsixi mewarukuxeiriekā Kiruni 'akiyaritsie
 mekaniwareukaxirieni.

¹⁷ Mexiakame tukaritsie meta mexiakame met-
 seritsie mekanitsutiani tuki me'itieti, hiki 'ata-
 haika tukariyaritsie tuki kitenie kii meukuwewiy-
 atsie meputihukai. Me'i'itieti memininiki tawarita
 'atahaika tukari mekaniuyurieni, hiki mekani-
 uyurieni tamamata heimana 'ataxewi tukari miki
 mexiakame metseriyaritsie.

¹⁸ 'Arike, 'Etsekiyaxi ti'aitame hixie
 mekaniu'axiani, mipai mekatenitahiawe: «Yawé
 tukieya tekaniu'itieniri, mawari matitaiyariwa
 meta tinaime ketipaimeti mitiuyine, meta
 mexa paa manamarike meta ketipaimeme
 mireuyehiwa.

¹⁹ Metatsiere, tekateniu'itieni meta 'aixia
 tekateniutiyurieni tinaime piinite, kepauka
 ti'aitati 'Akatsi Kakaïyari 'uku'eiriekā
 kati'itiyakame mirayeitia, hiki miki Yawé mawari
 taiyameya hixie tekatenetipini».

²⁰ Kwi ximeri paiti 'Etsekiyaxi ti'aitame
 'anukukeka, kaniwarukuxeirieni kiekaritsie

kiekatari wa'ukiyarima, miki waruta'inieka wahamatia Yawé tukieya manuwe mekanekine.

²¹ Mekaniwarehapani 'atahuta tuurutsixi, 'atahuta muxatsi 'ukitsi, meta 'atahuta muxatsi t̃irixi, metatsiere 'atahuta tsipuri mawari memayaniki te'aitamete wahetsiemieme, tuki hetsiemieme meta Kuratsie kiekatari wahetsiemieme, memi'itiyaniki. Ti'aitame mawari wewiwamete 'Aruni nuiwarimama katiniwaruta'aitiani mawari taiyariyari memitehayeitianiki Yawé mawari taiyameya hetsie.

²² Mawari wewiwamete turutsixi mekaniwarukwini, meta muxatsi 'ukitsi, metatsiere muxatsi t̃irixi, miki waxuriyaki mawari taiyame mekaniuxurimani.

²³ 'Imatirieka, tsipuri memiyetuiya memi'itiyaniki hetsiemieme mekaniwarehapani ti'aitame hixie meta yunaime teiteri wahixie miki wahetsie memutimeniki,

²⁴ mikita mewarukwika waxuriyaki mawari taiyame mekaniuxurimani miki mawariki memi'itiyaniki yunaiti 'ixaheritsixi, mipai ti'aitame mitiuta'aitakaiki miki mawari taiyariyari meta 'itiya mawariyari yunaime 'ixaheritsixi wahetsiemieme ke'utimawarienike.

²⁵ 'Etsekiyaxi Yawé tukieyata rewitsixi kaniwaru'uitiani, tepia mutitiririkaki, 'aripaki meta kanarite 'etsimipepeki memite'ukayuitiwaniki, yemeki Rawiri kemitiwaru'aitiakai, Kakaiyari niukameya Natani, meta Kahari, tewi mitixeiya ti'aitame hetsiemieme. 'Iki Yawé 'aitsikaya mekaniyetuani niukametemama.

²⁶ Rewitsixi 'amekaniti'ukaitini kanarite

mete'u'iti Rawiri miti'aitakai, meta mawari wewiwamete kuxineta mepi'ikai.

27 Hiki 'Etsekiyaxi katiniuta'aita mawari taiyariyari miwewiyaniki mawari taiyametsie. 'Amitiuyutsutia mawari taiyariyari, kaniut-sutiarienita kwikari Yawé hetsiemieme, meta kuxineta hitsierieti, yuniti kanarite Rawiri miti'aitakai, 'Ixaheri kwieyaritsie ti'aitame.

28 Yunaiti teiteri mekanititunuma'ukaitini 'at-sita kepaukake mitiutahayewarie mawari taiyarieti, mexi kwikamete mekwikakai meta kuxineta 'utihitsieriwakai.

29 Kepauka memite'utahayewaxi mawari taiyariyari mewewieti, ti'aitame meta yunaiti hamatiana memu'uwakai mekaniukahixima'uni Yawé mariweme me'ayeitiati.

30 Ti'aitame 'Etsekiyaxi meta teiteri wa'ukiyarima rewitsixi mekaniwaruta'aitiani Yawé hetsiemieme memitikwikaki niawari Rawiri meta 'Atsahapi tewi mitixeiya memitiwewi. Rewitsixi meyutemamawieti yamekatenikakine, meta miki mekaniukahixima'uni mariweme me'eyeitiati Kakaiyari.

31 'Etsekiyaxi mipai kaniutayini: «Hiki xeme Yawé hetsiemieme xemi'yu'iti, xekenakini tukieya manuwe mawari xekeneyetua meta 'imikierite pamipariyutsi xeketenahiaweni».

32 Hiki teiteri tuurutsixi mekaniwa'atiani haika tewiyari heimana tamamata meyupaimeme, xeitsienituyari muxatsi 'ukitsi, huta tsienituyari muxatsi tixixi, mawari taiyariyari memakineki Yawé hetsiemieme.

³³ Metatsiere tuurutsixi 'ataxewi tsienituyari meta muxatsi haika miriyari mekaniyetuiyani memipatsieniki memitimawarieniki.

³⁴ Peru mawari wewiwamete memikayuwaikawakaiki mepikawakemakai tewaxi memiyumiire memiwatikwipieni, wa'iwama rewitsixi mekaniiwaruparewieni miki 'uximayatsika memininiki, 'ana hipatita mawari wewiwamete mekaniiuyu'itieni, matsi rewitsixi xeiya mekatennayeitiwakaitini 'itiya hepaitsita keyuri mawari wewiwamete.

³⁵ 'Ana waikawa mawari taiyariyari kaniuwewiyani, meta wiya temitaxewiniki mawariyari hetsiemieme, meta kaxie winuyari mawariyari xexuime mawari taiyariyari hetsiemiemete.

Mipai tawari katiniutsutiarieni Kakaiyari 'ayex-eiyarieti Yawé tukita.

³⁶ 'Etsekiyaxi meta teiteri yunaiti mekaniiyukatemamawieni Kakaiyari teiteri muwarukuha'aritiaki, naime miki yapauka memiteyurieniki.

30

Patsikwa 'ixiarariyari kemitiuwewiya

¹ 'Etsekiyaxi niuki kaneutani'axiani naitsarie 'ixaheritsixi teiteriyari wahetsia meta Kuratsie kiekatari, metatsiere nuiwarite 'Epirahinitsie miemete meta Manatsexi nuiwarimama, Yawé tukieya manuwe memiyukuxeirieniki Kerutsareme kiekariyaritsie Patsikwa 'ixiarariyari memiwewieniki Yawé 'Ixaheri Kakaiyarieya hetsiemieme.

² Ti'aitame, meta teiteri wa'ukiyarima meta yunaiti teiteri, mipai mepite'uxataakai kename Patsikwa 'ixiarariyari mewewienikekai hutarieka metseritsie.

³ Peru mepika'uyiwekaxia miki tukaritsie yumireti 'akuxi mawari wewiwamete memikayu'itiwawekaiki, meta teiteri Kerutsareme memikayukuxeiriwawekaiki.

⁴ Kememite'uxa ti'aitame meta yunaiti teiteri muwarunakixiki,

⁵ yamekateniuxata naitsarie 'Ixaheritsie mipai memitekaxatiarieniki, Rani kiekariyaritsie me'itsutame 'atsita Weritsewa paiti, yunaiti meke'uyukuxeirienike Kerutsaremetisie Yawé hetsiemieme Patsikwa 'ixiarariyari memiwewieniki, 'Ixaheri Kakaïyarieya, miixa panuyemiekaïri memika'iwewiwawekai kemire'uxa.

⁶ Hiki naitsarie 'Ixaheritsie meta Kuratsie mekaneutayeixiani niuki tuayamete ti'aitame meta 'iparewiwametemama waxapate me'uhurieti, kemira'aitakai ti'aitame mipai meteniwakuxaxatiwakaitini:

«'Ixaheritsixi teiteriyari, Yawé hetsia xekeneu'axia, 'Apirahami, 'Itsahaki meta 'Ixaheri wakakaïyari, mikita xehetsia munuaniki xeme xemuyuhayewaxi, 'Atsiriy-atsie te'aitamete wahetsia xemutawikwei.

⁷ Xe'ukiyarima wahepai xepika'aneni, meta yu'iwama wahepai, Yawé memuku'eiri me'eye'unieti memaki, yu'ukiyarima wakakaïyari. 'Ayumieme miki xeme nanaimariwamete kanixe'ayeitiani, hiki kexemiteneniere.

⁸ Yu'iyaritsie xetsetse'iti xepikahayuyeitiaka, xe'ukiyarima wahepai. Yawé hetsia xekeneyuyetua, meta tukitana xekeneutahaxia, miki patsiekame mayeitia yuheyemeki. Yawé yukakaiyari xekenayexeiyani, ha'ati mitihayewaki xehepaitsita.

⁹ Yawé hetsia xika xe'u'axiani, xe'iwama meta xeniwema memiwarehapa mepiwaretinenimayata, hiki memanuaxiani 'iki kwieyaritsie mepeyiwekaxiani. Yawé xekakaiyari pituyukanenimaya meta mireuyehiwirieni piyiwe. Xika xeme ta'aurie xehaxirieni hetsiana xe'u'axiani, miki hatsuaku pikaxeku'eirieni».

¹⁰ Hiki niuki tuayamete mekaneutayeixiani naitserie 'Epirahini meta Manatsexi kiekarite-yaritsie, 'atsita Tsawuruni paiti mekaniye'axiani, peru yunaiti mekaniutinawekaitini meta mekaniwananaimakaitini.

¹¹ Matsi, hipati 'Atsexi nuiwarimama, Manatsexi meta Tsawuruni wanuiwarima tixai mekatehayuyeitiaka mekanekine Kerutsaremetsie.

¹² Metatsiere Kuratsie kiekatari, Kakaiyari waruyuitiaku, yamekatenikakine meyuxewiti ti'aitame kemira'aitakai meta teiteri wa'ukiyarima, Yawé niukieya kemainekai.

¹³ Hiki hutarieka metseritsie, Kerutsaremetsie mekaniuyukuxeirieni yumiireti teiteri Paa mikakuxanariyarietika 'ixiarariyari memiwewieniki.

¹⁴ Kerutsareme kiekariyaritsie mawari taiyame kakaiyarixi miwahetsiemietikai mekaniuti'una meta 'ikwa taiyamete, hiki Kiruni 'akiyaritsie mekateneukaxirieni.

15 Hutarieka metseriyaritsie tamamata heimana nauka tukariyaritsie, Patsikwa 'ixiarariyari mekaniuwewieni. Mawari wewiwamete meta rewitsixi mekaniyutitetewiya, 'ayumieme mekaniuyu'itieni meta mawari taiyariyari mekaniuwewieni Yawé tukieya manuwe,

16 hiki 'arike miyamete'uyurieka kememite'uximayakai mipai mekatenu'uni, kemaine 'iniari niukiyari Muiťsexi kemiraka'utia, tewi Kakaiyari hetsia mieme. Rewitsixi mawari wewiwamete xuriya mekaniwayetuiwakaitini, mikita mawari taiyame mekaniki'iyakaitini.

17 Yumiireti teiteri memikayu'itiwawekaiki 'akuxi, Yawé hetsiemieme memipatsieniki muxatsi Patsikwa 'ixiarariyaritsie miemete rewitsixi mekaniwarukwini wahetsiemieme.

18 Yumiireti teiteri 'Epirahinitsie, Manatsexitsie, 'Itsakaxitsie meta Tsawurunitsie memeyeki Patsikwa mekaniukwani mekayu'itiekai, kemainekai 'aitsika yamekatekakineka. Peru 'Etsekiyaxi mipai katiniuyunenewieni wahetsiemieme: «Ketiniwareuyehiwiri, Kakaiyari 'aixia pemituuka'iyari,

19 kemi'ane memiyuwairi yu'iyariki Yawé 'ahetsie memitewiyaniki, wa'ukiyarima wakakaiyari, tsepa mikayu'iti 'a'aitsika kemaine 'itiya hepaitita mitikuxata».

20 Hiki Yawé 'Etsekiyaxi kaniu'enieni meta teiteri katiniwareuyehiwirieni.

21 Hiki 'ixaheritsixi Kerutsareme memuwakai waikawa meyutemamawieti Paa mikakuxanariyarietika 'ixiarariyari

mepiwewiekai, 'atahuta tukari mepuyuri.
Rewitsixi meta mawari wewiwamete
Yawé mepiniawakai xexuime tukaritsie,
meputikwikakai meteyuitiati.

²² 'Etsekiyaxi rewitsixi kaniwarutawairitiani
Yawé hetsiemieme mete'uximayati
memayuti'uitiakai.

'Atahuta tukari 'ixiarari mekanuwewieni
meta patsikwa 'ikwaiyari mekanikwakitini,
memuyuxewiniki mawariyari mewewieti meta
Yawé meniawati, yu'ukiyarima wakakaiyari.

²³ Merikite yunaiti teiteri me'uyu'enieka
yamekateniuxata tawarita 'atahuta tukari
'ixiarari memiwewieniki, hiki miki waikawa
meyutemamawieti 'ixiarari mekanuwewieni
miki 'atahuta tukari.

²⁴ Hiki Kura kwieyaritsie ti'aitame 'Etsekiyaxi,
teiteri memiyuxeirikai kaniwarumini
xeimiriya tuurutsixi meta 'atahuta miriyari
muxatsi, metatsiere Kuratsie kiekatari
wa'ukiyarima mekanikwarumini, xeimiriya
tuurutsixi meta tamamata miriyari muxatsi.
Hiki yumireti tawari mawari wewiwamete
mekaniyu'itieni.

²⁵ Yunaiti teiteri Kuratsie memiyuxeirikai
mekaniyutemamawiekaitini, yaxekiatata
mawari wewiwamete, rewitsixi meta 'Ixaheri
kwieyaritsie memeyeki, tewanarixi 'ixiararipa
memu'axia, metatsiere Kura kwieyaritsie
kiekatari.

²⁶ Kepauka paititi 'amuyeikakai Tsarumuni,
Rawiri nu'aya, 'Ixaheritsie ti'aitame,
Kerutsaremetsie pikawewiyawekai 'ixiarari
mipai titemawierimati.

27 Hiki 'arike rewitsixi meta mawari wewiwamete 'ameti'uka Kakaiyari mekani-utawawirieni teiteri 'aixia miwayurieniki, hiki Yawé kaniwaru'enieni, wanenewieri muyuawitsie paiti kaniu'enieni, muyepatsietsie paiti Kakaiyari muwayeka.

31

1 Kepauka meutiparixi 'ixiarari, yunaiti 'ixaheritsixi mana memu'uwakai Kura kiekariteyarisie mekaniukakine tetexi mipatsietika meta 'uka kakaiyariyari 'Atserá 'ikiyari memititaraki. Metatsiere naime mekaniuti'una mawari matiwewiwa meta kakaiyarixi watuki muxuawekai Kura kwieyaritsie meta Wenikamini, 'Epirahini metatsiere Manatsexi kwieyaritsie. 'Arike miya mete'uyurieka, miki yunaiti yukiekaritetsie mekanakunuaxiani meta yuxexuiti yukie.

*Kakaiyari me'ayexeiyati hekwameki
kememite'itsutia
(2Kem 31:20-21 - 2Te 18:5-7)*

2 Hiki 'Etsekiyaxi mawari wewiwamete meta rewitsixi 'aixia katiniwaru'uitiani, para yuxexuiti yu'uximayatsika memexeianiki, para mawari taiyariyari memiwewiekaki meta temitaxewiniki mawariyari, Kakaiyari memayexeianiki, memutikwikaniki Yawé meniawati, meta Yawé tukieya kitenieyaritetsie memite'uximayakaki.

3 Hiki ti'aitame yutewama yayupaimeme kaniwayetuani mawari taiyariyari ximeri mieme meta taikai mieme memakineki, meta mawari taiyariyari xawatitsie mieme, meta metseri

mihekwa hetsiemieme, meta patsiekameki memuyukuxexeiriwatsie mieme, kemire'uxa Yawé 'aitsikayatsie.

⁴ Yaxeikiata Kerutsareme kiekatari mipai katiniwaruta'aitiani mawari wewiwamete meta rewitsixi memitewayetuirieniki tita mitiwahetsiemiemetikai, miki Yawé 'aitsikayatsie mieme memite'uximayakaki xeikia

⁵ Yapauka miyamete'uta'aitiarieka, 'ixaheritsixi tiwaikawa mekateniyetuan matari mitiukaxuawerixi 'imiarite, kaxie winuyari, huriwu hatseitiyari meta xiete, meta tinaime 'itsita timieme. Metatsiere tita memiteheuxeiyakai tamamatatsie mieme xeime mekateniyetuan.

⁶ Metatsiere, 'Ixaheritsie kiekatari meta Kura kiekariteyaritsie kiekatari mekateniyetuan tamamatatsie mieme xeime tuurutsixi meta muxatsi, meta tinaime mekateniyetuan tita mitipatsiekai Yawé yukakaiyari hetsiemieme, hiki miki naim mekateniukuxeiriexiani.

⁷ Hiki hairieka metseriyaritsie mekanitsutiani piinite mete'ukuxexeiriwati, hiki 'atahuta metseriyaritsie mekateniutahayewa.

⁸ Kepauka 'Etsekiyaxi meta 'iparewiwame-temama memite'uxei 'aneneti tiuwetikaime, 'ana Yawé 'aixia mekateniutahiawe meta teiterimama 'ixaheritsixi.

⁹ Hiki 'Etsekiyaxi rewitsixi meta mawari wewiwamete kaniwaruta'iwawiya mana mitikuxeirietika hepaitsita memite'itaxatianiki,

¹⁰ hiki mawari wewiwamete tiwa'aitiwame 'Atsariyaxi Tsaruki nuiwarieya, mipai katinita'eiya: «Kepauka teiteri memitsutia

Yawé tukita 'imikieri mete'atiwati, tepeixeiya ta'ikwai 'atsita panuyuhayewa, Yawé yuteiterima muwaparewieki. Miki mana mititixeirietika mutiyuhayewaxi katinihikitini».

¹¹ Hiki 'Etsekiyaxi katiniuta'aita Yawé tukita kii ti'utamete 'aixia mireuye'itiarieniki, hiki mipai mekatenuyurieni.

¹² Tinaime mekatenuiti'uta 'aixia metekahuti 'imikierite, tamamatatsie timieme xeime, meta piinite mitiyetuiya mitipatsietika. 'Iki pitihiritiariiekai Kunaniyaxi rewi tewiyari, meta 'iwaya Tsimi piparewiekai.

¹³ Ti'aitame 'Etsekiyaxi meta 'Atsariyaxi, miki Kaka'yari tukita miti'uximaya, miki mekaniwarutihawe hipameta te'iwiyamete, Kehieri, 'Atsatsiyaxi, Nakati, 'Atsaheri, Kerimuti, Kutsawari, 'Eriheri, 'Itsimakiyaxi, Mahati, meta Wenahiyaxi, 'iki mepiwayetua Kunaniyaxi mitiwa'aitiakaki meta 'iwaya Tsimi.

¹⁴ Rewi tewiyari Kurehe 'Imina nu'aya, tau manatineika hepatsie kitenie mukeka, kaniuhiritiarieni 'imikieri Yawé hetsiemieme miyetuiwa, meta mitiwayetuiwaniki miki 'imikieri Yawé hetsiemieme miyetuiyakai, meta piinite mitiyetuiya mitipatsietika.

¹⁵ Miki pitiwa'aitiakai, 'Ereni, Minikamini, Ketsuha, Tsemahiyaxi, 'Amariyaxi meta Tsekaniyaxi. 'Iki mepukutetikatei mawari wewiwamete wakiekaritetsie. Miki mepitewatapitiwakai 'aixia 'anemeki 'imikieri yu'iwama, 'amemiyumate meta yaki memiyumate.

¹⁶ Mekatenitapitiariwakaitini 'ukitsi haika wiyari memexeiyatika meutiyyune

memaka'uxa miki wanuiwari xapayaritsie, meta yamemite'uximaya Yawé tukita, kepauka memite'uximayakai meta titaki memite'uximayakai.

¹⁷ Mawari wewiwamete mekanaka'utsiwakaitini yuxexuiti yunuiwarima wahetsie, meta rewitsixi xetewiyari wiyari memihitika, kememite'uximaya meta kepauka memite'uta'uximayatanitsie.

¹⁸ Memaka'utsiwakaitie tiri 'etsimemuyumate, 'ukarawetsixi, tiri 'ukitsi meta tiri 'ukari mekanaka'utsiwakaitinita, tatsiari yunaiti, miki yunaiti mepatsiekame mekanayuyeitiakaitini heitseriemeki.

¹⁹ Metatsiere, naitsarie kiekaritetsie mekanixuawekaitini teiteri memihiritiariiekai 'ikwaite memitewayetuiwaniki mawari wewiwamete 'Aruni nuiwarimama, meta rewitsixi watsata xapatsie memaye'ukai meta kiekari 'aurie memeutitekai.

²⁰ 'Etsekiyaxi matsi yaxeiata katiniuyurieni naitsarie Kura kwieyaritsie, 'aixia 'anemek, heitseriemeki meta yatikamiet Yawé hixie yukakaiyari.

²¹ Tinaime tita mitiuta'aitaxi Kakaiyari tukieya hetsie timieme, yu'iyariki yuwairiyati katiniuyurieni, kemaine 'aitsika meta 'iniri niukiyari, Kakaiyari kaniutiwauni, hiki hepaitsitana yakatiniuyini.

32

*Tsenakeriwi Kura kwieyaritsie kemtitaha
(2Kem 32:9-19, 20-21 - 2Te 18:17-35, 19:35-37,*

Kits 36:2-20, 37:36-38)

¹ 'Arike 'Etsekiyaxi matsiikime 'iniari tiuyurieku keyamitikamiekai, 'ana Tsenakeriwi, 'Atsiriya kwieyaritsie ti'aitame, Kura kwieyaritsie kanitahani, hiki kiekarite kuraruyari 'ematitetewa warita mekanayaxetikine, meyuwai'riyati memika'unaki.

² Kepauka 'Etsekiyaxi mitiutamari kename 'uhamiekai Tsenakeriwi Kerutsareme hetsie, para mikita mitamieniki,

³ yunaima kaniwarukuxeirieni kuyaxi tewa'aitiwamete meta teiteri wa'ukiyarima, katiniwaruta'aitiani putsute memeukanaxianiki kiekari warita mumanetikatei, hiki miki yamekatenikakine.

⁴ Hiki yumiireti teiteri mekaniuyukuxeirieni, yunaiti meyuparewieti haixa mekaneukanaxiani meta 'aki mana muyekatei, para te'aitamete 'at-siriyutsixi kepauka memi'axiani haa waikawa memikataxeiyaki.

⁵ 'Etsekiyaxi kamati, kuraru 'amatayewa muka'unariekai naime 'aixia kaniuyurieni meta tuxiyu mikitsie kaniutiwewieni, metatsiere hutarieka mieme kuraru 'amatayewa kaniutawewieni herie mieme, meta Rawiri kiekariena kwie mutihiniyarietsie kuraruyari 'ahatitetewame kaniutiwewieni, meta katiniuta'aita pitsika waikawa mitiwewiyaniki meta tepia mixikirawi yuhetsie nunuwame.

⁶ Hiki kuyaxi tewa'aitiwamete kuyaxi wahixie kaniwati'uitiani, meta warukuxeirieka teiteri memayukuxexeiriwatsie kiekari kitenieyaritsie, mipai katiniwarutahiawe:

7 «Xekeneyuwairiyani, xepikaheumamaka. Xepika'utiweranareni, kepauka 'Atsiriyatsie ti'aitame kuyaxi yumireme miwa'atiani, tame xeime tekanexeiyani waikawa matsi mitirikaiye.

8 Miki teiteri wahetsie kaniuyukutirikariyani, tameta Yawé takakaiyari hetsie tekaneuwaireni, miki kataniparewieka meta miki pita kaniuyutamemiwani tahetsiemieme». 'Etsekiyaxi niukieya me'u'enieka Kura kwieyaritsie ti'aitame, 'ana teiteri wa'iyari 'aixia kaniuyini.

9 Tsenakeriwi, 'ana Rakixi mirakutewatsie kaniukateitini yunaime yukuyaxima wahamatia, hipame yuparewiwamete kaniwarutani'ani mipai memitewaretahaweki 'Etsekiyaxi, Kura kwieyaritsie ti'aitame, meta yunaime Kuratsie kiekatari Kerutsareme kiekariyaritsie memuwakai:

10 «Mipai kanaineni Tsenakeriwi, 'Atsiriya kwieyaritsie ti'aitame: “¿Ketitatsie xetewiyati xete'ane Kerutsareme xemiye'uwa, panatsi kiekari warita 'ari tekahatetika?

11 ¿Kari 'atsixepikatemate miki 'Etsekiyaxi kanixekwimiki haakaki meta hariyaki? Miki katinixe'itaiyani mipai mitixekihawe kename Yawé xetawikweitsitiani nekaxekwini.

12 ¿Tami 'Etsekiyaxi katiuyuri, miti'unaxi tukite meta mawari matiweyiwa kakaiyarixi wahetsiemieme, meta mipai mitiuta'ai Kura kwieyaritsie kiekatari meta Kerutsaremetari memitemawatiweniki xeimetsie xeikia, meta mikitsie xeikia 'ikwa memititaiyaniki?

13 ¿Xiari 'atsixepikatemate ne meta meripaiti ne'ukiyarima ketemiwaruyuri yunaime

nuiwarite kwiepa memitama? ¿Kamitsi miki nuiwarite wakakaiyarixima wahetsie mete'utanua nemikawaka'unaki?

¹⁴ Mipaita yaxeikia miki nuiwarite ne'ukiyarima memiwaruka'unaxi miki wakakaiyarixi nixewiti mikawarutawikweitsitia hepai nehetsia, yaxeikiata 'iki xekakaiyari pikayiwekaxiani mixetawikweitsitiani nehetsia.

¹⁵ Nika xete'u'itaiyarieni meta 'Etsekiyaxi yuri xepikate'eririeka. Xepika'i'enieka. Xika nixewiti kakaiyari miki nuiwarite meta te'aitamete wahetsia mieme ka'uyiwekaxiani miwatawawikweitsitiani nehetsia meta meripaiti ne'ukiyarima te'aitamete wahetsia, xeme matsi xekakaiyari pikayiwekaxiani mixetawikweitsitiani nehetsia"».

¹⁶ Tsenakeriwi parewiwametemama mepiyeweyakai Yawé Kakaiyari hepaitsita 'axame'utiyuati, meta 'Etsekiyaxi 'iparewiwameya hepaitsita.

¹⁷ Yaxeikiata Tsenakeriwi xapa kaneni'ani Yawé, 'Ixaheri kakaiyarieya, hepaitsita 'axahaiti, mipai 'utaiti: «Hipati nuiwarite wakakaiyarixi hepai memika'uyiwekaxia memiwatawawikweitsitiani nehetsia, mikita 'Etsekiyaxi kakaiyarieya pikayiwekaxiani yuteiteriama muwaxina nehetsia».

¹⁸ Tsenakeriwi parewiwametemama, mekaniwahiwekaitini karima Kerutsareme kiekatari wapaiti memaka'ukai kurarutsie. Mekaniwahiwekaitini hepirayu niukiyariki, para memitimamaniki meta mipai kiekari memiteka'unaki.

19 Kerutsareme kiekatari wakakaiyari mekanixatakaitini hipati nuiwarite kwiepa memitama wakakaiyarixi wahepai 'aneme mekanayeitiwakaitini, mamaki memiwewiyatika.

20 Hiki 'ayumieme, ti'aitame 'Etsekiyaxi meta Kakaiyari niukameya Kitsariyaxi 'Amuxi nu'aya muyuawitsie meheutineniereti karima mekani-uyutanenewieni.

21 Hiki Yawé yuniuki tuayame kaneyeni'ani miwakwiniki yunaime kuyaxi meta tewa'aitiwamete 'Atsiriyatsie ti'aitame memakuteitsie, meta kuyaximama tewa'aitiwamete, hiki miki 'ana yutewiyati kanakunuani yukiekaritsie. Meta kepauka meutaha yukakaiyari tukita, niwemamatiti mekanimieni.

22 Mipai Yawé 'Etsekiyaxi katiniutawik-weitsitiani meta Kerutsareme kiekatari, Tsenakeriwi 'Atsiriyatsie ti'aitame hetsia, meta yunaime memeye'uniekai, meta naitsarie miki kwieyaritsie kayuwati kaniwarupitiani.

23 Hiki 'ayumieme yumireti mekanekine Kerutsareme Yawé mawari meheyetuirienike, meta 'imikierite 'Etsekiyaxi hetsiemieme, Kura kwieyaritsie ti'aitame. Mipai tiuyiku 'Etsekiyaxi naitsarie nuiwarite watsata kaniutamariwa.

'Etsekiyaxi kemitiutakwinixi

(2Kem 32:24-33 - 2Te 20:1-21, Kits 37:21-38, 38:1-8)

24 Hiki 'iya tukaritsie 'Etsekiyaxi waikawa katiutakwine hiki kaniuminitima. 'Ana Yawé kaniutahiawe 'aixia miyurieniki, mikita kanita'eiya meta 'iniari mariweme kanixeitsitiani.

25 Peru 'Etsekiyaxi Kakaiyari ke'aixia miyuri pamipariyutsi pika'ipitia, matsi pita kaniuyuta'ire. Mikiki Yawé waikawa kaniuyeha'ani hepaitsitana, meta Kura Kerutsareme wahepaitsita.

26 Hiki 'Etsekiyaxi meta Kerutsareme kiekatari wahamatia, 'aixia mekaniuyuyurieni kemituuyuta'irekai, hiki kepauka miki 'amuyeikakai, Yawé tawari pika'uyeha'a miki wahamatia.

'Etsekiyaxi kerexeyati matia meta kemitiumi

27 Merikite 'Etsekiyaxi matsi waikawa rexeiyati kanayani meta waikawa 'aixia katinixeyariekaitini. Katiniuti'uta waikawa piratate, hurute, tetexi witsimi'anene, witsimitiu'iatika, tepia yuhetsie nunuwame meta hipame piinite miraye'atika.

28 Miki kiite pexeyakai muwa ti'utame tiriku, kaxie winuyari meta hatseiti, meta kurarute yunaimetewaxi wahetsiemieme pexeyakai meta kurarute muxatsi wahetsiemiemete.

29 Yaxeikiata kiekarite waikawa kaniutiwewieni, miki wakaitsixi meta muxatsi yumireme yakimemipepe meta 'amemitepapa pitwarexeiyakai, miki Kakaiyari waikawa katiniyetuirieni.

30 Metatsiere 'Etsekiyaxi katiniuyurieni Kikuni haixayari meuna, tetiata kwietia pita mitahuyetia Rawiri Kiekariena tau makayuyuipeke hepatsie mi'atia. 'Etsekiyaxi naimetita titiutiwewi hepaitsita 'aixia katiniuyini.

31 Hiki kepauka Wawiruniyatsie ti'aitame parewiwametemama yuni'arima memiwareyeni'a memiti'iwauniki mariweme

'iniari mitiuyiki miki kwieyaritsie, 'ana Kakaiyari 'Etsekiyaxi kaniuku'eirieni mita'iniataki meta naime yamiretimaniki 'iyarieya kemi'anekai.

³² Tawarita kemituiyi 'Etsekiyaxi ti'aitametikaku, meta 'aixia kemituiyuri, Kakaiyari niukameya Kitsariyaxi 'Amuxi nu'aya kemituiunierixi xapayaritsie katinaka'utiarieni meta Kuratsie meta 'Ixaheritsie te'aitamete waxapayaritsie katinaka'utiarieni.

³³ Hiki 'Etsekiyaxi kaniumini yu'ukiyarima waheima kaniukateukieni Rawiri nuiwarimama memuyehetsie. Yunaiti Kuratsie meta Kerutsareme kiekatari mekaneikuxeiya 'aixia me'utiyuati hepaitsitana. Hiki nu'aya Manatsexi katiniuta'aita 'utimana.

33

*Manatsexi, Kuratsie ti'aitame
(2Kem 33:1-10, 18-20 - 2Te 21:1-10, 17-18)*

¹ Hiki Manatsexi tamamata heimana huta wi-yari kanexeiyakaitini kepauka mitsutia ti'aitati, Kerutsareme 'ukaiti katiniuta'aita huta tewiyari heimana tamamata heimana 'auxiwi wiyari.

² Peru Yawé kemikatinake katiniuyurieni, hipame nuiwarite wayeyari 'uweiyati kanayani Yawé muwarayeweyakai 'ixaheritsixi wahixie.

³ Kakaiyarixi watukite 'aixia kaniutiuyurieni paapaya 'Etsekiyaxi miti'unakai, meta matsi, mawari taiyamete kaniutiwewieni waharitsixi wahetsiemieme meta 'uka kakaiyariyari 'Atserá 'ikiyari kaniutiwewieni. Yunaime xurawetsixi wahixie kaniukatunumakeni meta kaniwarayexeiyakaitini.

4 Yawé tukita mawari taiyame kaniutiwewieni, miki hetsiemieme Yawé mipai putayikai: «Kerutsareme nepukani neheyemeki».

5 Yawé tukieya takwaya naime hutametsie mawari taiyame kaniutiwewieni xurawetsixi muyuawitsie miemete wahetsiemieme.

6 Yuniwema mawari taiyariyari kaniwarayeitiani mayeweritsie Weni-Hinuni mirayetewatsie, mariweme katiniyurienekaitini 'axami'anetsie tiwiyati, katiniyukewaiyakaitini meta kemitiyini katinimaiwekaitini, meta mikite wahamatia memitekuxata kaniwarayexeyakaitini. Yawé kemikatinake xeikia katiniyurienekaitini, hiki mipai katiniyehaxiatiani.

7 'Atserá 'uka kakaiyariyari 'ikiyari mitawewiekai Kakaiyari tukieyata kaneitakeni, miki hetsiemieme Kakaiyari mipai Rawiri mitiutahiawekai meta nu'aya Tsarumuni: «'Iki tukita Kerutsareme muwetsie, kiekari nemenayexeitsie yunaime 'Ixaheri nuiwarimama watsata, muwa nepayekani neheyemeki.

8 Hatsuaku tawarita 'ixaheritsixi nepikawarayeweiya kwie wa'ukiyarima nemıwayetuiritsie, xika metehaye'atiaka xika yametekahuni naime kenemitiwaruta'aitia, tatsiari, naime ne'iniari niukiyaritsie meta ne'aitsikatetsie nemıwayetuii Muitsexi ya'utainekaku».

9 Manatsexi Kuratsie kiekatari meta Kerutsaremetari kaniwareuyexirieni, miki matsi waikawa 'axameteyurieti mekanakine keyuri hipati nuiwarite Yawé miwaruka'unaxi

'ixaheritsixi wahixie.

¹⁰ Yawé yuteiterima kaniwarutahiawe meta Manatsexi, peru miki mepikahenu'eni.

¹¹ 'Ayumieme Yawé kaniwareni'airieni 'Atsiriyatsie ti'aitame kuyaximama wa'ukiyarima, hiki miki Manatsexi mekaniuwiya meta Wawiruniya paiti mekaneihana tsurieyatsie me'iwiwitiaka meta wurunitse tepiyari kaunariyariki.

¹² Hiki miya tiuka'eniwati, Yawé kaniutahiawe, yu'ukiyarima wakakaiyari, tixaiti karayuyeitiati yemeki kaniyuyetuani naimeki.

¹³ Yawé nenewieri kaniupitiani, mikita kani'enieni waikawameki kemitiwawirie kai kanipitiani Kerutsareme makunuani meta kanipitiani tawarita mitita'aitaki. Mipai 'ana Manatsexi katinetimani kename Yawé Kakaiyari xeikia hiki.

¹⁴ Hiki miyatiuyiku, Manatsexi kuraru 'amatayewa 'a'atitewame kaniutawewieni Rawiri kiekariena warita, Kikuni warita tau makayuyupike hepatsie putsutikai, meta mayeweritsie puyehane kai, 'atsita kitenie Tsapa mititewatsie, meta 'Uperi warita kanahanekaitini. Metatsiere, kuyaxi wa'ukiyarima kaniwaruku'uitiaxiani naime Kura kiekariteyari yukuraru 'amatititi mexeiyatikatsie,

¹⁵ meta Yawé tukieyata nuiwarite kwiepa memitama wakakaiyarixi kaniwarayexirieni meta kakaiyari 'ikiyari, 'ateewapai kiekari warita mekatene xirieni naime mawari taiyame mutiwewiekai yemuritsie Yawé tukieya manuwekai meta Kerutsareme.

¹⁶ Hikita mawari taiyame Yawé hetsiemieme

'aixia kaniuyurieni, hiki mana memiyuxewiniki mawariyari kaniuwewieni meta pamipariyutsi mawariyari, meta Kuratsie kiekatari Yawé memayexeiyaniki kaniwaruta'aitiani, 'Ixaheri Kakaiyarieya.

¹⁷ Peru miyatiti, teiteri yaxeikia mepiyeweiyakai kakaiyarixi watukiteta metemawatiweti, peru Yawé yukakaiyari hetsiemieme mepiteyuriekai xeikia.

¹⁸ Hipatita kemiŋiuyi Manatsexi ti'aitametikaku, nenewierieya Kakaiyari kemiŋiutahiwixi, meta Kakaiyari niukametemama kememite'ikuxaxatiwakai Yawé hetsiemieme, 'Ixaheri Kakaiyarieya, katinaka'utiarieni kemiŋiuyi xapayaritsie 'Ixaheritsie te'aitamete waxapatsie.

¹⁹ Naiti 'axakemiŋiuyuri meta Kakaiyari 'aye'unieti kemiratia, hakewa tuki 'etsimipepe metiwewi, 'uka kakaiyariyari 'Atserá kemiŋiutiwewi meta hipame kakaiyarixi, 'arike Kakaiyari hixie kemiŋiyuyetua, nenewierieya meta Yawé kemiŋitita'ei, 'iki naiti katinaka'uka kemiŋiuyi xapayaritsie Kutsahi miraka'utiatsie.

²⁰ Hiki kepauka Manatsexi mumi, kaniuka-teukieni yuparatsiyuta, hiki nu'aya 'Amuni kanit-sutiani 'utimana ti'aitati.

*'Amuni, Kuratsie ti'aitame
(2Kem 33:21-25 - 2Te 21:19-24)*

²¹ Merikite kepauka 'Amuni mitsutia ti'aitati xeitewiyari heimana huta wiyari pexeyakai, hiki Kerutsareme 'ukaiti huta wiyari pitiuta'ai.

²² Peru Yawé kemikatinake pitiuyuri, 'uki-yarieya Manatsexi kemiŋiuyuri hepai, kakaiyarixi

yunaime katiniwarutimawirieni 'ukiyarieya miwarutiwewiekai meta warayexeiyati kanayani.

²³ Peru, yu'ukiyari Manatsexi hepai pika'uyi, Yawé hetsia pikayuyetua, matsi waikawa 'axapitiyurienekai xeikia.

²⁴ 'Amuni parewiwametemama mekaniku'eirieni me'eye'unieti mekanakine, hiki mekanimieni paratsiyutana.

²⁵ Peru teiteri, yunaime mekaniwarukwini kemi'ane me'iku'eirieka memimi, hiki hetsiena mieme nu'aya Kutsiyaxi ti'aitame mekanayeitiani.

34

Kutsiyaxi, Kuratsie ti'aitame

(2Kem 34:1-2, 8-13 - 2Te 22:1-2, 3-7)

¹ Merikitsi Kutsiyaxi kepauka mitsutia ti'aitati 'atahaika wiyari kanexeiyakaitini, hiki Kerutsareme 'ukaiti katiniuta'aita xetewiyari heimana tamamata heimana xewi wiyari.

² Kutsiyaxi Yawé kemitinake katiniuyurieni, naimetsie yakatinikamiekaitini meripaiti tutsieya Rawiri kemitikatia, ni'etsiwatima pika'iku'eiri.

³ Hiki 'atahairieka wiyaritsie ti'aitati, 'akuxi temaikititi, Kutsiyaxi kanitsutiani yututsi Rawiri Kakaiyarieya kuwauneti. Tamamata heimana huta wiyaritsie kanitsutiani Kura kwieyari meta Kerutsareme kiekariyari wa'itieti, tuki 'etsimipepe kaniuti'una, meta 'uka kakaiyariyari 'Atserá 'ikiyarite, tetexi kakaiyarixiyari meta tepiaki memiwewiyatika.

⁴ Hixiena kaniuti'unarieni wahaitsixi memite'atimawiyariwakai, meta 'ikwa

matitaiyariwakai, meta kaniutimurarieni 'Atserá 'ikiyarite, meta tetexi kakaiyarixiyari metatsiere tepiaki memiwewiyatika mekaniutitararieni tumuanari mekanayeitiarieni, hiki miki tumuanari kanakuwiwiyani memitewamawirieikai memakateukie heima.

⁵ Mawari taiyametetsie miki kakaiyarixi wamawari wewiwamete wa'umeteyari kaniutitaiya, mipai Kura meta Kerutsareme katiniu'itieni.

⁶ Yaxeikiata katiniuyurieni Manatsexi kiekariteyaritsie, 'Epirahini, Tsimehuni, meta Nepitahari wakiekariteyaritsie, meta wa'aurie mamametikatsie.

⁷ Naitsarie 'Ixaheri kwieyaritsie mawari matiweyiwa kaniuti'una, kakaiyarixi memiwewiyatika tumuanari kaniwarayeitiani meta 'uka kakaiyarixiyari 'Atserá 'ikiyari, meta 'ikwa matitaiyariwakai kaniuti'una. Hiki 'arike Kerutsareme kanakunuani.

⁸ Hiki tamamata heimana 'atahaika wiyari ti'aitati, 'arike miki kwieyari meta tuki 'u'itiekari, Kutsiyaxi kaniwarutani'ani Tsapani 'Atsariyaxi nu'aya meta Matsehiyaxi, kuwexinaruri mihikitikai miki kiekariyaritsie, meta ti'utiwame Kuha Kuhakatsi nu'aya, Yawé Kakaiyari tukieya memihekwariyaki.

⁹ Hiki miki mawari wewiwamete tiwa'aitiwame Kirikiyaxi hetsia mekaniu'axiani meta tumini mekaniyetuirieni Yawé tukieya manuwe memukuxeiriyarieikai, meta rewitsixi kitenie tehiwemete Manatsexi kwieyaritsie kiekatari memiwayetuiriekai meta 'Epirahinitisie kiekatari, meta naitsarie 'Ixaheritsie kiekatari,

Kuratsie meta Wenikaminitisie kiekatari, meta Kerutsareme kiekatari memiyetuakai.

¹⁰ Hikita tumini mekaniyetuiriyarieni tuki 'aixia yuruwamete waxexeyamete, mikita mekaniwayetuirieni tumini te'uximayatamete Yawé tukieya memihewariyatiwekai.

¹¹ Metatsiere tumini mekaniwaru'itiani kiyeki memiteheutawewiwawe meta kii wewiwamete, mikiki memitetinaneniki tetexi meta kiyexi pikaxite manuyehini kii hetsie Kuratsie te'aitamete memiku'eiriekai.

¹² 'Iki teiteri yu'uximayatsikatsie yamepitekahukai. Memanuyetekai mepihikitikai rewitsixi Yakati meta 'Awiriyaxi, Merari nuiwarimama, meta Tsakariyaxi meta Metsurani, Kuhati nuiwarimama. Rewitsixi kwinie memiteheutakanariwiwawekai,

¹³ tetikimete tewa'aitiwamete mepihikitikai meta yunaiti mana memite'uximayakai, tsepa ketitatsie memite'uximayakai. Miki rewitsixi hipati kemituiyi te'utiwamete mepihikitikai, paratsiyuta memitehiritiariiekai meta kitenie tehiwemete.

*'Iniari niukiyari maye'uxa kemituiutaxeiyarie
(2Kem 34:14-32 - 2Te 22:8-20, 23:1-3)*

¹⁴ Kepauka tumini memiwaye'ii Yawé tukieyata, Kirikiyaxi mawari wewiwame xapa kaniutaxeiya 'iniari niukiyari maye'uxa Yawé hetsia mieme, Muitsexi kemiraka'utia.

¹⁵ Hiki Kirikiyaxi kemituiyi ti'utiwame Tsapani mipai katiniutahiawe: «Xapa nepetaxeii 'iniari niukiyari maye'uxa Yawé tukita». Hiki kaniyetuirieni,

16 meta miki Tsapani ti'aitame kanehuririeni. Mipai katinitahiawe:

—Ti'aitame, matsiparewiwamete naimetsie yamekatenekehuni kememite'uta'aitarie.

17 Tumini mekaniwaye'ini Yawé tukita mayemanekai, meta mekaniwayetuirieni te'uximayatamete waxexeyamete, metatsiere te'uximayatamete.

18 Meta kemiŋiuyi ti'utiwame Tsapani, ti'aitame mipai katiniutahiawe kename mawari wewiwamete tiwa'aitiwame Kirikiyaxi xapa heiyetuiriekai, hiki miki kanekateriwa ti'aitame hixie:

19 Kepauka ti'aitame 'iniari niukiyari mu'eni, yukamixa kaneukatsana hiwerika 'iniariyari wewieti,

20 hiki meta mipai katiniwaruta'aitiani, Kirikiyaxi, 'Akikani Tsapani nu'aya, meta 'Awiruni Mikahiyaxi nu'aya, meta kemiŋiuyi ti'utiwame Tsapani, meta 'Atsahiyaxi hurawa 'iparewiwame:

21 —'Iki xapa miyamayetaineki mutax-eiyarie, xekenehu Yawé nehetsiemieme xekeneuta'iwawiya, meta 'ixaheritsixi meta Kuratsie kiekatari memuyuhayewatiwe wahetsiemieme. Xiari Yawé tahetsie yuhaxia kaneyeni'aniri meripaiti ta'ukiyarima niukieya memuku'eiriki meta yamemikatekakiki 'iki xapatsie kemire'uxa.

22 Hiki Kirikiyaxi meta hipati ti'aitame muwarutani'a mekanekine 'uka Hurira Kakaiyari niukameya hetsia mekaniu'axiani me'ita'iwawiyake, kiekari mihekwa makuma

Kerutsareme 'aurie mukatei. Hurira Tsaruni pi'iyayatikai, mawari wewiwamete wakemarite mitihiritiariekai, Tikiwa nu'aya meta Kaxihatsi teukarieya.

²³ Hurira mipai katiniwaruta'eiya: «Yawé mipai kanaineni, 'ixaheritsixi wakakaiyari: “Mipai xeketenetahiawi kemi'ane mixehetani'a,

²⁴ kename ne, Yawé, mipai netixehayehitiwa: “Uximatiarika nekanani'amiki 'ena, meta 'ena kiekatari wahetsie, meta yanepitiyurieni naiti maye'atiarieniki kemire'uxa miki xapatsie ke'axaxemi'itarieni makateriwarie Kuratsie ti'aitame hixie.

²⁵ Miki mepinetsi'uku'eiri, hipame kakaiyarixi 'ikwa mepiwatairietawe, meta yunaime yutetexi kakaiyarixiyariki mekaneniuyehaxiatiani. 'Ayu-mieme waikawa nepiha'a 'iki kwieyaritsie mieme, meta nepikatihayewa.'

²⁶ Peru Kuratsie ti'aitame, mixehetani'a xeminetsita'iwawiyaki, mipai xeketenetahiawi kename ne, Yawé, 'Ixaheri Kakaiyarieya, mipai nehaine niuki mu'eni hepaitsita:

²⁷ “A'iyari muyuitiarieki meta tixaiti pemikarayuyeitiaki nehixie pe'u'enaka 'iki kwieyaritsie meta 'ena kiekatari wahetsiemieme kenemutayi, meta 'akamixa pemeukatsanaxiki hiwerikaki meta nehixie pemitatsuaakaki, ne nekamanu'enieni. Ne, Yawé, mipai nekanaineni.

²⁸ 'Ayumieme, nekamanika'uxipitiamiki 'a'ukiyarima wahamatia, pekanikateukiemiki kayuwati 'umakaku. 'Eki pepikaniere 'uximatiarika kenemiranuni'ani 'iki kwieyaritsie meta 'ena kiekatari wahetsie.' ”»

Hiki miki mekanakunuaxiani memutani'arie
ti'aitame memitehetaxatiani.

Tiratu kemitiuhekwaritarie

²⁹ Hiki ti'aitame yunaime kaniwaruta'inieni
'ukirawetsixi Kura kwieyaritsie kiekatari meta
Kerutsaremetari.

³⁰ Yunaime Kuratsie kiekatari wahamatia meta
Kerutsaremetari, mawari wewiwamete, rewit-
sixi, meta yunaiti miki kwieyaritsie kiekatari,
'amemiyumate meta 'etsimemiyumate, miki wa-
hamatia ti'aitame Yawé tukieyata kaneutahani,
hiki muwa wahixie kanekateriwa tiratu xapayari
Yawé tukita mutaxeiyariekai.

³¹ Hiki 'anukukeka ti'aitame, Yawé hixie tiratu
kaniuwewieni kanihekwariya. Yakaniutayini
Yawé mayexeianiki meta yamitikamieniki,
naimeki yu'iyariki meta naime kemitiyumateki,
'aitsikateyatsie, 'iniari niukiyaritsie, mipai
mireye'atianiiki tiratu niukiyari miki xapatsie
maye'uxa.

³² Hikita 'arike yakatiniuyurieni yunaiti
mana Kerutsareme memiyuxeiriekai meta
Wenikaminitisiekatari yamemitiyuaniki
tiratu hetsiemiemeki yamemitekakineki. Hiki
Kerutsareme kiekatari yamekatenikakine
wa'ukiyarima wakakaiyari tiratuya kemainekai.

³³ Kutsiyaxi naime yeiyari 'axami'anene
kaniukumaweriya naitsarie 'ixaheritsixi
wakwieyaritsie, meta yapitiuyuri yunaiti
'Ixaheritsie memititekai Yawé yukakaiyari
memayexeianiki. Mexi Kutsiyaxi 'a'uyeikakai,
Yawé mepika'uku'eiri, yu'ukiyarima wakakaiyari.

35

Patsikwa 'ixiarariyari (2Kem 35:1, 18-19 - 2Te 23:21-23)

¹ Hiki Kutsiyaxi Kerutsareme Patsikwa 'ixiarariyari kaniuwewieni Yawé hetsiemieme. Tamamata heimana nauka tukaritsie meta mexiakame metseritsie.

² Kutsiyaxi mawari wewiwamete kaniwaru'uitiani meta kaniwa-tuikakaitini memiyuwairiyani Yawé tukita memite'uximayakaki.

³ Meta rewitsixi memihiritiariiekai 'ixaheritsixi memitewa'ikitiakaki meta memipatsiekai Yawé hetsiemieme, mipai katiniwarutahiawe: «Tiratu kakuniyari mipatsie tukita xekeneutateka Tsarumuni Rawiri nu'aya mitawewita, 'Ixaheritsie ti'aitame, xemika'ikukwetiwenikiri. Yawé yukakaiyari hetsiemieme xeketene'uximayaka meta teiterimama 'ixaheritsixi wahetsiemieme.

⁴ 'Aixia xeketeneuyu'uitia yayupapaimeti, nuiwari kexemiyupapaime, kemire'uxa kememite'u'aitaxi Rawiri, 'Ixaheritsie ti'aitame, meta nu'aya Tsarumuni.

⁵ Tukita xekeneuta'uti, xe'iwama 'ixaheritsixi kepai nuiwariyari memihiki, para 'ixaheritsixi xeinuiwariyaritsixi rewitsixi yayupaimeme memiwarexeiyatikaniki.

⁶ Muxatsi xekeniwarukuya Patsikwa 'ixiarariyaritsie miemete, xepatsieti xekenyayueitia meta naime xeketeneukuha'aritia yu'iwama wahetsiemieme, meta xeketenaye'atia Yawé kemitu'aitaxi Muitsexi ya'utainekaku».

⁷ Hiki Kutsiyaxi yutewama, teiteri mana memu'uwakai kaniwarumini xeitewiyari heimana tamamata muxatsi meta tsipuri, meta haika miriyari tuurutsixi, mikiki Patsikwa 'ixiarariyari memiwewieniki.

⁸ Yaxeikiata teiteri wa'ukiyarima mekateniyetu-ani 'imikieri teiteri wahetsiemieme meta mawari wewiwamete meta rewitsixi wahetsiemieme. Hiki Kirikiyaxi, Tsakariyaxi, meta Kehieri, Kakaiyari tukita te'uximayatamete, mekateniwayetuirieni mawari wewiwamete huta miriyari heimana 'ataxewi tsienituyari muxatsi meta tsipuri, meta haika tsienituyari tuurutsixi, Patsikwa 'ixiarariyari memiwewieniki.

⁹ Kunaniyaxi meta 'iwamama Tsemahiyaxi meta Natanaheri, meta Katsawiyaxi, Keyeri meta Kutsawari, rewitsixi memiwa'ukiyarimatikai, mekaniwayetuirieni rewitsixi 'auxiwime miriyari muxatsi meta tsipuri, meta 'auxiwi tsienituyarita tuurutsixi.

¹⁰ Hiki mete'ukuha'aritiaakari, mawari wewiwamete 'aixia mekateniu'uni tukita, meta rewitsixi 'aixia mekateniuyu'uitiani yayupapaimeti, ti'aitame kemitiwaru'aitia.

¹¹ Kepauka tewaxi memiwaranutixitekekai Patsikwa 'ixiarariyari hetsiemiemete, mawari wewiwamete mawari taiyame mepikuxurimawakai, meta rewitsixi tewaxi mepiwatikwipiwakai.

¹² Hiki mepiwayetuiriwakaita xeinuiwariyarite mawari kepaimeme Yawé hetsiemieme memitataiyakekai, kemire'uxa Muitsexi xapayatsie. Yaxeikiata tuurutsixi mekaniwaruyurieni.

¹³ Hikita mekaniwarutiwarika muxatsi Patsik-

watsie miemete, 'aitsika kemaine, metatsiere, turutsixi mekaniwaruka'etsa xariteta, 'itsari 'et-sameteta meta katsuweratetsie, hiki meta ya-pauka mekaniwarutamini yunaime teiteri.

14 Hikita mekanikuha'aritia Patsikwa 'ikwaiyari yuhetsiemieme meta mawari wewiwamete 'Aruni nuiwarimama wahetsiemieme. Rewitsixi mekanikuha'aritia yuhetsiemieme meta mawari wewiwamete wahetsiemieme, miki tukari memikahikaiki tikarikike mekatenuutahayewa mawari taiyariyari mewewietiweti meta wiya metaiyatiweti.

15 Kwikamete 'Atsahapi nuiwarimama mekatenu'uximayakaitini, kememite'u'aitakai Rawiri, 'Atsahapi, Hemani, meta Kerutuni, ti'aitame hetsiemieme mitaniere. Yaxeikiata kitenie tehiwemete mekatenuutahini kitenie hakewa memehiritiariakai, miki 'ana yu'uximayatsika mepika'uhayewaxi, 'ayumieme wa'iwama rewitsixi Patsikwa 'ikwaiyari mekaniwarukawewirieni.

16 Mipai mekatenu'uximayata Yawé hetsiemieme Patsikwa 'ixiarariyari memiwewieniki meta mawari taiyariyari memiwewieniki Yawé mawari taiyameyatsie, Kutsiyaxi ti'aitame kemitiuta'aitakai.

17 'Ana, 'ixaheritsixi mana memiyuxeiriekai Patsikwa mekaniuwewieni meta Paa mikakuxanariyarietika 'ixiarariyari 'atahuta tukari.

18 Kepaukapaititi Kakaiyari niukameya Tsamuheri 'amuyeikakaitsie pikawewiyawekai Patsikwa 'ixiarariyari 'ipai 'aneti, meta nixewiti ti'aitame mipai pikatiwewi Patsikwa

'ixiarariyari, Kutsiyaxi kemitiwewi mawari wewiwamete wahamatia meta rewitsixi, meta Kuratsie kiekatari, meta 'ixaheritsixi meta Kerutsaremetari wahamatia.

¹⁹ 'Iki Patsikwa 'ixiarariyari kaniuwewiyani tamamata heimana 'atahaika wiyari Kutsiyaxi ti'aitakaku.

Kutsiyaxi kemitiumi

(2Kem 35:20-36:1 - 2Te 23:28-30)

²⁰ Hiki 'arike Kutsiyaxi tuki 'aixia 'uyuriekuri, 'Ekipitutsie ti'aitame Nekahu, kanayeyani muyutamieniki Karikemitsi mirakutewatsie, miki kiekari 'Eupirate hatiayari tetsita pikumakai, peru Kutsiyaxi kanayeyani 'itamienike.

²¹ Hiki Nekahu yuniuki tuayamete kaneini'airieni mipai memite'itahiaweki: «Pepika'anuyehakeni, Kuratsie ti'aitame. Ne hiki nepikanekumiene 'ahamatia, 'iya nuiwari meminetsimietawe pita nekaniwakukwineni. Kakaiyari minetsiparewie, mipai pinerahiawekai nekeyumexiitiaka mikiki. 'Ayumieme Kakaiyari hixie pepika'uyehakeni, miki mikamatsi'uka'unaniki».

²² Kutsiyaxi matsi yapikatikatia kemirahiawariwakai, Nekahu kemirehiawekai Kakaiyari yatitaxatiaku, matsi, kamixate yiki ti'aneneme ranakatika hiki kaneyani makuweritsie Mekiru mirakutewatsie Nekahu hamatia muyutamieniku.

²³ Hiki tupiki temimimete me'itamiki, ti'aitame Kutsiyaxi mipai katiniwarutahiawe yuparewiwamete: «Xekenenanuyewitiki, yemeki waikawameki nepitiukwinitiarie».

24 'Iparewiwamete mekanenayehana kaxetayatsie mekanipata xeime kaxetatsie pita, meta mekaneitini Kerutsareme paiti. Mana kaniumini, hiki kaniukateukieni 'ukiyarimama memuyehetsie. Meta yunaiti Kuratsie kiekatari meta Kerutsaremetari mekaniyuhiweriekaitini hetsiena mieme.

25 Hiki Kutsiyaxi hetsiemieme Keremiyaxi hiwerika kwikariyari kaniutawewieni, meta 'ana mitiyehane meta hiki, kwikamete 'ukitsi meta 'ukari Kutsiyaxi kwikariyari mepa'eriwa kepauka meyuhiwerietu memikwika xewiti miyu. 'Iki kwikari 'ixaheritsixi yunaiti memimatekai, paye'uxa hiwerika kwikariyari xapayaritsie.

26 Hipatita kemituiyi Kutsiyaxi ti'aitametikaku, heitserie kemitikatia Yawé 'aitsikateya kemaine,

27 kemituiyuri, mitiukatsutiatsie timieme 'atsita 'imatiriekaka timieme, katinaka'utiarieni 'Ixaheritsie te'aitamete meta Kuratsie te'aitamete waxapatsie.

36

Kuhakatsi, Kuratsie ti'aitame (2Kem 36:2-4 - 2Te 23:31-34)

1 Hiki teiteri kiekatari Kuhakatsi Kutsiyaxi nu'aya mekananukakeni, ti'aitame mayaniki yu'ukiyari hetsiemieme, Kerutsaremetatsie.

2 Kuhakatsi kepauka mitsutia ti'aitati xetewiyari heimana haika wiyari pexeyakai, Kerutsareme 'ukaiti pitiuta'aitaxi haika metseri.

3 Peru, 'Ekipitutsie ti'aitame kanenakahiani mikati'aitaniki Kerutsaremetatsie, meta miki kwieyaritsie kiekatari kaniwarutawawirieni

haika miriyari heimana haika tsienituyari kiruyari pirata meta xeitewiyari heimana tamamata heimana haika kiruyari huru.

⁴ Hikita 'Eriyakini Kuhakatsi 'iwaya pita ti'aitame kanayeitiani Kura kwieyaritsie meta Kerutsaremetisie, meta Kuhatsimi pita katiniteriwa. Peru Kuhakatsi piretsu payeitia, Nekahu kaneihana 'Ekipitu paiti.

*Kuhatsimi, Kuratsie ti'aitame
(2Kem 36:5-8 - 2Te 23:36-24:6)*

⁵ Hiki Kuhatsimi kepauka mitsutia ti'aitati xeitewiyari heimana 'auxiwi wiyari pexeyakai, meta Kerutsareme 'ukaiti pitiuta'aitaxi tamamata heimana xewi wiyari, peru Yawé yukakaiyari kemikatinake katiniuyurieni.

⁶ 'Ayumieme Wawiruniyatsie ti'aitame Nawukurunutsuxi Kuhatsimi kaniutamieni, hiki meta kaneihana Wawiruniya paiti wurunitse tepiyariki wiwiekame.

⁷ Metatsiere, Nawukurunutsuxi Yawé tukieyata timieme piinite katinetini Wawiruniya paiti, hiki yutukita katineutapini Wawiruniya paiti.

⁸ Hipatita kemituuyi Kuhatsimi ti'aitametikaku, meta ke'axamituuyuri metatsiere naiti kemituyuri, katinaka'utiarieni 'Ixaheritsie meta Kuratsie te'aitamete waxapatsie. Hiki nu'aya Kuhakini kanitsutiani 'utimana ti'aitati.

*Kuhakini, Kuratsie ti'aitame
(2Kem 36:9-10 - 2Te 24:8-17)*

⁹ Kepauka Kuhakini mitsutia ti'aitati tamamata heimana 'atahaika wiyari pexeyakai, meta Kerutsareme 'ukaiti pitiuta'aitaxi haika

metseri heimana tamamata tukari, peru Yawé kemikatinake katiniuyurieni.

¹⁰ 'Ayumieme, mexiakame wiyaritsie 'itsutiakaku ti'aitame Nawukurunutsuxi katiniuta'aita Wawiruniya paiti manuhanieniki, meta Yawé tukita timieme piinite waikawa miraye'atika mame, meta Tserekiyaxi pita ti'aitame kanayeitiani Kura kwieyaritsie meta Kerutsaremetsie, Kuhakini 'iwaya yatewa.

*Tserekiyaxi, Kuratsie ti'aitame
(2Kem 36:11-16 - 2Te 24:18-20, Ker 52:1-3)*

¹¹ Tserekiyaxi xeitewiyari heimana xeiwiyari pexeyakai kepauka mitsutia ti'aitati, meta Kerutsareme 'ukaiti katiniuta'aita tamamata heimana xeiwiyari,

¹² peru Yawé yukakaiyari kemikatinake katiniuyurieni. Kakaiyari niukameya Keremiyaxi pika'anu'eni, Yawé hetsiemieme mitikuxataakai,

¹³ metatsiere ti'aitame Nawukurunutsuxi puku'eiri 'eye'unieti patia, kename meyuxewinikekai memite'uxataakai. Tserekiyaxi matsi yu'iyaritsie pitse'ikai, meta pikayuwairi Yawé hetsia munuaniki, 'Ixaheri Kakaiyarieya hetsia.

¹⁴ Yaxeikiata mawari wewiwamete wa'ukiyarima meta teiteri waikawa 'axam-eteyurieti mekanakine, hipame nuiwarite wa'aurie kiekatari wayeyari 'axami'anene mepanukuwei, hiki tuki ka'itiyakame mekanayeitiani Yawé yuhetsiemieme patsiekame mayeitakai Kerutsareme kiekariyaritsie.

¹⁵ Waikawa wanaki'erieti yuteiterima meta yutuki hakewa mayeka, Yawé, wa'ukiyarima

wakakaiyari, waikawamexia piwareni'a yuniukamete memiwarayehitianiki.

¹⁶ Peru miki Kakaiyari ni'arimama mepiwananaimakai, waniuki mepika'eniekai, 'axamepitewakumamatekekai Kakaiyari niukametemama. Hiki 'imatirieka, Yawé yuhaxia kaniutatuanani teiteri wahetsie, pumawekai xewiti wahetsie mitanuani.

Kerutsareme kemitiuka'unarie

(2Kem 36:17-20, 22-23 - 2Te 25:1-21, Ker 52:4-27, Ets 1:1-3)

¹⁷ Hiki Yawé wawiruniyutsixi tiwa'aitiwame kaneni'ani wahetsia, hiki miki muwa tukita kaniwarukwini 'ixiparaki temari, meta miki pikawarutinenimayataxi temari, 'imarixi, 'ukirawetsixi meta 'ukiraixi. Kakaiyari yunaime kaniwayetuanani hetsiana.

¹⁸ Meta tinaime piinite Kakaiyari tukieyata timieme, 'amitipapa meta 'etsimitipepe, meta tukita mitiyepikai miraye'atika, meta ti'aitame tipiiniteya meta 'iparewiwamete tiwapiini, miki katinetikieni Wawiruniya paiti.

¹⁹ Hiki Kakaiyari tukieya mekaniutataiya, Kerutsareme kuraruyari 'amatayewa mekaniuka'una, meta paratsiyute mekaniutitaiya meta tinaime mekateniutitara piinite miraye'atikatei muwa mitiyepitikatei.

²⁰ Kemi'ane memutawikwei memika'ukwi, ti'aitame Wawiruniya paiti kaniwarehapani, hiki wairiyarika te'i'uximayatsiriwamete mekanakine meta niwemama, wairiyarika te'uximayatamete mepihikitikai 'atsita kepaukake peritsiyatanaka mitiuta'aitaxi.

21 Mipai Yawé niukieya katinaye'atarieni Keremiyaxi ya'utainekaku. Kwie ka-niuka'uxipieni xawati tukariyari hexeiyati kanayani kemireuterixi yuxaita kumati, kepaukake maye'a haika tewiyari heimana tamama wiyari.

Tsiru kemiraka'utia

22 Merikite mexiakame wiyaritsie Tsiru ti'aitakaku, Peritsiya kwieyaritsie ti'aitame 'iyarieya Yawé mipai katiniuyuitiani miki minetianiki 'aitsika naitsarie mitani'axianiki mira'aitatsie, hiki mipai miraye'atarieniki Yawé niukieya niukameya Keremiyaxi kemutayi. Ti'aitame yakaniutayini yuniukiki meta mipai yakatinaka'utsieni, mipai katiniuta'aita:

23 «'Ipai pira'aita Tsiru, Peritsiya kwieyaritsie ti'aitame:

»Yawé, Kakaiyari muyuawitsie makawe, minetsiyetuiiri nuiwarite yunaimé kwiepa memitama, mipai pinera'aitiwa tuki neke'itawewirieni Kerutsareme kiekariyaritsie, Kura kwieyaritsie miti'ane. 'Ayumieme, kemi'ane Kura kwieyaritsie mikiekametini, keheyani, hiki Yawé kehei'iwiyani kakaiyarieya».

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3